

## Maqkul

### *Gevq-a nail gaq*

Haoqgavq niil keiv neq, khaq sil gaq-i mail geqv-a nail dai aqduq aqtsil tsil dai maq geqv bhoel-ai thaq khi ngaol-aog, milnee uqnee khe Khali yaq juq, Maqkul-i mail geqv-a nail ngaol dai, noeq nail ngaol. Maqkul dai ge nail daoqceevq neq, deeqphuq phuq ma dai, ge movq nail ngaol. Yeiqsul nail gaqkhoel tsel-nvq gaq nail lavqkhoel bhai maq aol-ail. Aivq nail aqmil yaoq mil yaoq neq, Yaolhaq dai ngaol. Daoqceevq neq, Miqyail gaoqhaq bhiq-a nail dai, ge movq nail ngaol. Aivq nail aqma neq, Maqlil dai khul nail ngaol. Aivq nail ilkhaol neq, Yeiqsulsaqlaiq meenq bhai jiav khi, Yeiqsul sil jel-u phao, yaqlaol juq jil lai q jil lai-ail geeqlaog hal duq pevq nail ngaol. Bhaqnaqbhal nee aqivq jaqbheq tavq nail ngaol.

### *Gevq-a nail aqyanq khi aqduq*

Gevq-a nail aqyanq neq, A.D. 55-68 kovq nail gaiqlaq bhai ngaol. Geqv-a nail aqduq neq, Lolmav meenq bhai ngaol dai, noeq nail ngaol. Mee nia gaq saol-nvq nail, haoqgavq niil keiv geqv-u phao, Gaqkhoel Bheiqtuvluy-i mail khal ge nail khe-ai, geqv thaq nail niil dai, noeq nail ngaol. Thoil taivq-ail maq ngel-ai haq-al, Maqthaiq haoqgavq khi Lulkavq haoqgavq geqv-u phao, Maqkul haoqgavq bhai heldaiq heldaiq-ail geqv thaq nail ngaol dai, noeq nail ngaol.

*Khaq sil gaq bhai gevq bhiq-a nail*

Haoqgavq niil keiv neq, Lolmav tsaol-aq Khali yaq juq bhai gevq bhiq-a nail ngaol.

*Khul bhai noeqthunq khi gevq-a nail*

Haoqgavq niil keiv neq, Lolmav tsaol-aq Khali yaq juq, Yeiqsul bhai, aqyu juq-i mail tsiqeeq nail, hav bhoel-ai thaq nail khe-ai, neema thaqt-saol nail pha q ivq dai, gevq-a nail ngaol. Al ovqtavq, Yeiqsul neq, tsaol-aq khe-ai aqsivq haqjoil phi lee-a nail Miqyail ngaol. Neivq iqsanl, Yeiqsul neq Miqyail nail Yaqyov ngaol dai, heeq nia nail ngaol. Gaqkhoel juq, Yeiqsul neq Miqyail nail Yaqyov ngaol dai, heeq nia khi ev nail lavqkhoel neema thaqtsaol nail ngaol. Aqbhu Miqyail iqsanl Yeiqsul neq aivq nail Yaqyov ngaol dai, bhiq heeq bhi moel-a nail ngaol. Yeiqsul aivq gaq Miqyail nail Yaqyov ngaol dai, ge nail ngaol.

Alheel ngel-i mail, haoqgavq niil keiv neq, Yeiqsul-i mail nl-a hal-a nail, ail-a lal-a nail juq gevq bhoel khi, aivq-i mail ge-a nail khi cavq bhiq cov bhiq-a nail juq maodai maq aol-ail. Yeiqsul nail daoq nee maqtsil aivq-i mail nl-a nail ganl bhai gevq bhoel-ai thaq nail ngaol.

*Ulcuvq saol bhiq nail Yaolhaq gailkhaol lav daol lee-a nail ganl*

<sup>1</sup> Miqyail nail Yaqyov Yeiqsul Khali nail lavqkhiq tsail nail geeqlaoq daoq iqmoeq ilmoeq khe daoq neq, niailhai ngaol.

<sup>2</sup> Miqyail nail haqbhoil gedan nail Ilsaqyal nail haoqgavq lavqkhoel bhai niailhai gevq-ai thaq nail ngaol:

“Naoq nail iqmoeq nee  
naoq nail haqbhoil  
gailkhaol bhi lav  
daol-ail nail dai khi,  
ngaq nail gaqkhoel  
naoq nail iqmoeq nee mail  
ngal khoel gai-aivq naol.

<sup>3</sup> ‘Heeqphaq lee nail  
haqbhoil  
gailkhaol lav daol khi,  
aivq nail gailkhaol  
daolcoev dai  
lav daol yaoq’ dai,  
tsaol-aq teevq gaq  
haqtsoiq haqyal  
bhai jaol khi,  
mailma-ail  
ge nail ngaol” dai,  
gevq-ai thaq nail ngaol.

<sup>4</sup> Gaqkhoel al gaq neq, Yaolhaq ngaol. Aivq neq, haqtsoiq haqyal bhai jaol khi, yu bhai ulcuvq saol bhiq-a nail ngaol. “Miqyail nuljuq nail oeqbal phaiq nia dai, oeqbal noeq pov khi al bhai nee tavq nail, ulcuvq saol yaoq” dai, daoq cavq cavq nail ngaol. <sup>5</sup> Yuldav milkhaoq yaq iqsanl khi, Yeiqlulsaqlaiq meenq bha jaol nail tsaol-aq iqsanl mail, Yaolhaq jaol nail bha ail khi, yovqgavq nail oeqbal yovqgavq ge dov bhiq-a nail ngaol. Aq-u phao, Yaolhaq aqyu juq bhai Yaoldaq laoljaol lavqkhoel bhai ulcuvq saol

bhiq-a nail ngaol. <sup>6</sup> Yaolhaq neq, laolthao nail aqmevq-i mail yavq-ai thaq nail aqgaq aqdoi doi khi, aqjiovq bhai jaiqyaq bavkov nail jiovpavq pavq-nvq thaq nail ngaol. Aivq neq, noelbhoel khi bhaiqtsil bhaiqeel jaq nail ngaol. <sup>7</sup> Aivq daoq cavq cavq cavq-ail ge nail: “Ngaq nail haoqnao lee nail gaq neq, ngaq-ai nee maqtsil bhaqaog eeq nail ngaol. Ngal thaoq kovq khi aivq nail saiqnaov neeqtsaq bhai pheel nail iqsanl, maq geel-nvq-ail. <sup>8</sup> Ngal nuljuq bhai ulcuvq lavqkhoel bhai, ulcuvq saol bhiq nail ngaol. Thailhai ngaol-aog, aivq neq, nuljuq bhai Meeqnail Haolnail Aqhaqlal lavqkhoel nee, ulcuvq saol lavq nail ngaol” dai, ge bhiq-a nail ngaol.

*Yeiqsul ulcuvq saol-a nail ganl*

<sup>9</sup> Aq-u phao, Yeiqsul Gaqliqlail milkhaoq Naqsaqlail meenq nee mail Yaolhaq jaol nail bha lee-a nail ngaol. Yaolhaq aivq bhai Yaoldaq laoljaol lavqkhoel bhai ulcuvq saol bhiq-a nail ngaol. <sup>10</sup> Yeiqsul ulcuvq lavqkhoel nee dov lal-u phao, teevq pov taivq-ail nqtavq phao lal nail bhai maqkhaiq, Aqhaqlal Miqyail khaoqkhoiq khe-ai aivq nail kovtavq bhai yavq kha lee nail bhai maqkhaiq, Yeiqsul ya moel-a nail ngaol. <sup>11</sup> “Naol neq, ngal mailma-ail gaiq-a nail, ngaq nail Yaqyov ngaol. Ngal naoq bhai neekhaol sil deede naol” dai, nqtavq nee mail aqthel meel dov-ai leevq-a nail ngaol.

*Yeiqsul jalmul mul nail bhai ya daq-a nail ganl*

<sup>12</sup> Teevq pov taivq-ail Aqhaqlal Miqyail Yeiqsul bhai haqtsoiq haqyal bhai khoel gai-aivq-a nail

ngaol. <sup>13</sup> Aivq haqtsoiq haqyal bhai liq tsel n jaol-u phao, neivq Saqdaq aivq bhai jalmul mul-a nail ngaol. Yeiqsul neq, haqtsoiq jaiqyaq juq nee mail jaol-a nail ngaol. Nqtavq gaqkhoel aivq bhai bhi jaq bhi daol khi tsaojao-ai bhiq lee-a nail ngaol.

*Yeiqsul iqmoeq ilmoeq ganl nl-a nail ganl*

<sup>14</sup> Yu Yaolhaq bhai nieivq khi thaonq bhai laol bhoel gaq-al ngal-aq neq, Yeiqsul Gaqliqlail milkhaoq bhai ail khi, Miqyail nail lavqkhiq tsail nail geeqlaoq daoq cavq ail-a nail ngaol.

<sup>15</sup> Aivq ge nail: “Aqyanq tsaq lal-aq nail ngaol. Miqyail Milkhaoq kev lee nail aqjail jail lal-aq nail ngaol. Oeqbal noe pov khi lavqkhiq tsail nail geeqlaoq daoq bhai neema thaqtsaol yaoq” dai, cavq bhiq-a nail ngaol.

*Yeiqsul delgil nieivq nail liq gaq bhai khul-a nail ganl*

<sup>16</sup> Yeiqsul Gaqliqlail ngaqkha daolbhaq bhai ail thailthaiq-u phao, Silmoq khi aivq nail jaqbheq Aqdaiqlaiq ngaqkha lavqkhoel bhai ovjeel joe joe-ail jaol nail bhai, ya moel-a nail ngaol. Aqyu nvq mail neq, delgil nieivq nail tsaol-aq ngaol.

<sup>17</sup> “Ngaq nail haoqnao tsaothel lavq yaoq. Ngal nul-nq nvq mail delgil nieivq nail khe-ai, tsaol-aq bhai halpov kovq nail tsaol-aq bhi jiovq naol” dai, Yeiqsul aqyu nvq mail bhai ge bhiq-a nail ngaol. <sup>18</sup> Aqyu nvq mail teevq pov taivq-ail ovjeel khaonq ha-ail ceevq khi, Yeiqsul nail haoqnao tsaothel-aivq-a nail ngaol.

<sup>19</sup> Yeiqsul iqmoeq phao gaoq ail-u phao, Seiqbheiqdail nail yaqyov Yaqkov khi aivq nail jaqbheq Yaolhaq laovq lavqkhoel bhai ovjeel

bhuq thailthaiq nail bhai, ya moel-a nail ngaol.  
<sup>20</sup> Yeiqsul teevq pov taivq-ail aqyu nvq mail bhai iqsanl khul-a nail ngaol. Aqyu nvq mail neq, aqbhu Seiqbheiqdail bhai gaqmaol maoljaq nail juq nee, laovq lavqkhoel bhai khaonq ha-ail ceevq khi, Yeiqsul nail haoqnao tsaothel-aivq-a nail ngaol.

*Neivq aqcavq aol nail teevq gaq nail ganl*

<sup>21</sup> Aqyu juq Gaqbheiqneiqoq meenq bhai aol lai-a nail ngaol. Jaol n n-gaol, Yeiqsul teevq pov taivq-ail uqhuq thaoq nail ilkhaol bhai dav lai khi, cavq bhiq cov bhiq-a nail ngaol. <sup>22</sup> Jil lal-a nail tsaol-aq juq, Yeiqsul-i mail cavq bhiq cov bhiq-a nail daoq bhai noeq-u maq dov dai, pevq ail-a nail ngaol. Khul khi mail dai ngal-aq neq, aivq neq, aoldaoq kovqdaoq cavq nail cov nail juq khe-ai, cavq bhiq cov bhiq-a nail maq ngel-ail. Bhaqaoq aol nail lavqkhoel nee cavq bhiq cov bhiq-a nail ngaol. <sup>23</sup> Aq-u phao, aqyu juq nail uqhuq thaoq nail ilkhaol lavqkhoel bhai, neivq aqcavq aol nail teevq gaq jaol nail ngaol. Aivq gul gul-ail: <sup>24</sup> “Naqsaqlail meenq yaq Yeiqsul-ol, naol nvjuq nee khalhai tavq nail-aiq. Nvjuq bhai lav cov lee-a nail laiq. Ngal naoq bhai heeq kivq naol. Naol neq, Miqyail nail Tsaolmeeq Tsaolhaol ngaol” dai, gul nail ngaol.

<sup>25</sup> Aq-u phao, Yeiqsul neivq al maol bhai khaq khaq-ail khi ge nail: “Naol aqtsi tsu dai jaol khi aivq nail lavqkhoel nee dov ail yaoq” dai, ge bhiq-a nail ngaol. <sup>26</sup> Neivq aqcavq al maol tsaol-aq al gaq bhai kov kov liv liv-ail bhi tev lal khi, aqthel gul kav lal khi, dov ail-a nail ngaol.

<sup>27</sup> Tsaol-aq iqsanl mail noeq-u maq dov dai, pevq-ail khi ge nail: “Ganl niil khalheel ngel-ail. Cavq bhiq cov bhiq nail niil neq, aqsivq niil. Aivq bhaqaoq aol nail lavqkhoel nee neivq aqcavq juq bhai daoq bivq-u phao, neivq juq naldaiq-il” dai, aqyu juq nail gaiqlaq bhai ge pheeljaq nail ngaol. <sup>28</sup> Teevq pov taivq-ail aivq nail ganl, Gaqliqlail milkhaoq khaoq lao-ail gaiq doi ail-a nail ngaol.

*Yeiqsul Bheiqtuvlulv nail khoeq-oel aqma bhai bhi meeqlai-a nail ganl*

<sup>29</sup> Yeiqsul khi mail aivq nail yaqlaol juq, uqhuq thaoq nail ilkhaol nee dov ail khi, teevq pov taivq-ail, Yaqkov khi Yaolhaq nee mail, Silmoq khi Aqdaiqlaiq nail ilkhaol bhai aol ail-a nail ngaol. <sup>30</sup> Silmoq nail khoeq-oel aqma coevqsil-ai bhiq nail ngel-i mail, iqthaiq thailthaiq nail ngaol. Aqyu juq Yeiqsul bhai ya moel-u phao, teevq pov taivq-ail yaqmai-aq al gaq nail ganl, ge bhiq-a nail ngaol. <sup>31</sup> Yeiqsul aivq nail aqlavq bhai nieivq thaiq-ail khi he thul bhiq-a nail ngaol. Aivq coevq sil nail al meeqlai khi, aqyu juq bhai aocbhaol laol bhiq-a nail ngaol.

*Yeiqsul tsaol-aq maodai gaq bhai lav meeqlai bhiq-a nail ganl*

<sup>32</sup> Nlma ga bhoel-ail khi nqkivq kivq lee-u phao, nal nail goel nail tsaol-aq iqsanl khi neivq aol nail tsaol-aq bhai yu Yeiqsul jaol nail bha hel lavq-a nail ngaol. <sup>33</sup> Meenq bhai jaol nail tsaol-aq iqsanl, ilkhaol al il nail govkhoiq bhai jaol bhee-ai thaq nail ngaol. <sup>34</sup> Nalgoel maodai phaqlaiq nal nail tsaol-aq maodai bhai, aivq bhi meeqlai nail nee ovqtavq, neivq maodai bhai iqsanl, the dov

bhiq-a nail ngaol. Neivq juq aivq bhai heeq nia nail ngel-i mail, Yeiqsul aqyu juq bhai daoq maq bhi ge-al.

*Yeiqsul geeqlaoq hal khi, daoq cavq cavq ail-a nail ganl*

<sup>35</sup> Nq bhaq bhaq lal thao, Yeiqsul dov ail khi, tsaol-aq maq jaol nail bha geeqlaoq hal ail-a nail ngaol. <sup>36</sup> Silmoq khi aivq nail aqtsaoq juq, Yeiqsul bhai halpov ail-a nail ngaol. <sup>37</sup> Aqyu juq Yeiqsul bhai halpov moel-u phao, “Tsaol-aq iqsanl mail, naoq bhai halpov nail ngaol” dai, ge bhiq-a nail ngaol.

<sup>38</sup> Thailhai ngaol-aq, Yeiqsul aqyu juq bhai ge bhiq-a nail: “Aqjail bhai jiav nail meenq khi julgu juq bhai iqsanl, ngal daoq cavq ya cavq-ail dai, iqmoeq phao ail bhel. Khul khi mail dai ngal-aq neq, ngal niailhai nl lee-a nail ngaol” dai, ge bhiq-a nail ngaol. <sup>39</sup> A bhai nee ngal-aq, aivq Gaqliqlail milkhaoq doi dai, aqyu juq nail uqhuq thaoq nail ilkhaol juq nail lavqkhoel bhai daoq cavq cavq khi, neivq bhai the dov bhiq-a nail ngaol.

*Yeiqsul niaoqbhaoq daol nail teevq gaq bhai bhi haol lal-a nail ganl*

<sup>40</sup> Niaoqbhaoq daol nail teevq gaq Yeiqsul jaol nail bha lal khi, peevqceevq kovdoiq doiq khi, “Naol nl movq haq neq, ngal haol lal dai, naol nl nia nail ngaol” dai, hal hal-ail khi ge nail ngaol.

<sup>41</sup> Yeiqsul aivq bhai gaoqhaq nail ngel-i mail, aqlavq gaoltsaoq khi aivq nail kovtavq bhai bavq dav khi, “Ngal nl movq naol. Haol lal yaoq” dai, ge bhiq-a nail ngaol. <sup>42</sup> Teevq pov taivq-ail



niaoqbhaoq daol nail al peivq gil-ail khi, haol lal-a nail ngaol.

<sup>43</sup> Yeiqsul tsaol-aq al gaq bhai daoq niailhai bivq khi bhi kovq ail-a nail ngaol. <sup>44</sup> “Ganl niil teevq gaq bhai iqsanl thaq ge bhiq dei-eiq, Philyaq juq jaol nail bha naoq nail aqmaol bhi heldaiq ail yaoq. Naol haol lal-a nail ganl aqyu juq ya heeq nia dai, Molseiq-i mail daoq bivq-ai thaq nail khe-ai, laol bhiq nail phaqa laol ail yaoq” dai, Yeiqsul aivq bhai ge bhiq-a nail ngaol.

<sup>45</sup> Thailhai ngaol-aq, aivq dov ail-u phao, ganl al mailma-ail ge dai bhi khi, yaoq dao yaoq-ao nee bhi gaiq doi ail-a nail ngaol. Alheel ngel-i mail, Yeiqsul meenq lavqkhoel-ai bhaqlaoq kheq dai, maq aol lai nia-ail. Tsaol-aq maq jaol nail bha taivq-ail ya jaol-a nail ngaol. Yaoq phao yaoq-ao nee jaol nail tsaol-aq aivq jaol nail bha lal nail ngaol.

## 2

*Khil sil lavq sil sil nail teevq gaq bhai lav meeq bhiq-a nail ganl*

<sup>1</sup> Mee nia n bhee lal-u phao, Yeiqsul Gaqb-heiqneiqoq meenq bhai gaoq kovq ail khi, aivq ilkhaol bhai jaol nail ganl gaiq doi ail-a nail ngaol. <sup>2</sup> Tsaol-aq maodai jil lal-a nail ngel-i mail, ilkhaol lavqkhoel bhai maq dail lai nail nee ovqtavq, lavqniil phao iqsanl jaol duq maq jlav-ail. Yeiqsul tsaol-aq al juq bhai Miqyail nail daoq cavq bhiq cov bhiq thailthaiq nail ngaol. <sup>3</sup> Aq-u phao, tsaol-aq liq gaq, khil sil lavq sil sil thaq nail tsaol-aq teevq gaq bhai, Yeiqsul jaol nail bha bal

lavq-a nail ngaol. <sup>4</sup> Tsaol-aq teevq bhee jaol nail ngel-i mail, aqyu juq Yeiqsul jaol nail bhai maq aol lai nia-ail. Alheel ngel-i mail, Yeiqsul jaol nail teevq daol bhai, khaolpoiv bheq pav khi, bheq pav-a nail al dao nee, aqyu juq khil sil lavq sil sil nail al gaq bhai iqjial bheebhaoq nee mail phaiq kha gai-aivq-a nail ngaol. <sup>5</sup> Aqyu juq a dai dai-ail neema thaqtsaol nail bhai Yeiqsul ya moel-u phao, khil sil lavq sil sil nail al gaq bhai, “Yaqyov-ol, naoq nail oeqbal phaiq gaq-ao nail ngaol” dai, ge bhiq-a nail ngaol.

<sup>6</sup> Aq-u phao, a bhai jaoldeel-nvq thaq nail aoldaog kovqdaog cavq bhiq cov bhiq nail teevq pav ganav juq neq, yovqgavq nail neema lavqkhoel bhai niailhai saol-nvq thailthaiq nail ngaol. <sup>7</sup> “Tsaol-aq thoil gaq, khalhai khi thailhai ge tseq nail meeq. Thoil neq, Miqyail bhai khal ge movq-ail ge nail khe-ai dul nail ngaol. Miqyail maq ngel nail neq, khaq sil gaq oeqbal phaiq nia nail-aiq” dai, noeq nail ngaol.

<sup>8</sup> Aqyu juq alhai saol-nvq thailthaiq nail ganl bhai, Yeiqsul teevq pov taivq-ail heeq nia khi, niailhai ge bhiq-a nail ngaol: “Nuljuq nail neema lavqkhoel bhai khul khi mail, thailhai saol-nvq thailthaiq nail-aiq. <sup>9</sup> Khil sil lavq sil sil-a nail tsaol-aq niil gaq bhai khalhai ge bhiq nail, ngaq-aiq jaiq nail-aiq. ‘Naoq nail oeqbal phaiq gaq-ao nail ngaol’ dai, ge bhiq nail ngaq-aiq jaiq nail lai. ‘Thul khi, naoq nail iqjial bavq khi tsaol-aivq yaoq’ dai, ge bhiq nail, ngaq-aiq jaiq nail lai. <sup>10</sup> Tsaol-aq nail Yaqyov neq, miltsaq niil nail kovtavq bhai oeqbal phaiq nail bhaqaoq jiav nail ganl, ngal nuljuq bhai bhi heeq bhiq moel

nail haqbhoil nl naol” dai, Yeiqsul ge bhiq-a nail ngaol. A bhai nee ngal-aq, khil sil lavq sil sil nail tsaol-aq al gaq bhai, ge bhiq-a nail:

<sup>11</sup> “Thul khi, naoq nail iqjial bavq khi, ilkhaol bha kovq ail yaoq dai, ngal naoq bhai ge lavq bhel” dai, ge bhiq-a nail ngaol. <sup>12</sup> Aqyu juq iqsanl mail heldaiq thailthaiq-u phao, tsaol-aq al gaq thul lal khi, aivq nail iqjial lavqtsail mail bavq khi dov ail-a nail ngaol. Aqyu juq iqsanl mail, noeq-u maq dov dai, pevq-ail khi, Miqyail bhai tsiqeeq nail lavqkhoel nee ge nail: “Niilheel teevq thal-iq maq moel daiq-al” dai, ge nail ngaol.

### *Yeiqsul Leiqbhil bhai khul-a nail ganl*

<sup>13</sup> Yeiqsul Gaqliqlail ngaqkha daolbhaq bhai teevq pov gaoq ail-a nail ngaol. Tsaol-aq munl munl ma aivq jaol nail bha jil lal khi, aivq cavq bhiq cov bhiq-a nail ngaol. <sup>14</sup> Aivq iqmoeq phao gaoq ail-u phao, khaon tavq nail ilkhaol bhai, Aqlaqphail nail yaqyov Leiqbhil jaoldeelnvq thaq nail bhai, ya moel-a nail ngaol. “Ngaq nail haoqnao tsaothel lavq yaoq” dai, Yeiqsul aivq bhai ge bhiq-u phao, aivq tsaol thul khi, Yeiqsul nail haoqnao tsaothel-aivq-a nail ngaol.

<sup>15</sup> A bhai nee ngal-aq, Leiqbhil nail ilkhaol bhai Yeiqsul khi aivq nail yaqlaol juq aoq jaoq jaoq khi, aoq jaq thailthaiq-u phao, khaon tavq nail tsaol-aq juq khi mail oeqbal yaq maodai iqsanl, aqyu juq nee mail jaol khi, jaq thailthaiq nail ngaol. Khul khi mail dai ngal-aq neq, aqyu juq maodai Yeiqsul nail haoqnao tsaothe nail ngaol.

16 Yeiqsul oeqbal yaq khi khaon tavq nail tsaol-aq nee jaol khi aoq jaq nail bhai, Phaqliqsail nail munl bhai tavq nail aoldaoq kovqdaoq cavq nail cov nail juq ya moel-u phao, “Khul khi mail thoil gaq khaon tavq nail tsaol-aq khi oeqbal yaq nee mail, jaq tavq daol tavq nail-aiq” dai, Yeiqsul nail yaqlaol juq bhai naldaiq bhiq-a nail ngaol.

17 Yeiqsul daoq al daoq bhai ya gaiq-u phao, aivq aqyu juq bhai ge kovq bhiq-a nail: “Jaol hal dov nail tsaol-aq, jagaq coev nail saqlaq maq loq-ail. Nal nail tsaol-aq taivq-ail loq nail ngaol. Tsaq nail daol nail tsaol-aq bhai khul nail dai khi, ngal lee-a nail maq ngel. Oeqbal yaq bhai khul nail dai khi, ngal lee-a nail ngaol” dai, ge bhiq-a nail ngaol.

*Maq jaq nail aol nl nail ganl yu naldaiq nail*

18 Aq-u phao, Yaolhaq nail yaqlaol juq khi Phaqliqsail juq maq jaq nail aol nl nail ngaol. Yu Yeiqsul jaol nail bha lal khi, “Yaolhaq nail yaqlaol juq khi Phaqliqsail juq nail yaqlaol neq, maq jaq nail aol nl khi ngaol-aoq, naoq nail yaqlaol juq neq, khul khi mail maq nl nail-aiq” dai, naldaiq-a nail ngaol.

19 Yeiqsul aqyu juq bhai ge kovq bhiq-a nail: “Khaqma hevq nail gaq, aivq nail aqtsaoq juq nee jaol-u phao, aqyu juq maq jaq nail aol nl naol lai. Aivq aqyu juq nee khal jaol-u kev dai, maq jaq nail aol maq nl nia-ail. <sup>20</sup> Khaqma hevq nail gaq bhai aivq nail aqtsaoq juq nee mail hevq pal-aivq nail aqn kev lee nail ngaol. Aq-u n-gaol kev lee haq neq, aqyu juq maq jaq nail aol nl nail ngaol.

21 Tsaol-aq teevq gaq iqsanl, aqgaq aqdoi aqkhail bhai haqphal aqsivq-i mail phaltsaol maq dovq-ail. Dovq haq neq, dovq thaq nail phaltsaol al tsaol, aqgaq aqdoi aqkhail bhai bhi pav-ail nail ngaol. Pav-ail nail al neq, iqmoeq-u nee maqtsil pav jaiq-ail nail ngaol. 22 Alhai dul dai, tsaol-aq teevq gaq iqsanl bavkov eelpheeq aqlil bhai aqheeq tsilju nail ullul aqsivq maq hoel bhoel daiq haq-al. Hoel bhoel haq neq, aqheeq tsilju nail ullul al, bavkov eelpheeq bhai bhi pav-ail nail ngel-i mail, aqheeq tsilju nail ullul khal-ail khi, bavkov eelpheeq iqsanl cov-ail nail ngaol. Aqheeq tsilju nail ullul aqsivq neq, bavkov eelpheeq aqsivq bhai ya hoel bhoel nail ngaol” dai, ge bhiq-a nail ngaol.

*Jaol n n-gaol nail ganl naldaiq nail*

23 Jaol n n-gaol, Yeiqsul gov gov yal\* bhai ail pav-u phao, aivq nail yaqlaol juq gov gov nail cev cev-ail, tsaothe jaol nail ngaol. 24 Phaqliqsail juq Yeiqsul bhai ge bhiq-a nail: “Heldaiq. Jaol n n-gaol maq nl khaoq nail phaqa, khul khi mail aqyu juq nl nail-aiq” dai, ge bhiq-a nail ngaol.

25 Yeiqsul ge kovq bhiq-a nail: “Daqbhil khi aivq nail aqtsaoq juq aq moevq lal bhiq khi, khul teevq phaqa iqsanl jaq nail maq aol-u phao, khalhai khi-a nail bhai, nuljuq teevq pov iqsanl maq ge daiq haq-al laiq. 26 Daqbhil Miqyail nail ilkhaol bhai aol lai khi, Philma Philyaq juq maq ngel nail neq, teevq gaq iqsanl maq jaq khaoq nail Miqyail bhai laol bhiq-ai thaqa nail khaqmul

---

\* **2:23** 2.23 Ilsaqlaiqlal nail tsaol-aq-i mail khaqmul lav sav nail gov teevq phaqa pevq nail ngaol.

oil jaq khi, aivq nail aqtsaoq juq bhai iqsanl bhi jaq-a nail ngaol. Ganl niil neq, Aqpbhaqtaq Philma jiovq-u phao, pevq lal-a nail ganl ngaol” dai, ge bhiq-a nail ngaol.

<sup>27</sup> Al ovqtavq, Yeiqsul ge nail: “Jaol n neq, tsaol-aq nail haqbhoil teivq-ai thaq nail ngaol. Tsaol-aq bhai neq, jaol n nail haqbhoil teivq-ai thaq nail maq ngel-ail. <sup>28</sup> Alheel ngel-i mail, Tsaol-aq nail Yaqyov neq, jaol n n-gaol bhai iqsanl uvthaiq nail Heeqphaq ngaol” dai, aqyu juq bhai ge bhiq-a nail ngaol.

### 3

*Aqlavq teevq phao sil thaq nail teevq gaq nail ganl*

<sup>1</sup> A bhai nee ngal-aq, Yeiqsul uqhuq thaoq nail ilkhaol bha lai-a nail ngaol. Aq-u phao, aqlavq teevq phao sil thaq nail tsaol-aq teevq gaq, a bhai jaol nail ngaol. <sup>2</sup> Jaol n n-gaol tsaol-aq al gaq bhai, Yeiqsul lav meeq bhiq-ail laiq dai, Yeiqsul nail kovtavq bhai oeqbal thaq kivq dai, heldaiq cov-ai thaq nail Phaqliqsail tsaol-aq teevq pav ganav juq iqsanl, a bhai jaol nail ngaol. <sup>3</sup> Yeiqsul aqlavq teevq phao sil thaq nail al gaq bhai, “Gaoltsi bhai thulphaol lal yaoq” dai, ge bhiq-a nail ngaol.

<sup>4</sup> A bhai nee ngal-aq, Yeiqsul aqyu juq bhai ge bhiq-a nail: “Jaol n n-gaol aqmeeq phaql nl khaoq nail laiq. Maq ngel haq neq, maq meeq nail phaql nl khaoq nail laiq. Yu bhai lav doevq bhiq khaoq nail laiq. Maq ngel haq neq, lav heivq bhiq khaoq nail laiq” dai, naldaiq bhiq-a

nail ngaol. Thailhai ngaol-aog, Phaqliqsail al juq daog maq ge dai, jaol nail ngaol.

<sup>5</sup> Yeiqsul neema phail phail-ail, aqyu juq bhai heldaiq-a nail ngaol. Aqyu juq neema gaol nail ngel-i mail, Yeiqsul noeqhaq nail ngaol. A bhai nee ngal-aq, tsaol-aq al gaq bhai, “Naoq nail aqlavq gaoltsaoq yaoq” dai, ge bhiq-a nail ngaol. Aivq gaoltsaoq-u phao, meeq lai-a nail ngaol.

<sup>6</sup> Aq-u phao, Phaqliqsail juq uqhuq thaoq nail ilkhaol nee dov ail khi, heeqphaq Heiqlol bhai tsaojao-ai nail tsaol-aq juq nee mail thaoqphuq-ail khi, khalhai khi Yeiqsul bhai ya heivq heeq dai, maoqbhaoq nl pheeljaq ail-a nail ngaol.

*Tsaol-aq munl munl ma juq ngaqkha daolbhaq bhai jil lee-a nail ganl*

<sup>7</sup> Yeiqsul aivq nail yaqlaol juq nee mail ngaqkha jiav nail phao gaoq ail-a nail ngaol. Aq-u phao, tsaol-aq munl munl ma aivq jaol nail bha jil lee-a nail ngaol. Tsaol-aq al juq neq, Gaqliqlail milkhaoq khi mail Yuldav milkhaoq nee lee-a nail ngaol. <sup>8</sup> Al ovqtavq, Yeiqsulsaqlaiq meenq, Ildulmail milkhaoq, Yaoldaq laoljaol nlma dov khoeq phao khe milkhaoq nee lee-a nail, Dullu meenq khi mail Sildoq meenq nee lee-a nail ngaol. Yeiqsul-i mail nl thailthaiq nail ganl ya gaiq-a nail ngel-i mail, munl munl ma ma khi, aivq jaol nail bha lee-a nail ngaol. <sup>9</sup> “Tsaol-aq munl munl ma ngaq bhai maq ya thaoqthaiq lal dai, laovq teevq laovq lainq-ai thaq yaoq” dai, Yeiqsul aivq nail yaqlaol juq bhai ge bhiq-a nail ngaol. <sup>10</sup> Khul khi mail dai ngal-aq neq, aivq nal nail goel nail tsaol-aq maodai gaq bhai lav

meeq bhiq-a nail ngel-i mail, nal nail goel nail tsaol-aq iqsanl mail aivq bhai ya thoiqtsi dai, aivq jaol nail bha thaoq thaoq-ail lee thailthaiq nail ngaol. <sup>11</sup> Neivq aqcavq aol nail tsaol-aq juq aivq bhai khal ya moel-u phao, aivq nail sivtavq bhai peevqceevq kovdoi q doiq nail lavqkhoel nee gaolbeiv khi, “Naol neq, Miqyail nail Yaqyov ngaol” dai, gul gul-ail ge nail ngaol. <sup>12</sup> Thailhai ngaol-aq, aivq khaq sil gaq pevq nail ganl, yu bhai maq bhi ge bhiq nail haqbhoil, neivq aqcavq al juq bhai Yeiqsul aqkav kav dai, daoq bivq-a nail ngaol.

*Yeiqsul gaqkhoel tsel-nvq gaq bhai tsel dov-a nail ganl*

<sup>13</sup> A bhai nee ngal-aq, Yeiqsul gaqjaoq bha dav lai khi, aivq neema khal tsaq nail juq bhai khul-u phao, aqyu juq aivq jaol nail bha lal-a nail ngaol. <sup>14</sup> Aivq nee mail bhi jaol khi, lavqkhiq tsail nail geeqlaoq daoq bhi cavq ail nail haqbhoil, Yeiqsul aqyu juq nail lavqkhoel khe, tsaol-aq tsel-nvq gaq bhai tsel dov khi, gaqkhoel dai, kha bhiq-a nail ngaol. <sup>15</sup> Neivq bhai the dov nia nail bhaqaoq iqsanl, Yeiqsul aqyu juq bhai bivq-a nail ngaol. <sup>16</sup> Yeiqsul-i mail tsel dov-a nail tsaol-aq al tsel-nvq gaq neq, nil juq ngaol: Aivq-i mail Bheiqtuvluv dai mil bhiq-a nail Silmoq, <sup>17</sup> Seiqbheiqdail nail yaqyov Yaqkov, Yaqkov nail jaqbheq Yaolhaq (Aqyu nvq mail bhai, Bhaolneiqgail dai iqsanl, yu khul nail ngaol. Daoqceevq neq, nqjaiq jaiq nail khe-ai dul nail yaq dai, ge nail ngaol.) <sup>18</sup> Aqdaiqlaiq, Pillilpuv, Bhaqthaollaqqmail, Maqthaiq, Tholmav,



Aqlaqphail nail yaqyov Yaqkov, Taqdail, Khaq-naqnil\* nail munl bhai tavq nail Silmoq khi mail  
 19 Yeiqsul bhai yu nail aqlavq lavqkhoel bhai av bhiq-a nail Yuldav Ilsaqaqliqoq, niil juq ngaol.

*Yeiqsul khi neivq heeqphaq nail ganl*

20 A bhai nee ngal-aq, Yeiqsul ilkhaol bhai kovq ail-a nail ngaol. Tsaol-aq munl munl ma gaoq jil lal-a nail ngel-i mail, aqyu juq aoq jaq nail iqsanl, maq dan-ail. 21 Yeiqsul nail aqma khi aivq nail jaqbheq juq ganl al ya gaiq-u phao, Yeiqsul bhai hevqkovq ail nail dai khi, ail-a nail ngaol. Khul khi mail dai ngal-aq neq, Yeiqsul naiquq uq ail-aq thaq nail niil dai, aqyu juq noeq nail ngaol.

22 Yeiqsulsaqlaiq meenq nee lee-a nail aoldaoq kovqdaoq cavq nail cov nail teevq pav ganav juq ge nail: "Aivq neq, neivq heeqphaq Bheiqsaqb-hullav aol nail tsaol-aq niil. Aivq neivq heeqphaq bhai juq juq-ail, neivq bhai the dov nail niil" dai, ge nail ngaol.

23 Alheel ngel-i mail, Yeiqsul aqyu juq bhai khul khi, daoqma uqhuq daoq nee mail niailhai cavq bhiq cov bhiq-a nail ngaol: "Neivq Saqdaq neq, yovqgavq bhai yovqgavq khalhai the dov nail-aiq. 24 Milkhaoq teevq khaoq neq, yovqgavq nail gaiqlaq bhai munl bhoilpav khi, maq tsaq maq jil lai haq neq, khalhai khi ivq nia nail-aiq. 25 Ildaoq teevq daoq iqsanl, aivq bhai aivq maq tsaq maq jil lai haq neq, ildaoq al daoq maq ivq nia-ail. 26 Alhai dul dai, neivq Saqdaq neq, aivq bhai aivq phee q khi, maq tsaq maq jil lai haq neq, aivq

---

\* **3:18** 3.18 Maqthaiq 10.4 bhai heldaiq yaoq.

iqsanl maq ivq-ail. Aivq luq-ail seil-ail khi peivq-ail boev-ail nail ngaol. <sup>27</sup> Gaq mao-ail kav nail gaq bhai iqmoeq maq pheethaiq haq neq, teevq gaq iqsanl, aivq nail ilkhaol bhai aol lai khi, aivq nail yalkav maq oil lai nia-ail. Gaq mao-ail kav nail al gaq bhai iqmoeq pheethaiq haq neq, aivq nail ilkhaol bhai aol lai khi, aivq nail yalkav oil lai kivq nail ngaol. <sup>28</sup> Ngal nuljuq bhai maldil dai, ge lavq bhel. Tsaol-aq yaq-i mail nl-a nail oeqbal iqsanl khi mail, khal ge movq-ail ge-a nail yaoq pha q yaoq-ao nee, Miqyail oeqbal phai q bhi q nia nail ngaol. <sup>29</sup> Thailhai ngaol-a oq, Meeqnail Haolnail Aqhaqlal bhai khal ge movq-ail ge nail tsaol-aq khul gaq nail oeqbal bhai maqkhaiq, teevq thal-i q oeqbal maq pha i q bhi q-ail. Tsaol-aq al gaq nqmaq maqluv halyeel oeqbal aol nail tsaol-aq ngaol” dai, Yeiqsul ge bhi q-a nail ngaol.

<sup>30</sup> Tsaol-aq teevq pav ganav juq, aivq bhai neivq aqcavq aol nail tsaol-aq niil dai, ge nail ngel-i mail, Yeiqsul aqyu juq bhai alhai ge bhi q-a nail ngaol.

*Yeiqsul nail aqma khi mail aivq nail jaqbheq juq*

<sup>31</sup> Aq-u phao, Yeiqsul nail aqma khi aivq nail jaqbheq juq lee kev-a nail ngaol. Aqyu juq lavqniil phao thulphaol khi, Yeiqsul bhai bhi khul dov lai-a nail ngaol. <sup>32</sup> Tsaol-aq munl munl ma juq, aivq jaol nail teevq jaoq jaoldeel-nvq tha q nail ngaol. Aqyu juq aivq bhai ge bhi q-a nail: “Naoq nail aqma khi naoq nail jaqbheq juq naoq bhai halpov halpov-ail lavqniil phao jaol nail ngaol” dai, ge bhi q-a nail ngaol.

<sup>33</sup> “Ngaq nail aqma khi mail ngaq nail jaqbheq juq neq, khaq sil gaq” dai, Yeiqsul naldaiq bhiq-a nail ngaol.

<sup>34</sup> Aivq jaol nail teevq jaoq jaoldeel-nvq thaq nail tsaol-aq juq bhai, aivq heldaiq heldaiq-ail khi ge nail: “Niil juq neq, ngaq nail aqma khi mail ngaq nail jaqbheq juq ngaol. <sup>35</sup> Miqyail neema tsaq dai, khal nl nail tsaol-aq ngaq nail aqivq jaqbheq khi mail ngaq nail aqma ngaol” dai, Yeiqsul ge bhiq-a nail ngaol.

## 4

### *Aqiq haiq nail ganl daoqma uqhuq daoq*

<sup>1</sup> Yeiqsul ngaqkha daolbhaq bhai teevq pov gaoq cavq gaoq cov bhiq-u phao, tsaol-aq munl munl ma jil lal-a nail ngel-i mail, aivq ngaqkha lavqkhoel bhai jiav nail laovq bhai jaoldeel ail-a nail ngaol. Tsaol-aq munl munl ma juq neq, ngaqkha daolbhaq bhai jaol nail ngaol. <sup>2</sup> Aq-u phao, aivq daoqma uqhuq daoq nee mail ganl mee nia pha q cavq bhiq cov bhiq-a nail ngaol. Aivq cavq thail cov thailthaiq-u phao, niailhai ge nail ngaol: <sup>3</sup> “Aq-u phao, aqiq haiq nail tsaol-aq teevq gaq jaol laoq thaq nail ngaol. Teevq n kev lee-u phao, aivq aqiq haiq ail-a nail ngaol. <sup>4</sup> Aivq aqiq haiq-u phao, aqiq teevq pav ganav juq neq, gailkhaol kovtavq bhai ga ail-a nail ngaol. A bhai nee ngal-aq, keivq-avq lee khi, aqiq al juq bhai gov jaq gil-a nail ngaol. <sup>5</sup> Aqiq teevq pav ganav juq neq, miltsaq bhaq nail lovmav lovyal bhai ga ail-a nail ngaol. Miltsaq aqbhaq ngel-i mail, lavqtsail mail aqjiiv jiiv dol lavq-a nail

ngaol. <sup>6</sup> Thailhai ngaol-aog, daoqtsail maq kha navq ail-a nail ngel-i mail, nlma dov lal-u phao, nltal mailma-ail kav nail bhaqda nee, khuq-ail kov ail-a nail ngaol. <sup>7</sup> Aqiq teevq pav ganav juq neq, aqgoe goeyal bhai ga ail-a nail ngaol. Aqgoe jiavbuv eeq lal khi, aqjiiv al bhai uvthaiq-ai thaq nail ngel-i mail, aqheeq maq heeq lee-ail. <sup>8</sup> Thailhai ngaol-aog, aqiq teevq pav ganav juq neq, miltsaq mil meeq bhai ga ail-a nail ngaol. Aqjiiv jiiiv lal meeq lal khi, aqheeq maodai heeq lee-a nail ngaol. Aqheeq hail tsel bhoil, kovq tsel bhoil khi, teevq yal bhoil mao lal-a nail ngaol.

<sup>9</sup> Naqkhaol khal covq nail tsaol-aq, naldaiq yaoq” dai, ge bhiq-a nail ngaol.

*Khul khi mail daoqma uqhuq daoq nee ya cavq bhiq nail ganl*

<sup>10</sup> Aq-u phao, tsaol-aq munl munl ma al juq kovq lai gil-u phao, aivq nail haoqnao tsaothe nail tsaol-aq juq khi yaqlaol tsel-nvq gaq, daoqma uqhuq daoq al juq nail ganl Yeiqsul bhai naldaiq-a nail ngaol. <sup>11</sup> Yeiqsul ge kovq bhiq-a nail: “Miqyail Milkhaoq nail ganl oiltsail-ai thaq nail juq bhai, nuljuq heeq nia lal-aog nail ngaol. Thailhai ngaol-aog, yu bhai neq, daoqma uqhuq daoq nee mail ya cavq ya cov bhiq nail ngaol. <sup>12</sup> Khul khi mail daiq ngal-aq neq, Jalliq lavqkhoel bhai gevq-ai thaq nail khe-ai, ‘Aqyu juq heldaiq khi ngaol-aog, maq heldaiq moel nia-ail, naldaiq khi ngaol-aog, maq gaiq nia nail

nee ovqtavq,  
 maq gov heeq nia-ail.  
 Alheel maq ngel-ail  
 nul neq,  
 aqyu juq ngal jaol nail  
 bha kovq lal khi,  
 ngal aqyu juq nail  
 oeqbal phaiq bhiq naol' " dai,  
 ge bhiq-a nail ngaol.

*Aqiq haiq nail ganl nail daoqceevq ge daiq bhiq nail ganl*

<sup>13</sup> Aq-u phao, Yeiqsul aqyu juq bhai gaoq ge bhiq-a nail: "Nuljuq daoqma uqhuq daoq nil daoq bhai maq gov heeq kivq ail laiq. Maq gov heeq kivq haq neq, daoqma uqhuq daoq yaoq juq yaoq bhai khalhai khi gov heeq kivq nail-aiq. <sup>14</sup> Aqiq haiq nail gaq neq, Miqyail nail daoq haiq-a nail ngaol. <sup>15</sup> Gailkhaol kovtavq bhai haiq-a nail neq, niailhai ngaol. Miqyail nail daoq yaq gaiq-u phao, teevq pov taivq-ail neivq Saqdaq lal khi, aqyu juq nail lavqkhoel-ai haiq-ai thaq nail daoq juq bhai gov ha nail bhai ge nail ngaol. <sup>16</sup> Lovmav lovyal bhai ga ail-a nail neq, niailhai ngaol. Miqyail nail daoq ya gaiq-u phao, teevq pov taivq-ail lavqkhiq tsail nail lavqkhoel nee hav bhoel-a nail tsaol-aq bhai ge movq nail ngaol. <sup>17</sup> Thailhai ngaol-aq, aqyu juq daoqtsail maq kha ivq ail-a nail ngel-i mail, teevq yanq maq ngel nail neq, maq doevq nia-ail. Daoq al daoq bhaqda nee, haq nail aq nail pha q khi mail khoeq nail jiovq nail pha q kev lee-u phao, aqyu juq teevq pov taivq-ail khaonq ha

gai-aivq nail ngaol. <sup>18</sup> Tsaol-aq teevq pav ganav juq neq, aqgoe goeyal bhai ga ail-a nail aqiq khe-ai dul nail ngaol. Aqyu juq neq, Miqyail nail daoq ya gaiq-a nail juq ngaol. <sup>19</sup> Thailhai ngaol-aoq, miltsaq kovtavq bhai jaol-u phao, khaoqlaol nail pha, phul heel ildaoq maoqgaiq bhai lavqkhiq tsail nail pha khi, yaoq juq yaoq bhai neekhaol jiav nail pha neq, daoq al daoq bhai uvthaiq-ai thaq nail ngel-i mail, aqheeq maq heeq lee nia nail bhai, ge movq nail ngaol. <sup>20</sup> Thailhai ngaol-aoq, tsaol-aq teevq pav ganav juq neq, miltsaq mil meeq bhai ga ail-a nail aqiq khe-ai dul nail ngaol. Miqyail nail daoq ya gaiq khi hav bhoel-a nail ngel-i mail, aqheeq hail tsel bhoil, kovq tsel bhoil, teevq yal bhoil heeq lee-a nail tsaol-aq bhai ge nail ngaol” dai, ge bhiq-a nail ngaol.

*Phalmanq tovq nail ganl daoqma uqhuq daoq*

<sup>21</sup> Yeiqsul aqyu juq bhai gaoq ge bhiq-a nail: “Phalmanq tovq khi phee qdeeli mail movq tsaol-ai naol lai. Maq ngel haq neq, jiovtsiq iqgovq bhai tsiq tha-ai naol lai. Phalmanq tovq khi, daqmoe bha tsiq thaq nail, maq ngel-ail lai. <sup>22</sup> Khal oil tsail-ai thaq nail yaoq pha yaoq-ao nee bhaqlaoq kheq dai dov lal nail ngaol. Yu bhai maq bhi heeq kivq nail pha iqsanl, phaodaiq lavq nail ngaol. <sup>23</sup> Naqkhaol khal covq nail tsaol-aq, naldaiq yaoq” dai, ge bhiq-a nail ngaol.

<sup>24</sup> Yeiqsul aqyu juq bhai gaoq ge bhiq-a nail: “Nuljuq-i mail khal ya gaiq nail pha bhai yaolphaol yaoq. Nuljuq yu bhai phaiq bhiq hav bhiq-a nail khe-ai, nuljuq bhai iqsanl phaiq kovq

hav kovq lavq nail nee ovqtavq, al jaiq iqsanl bivq lavq nail ngaol. <sup>25</sup> Khul khi mail dai ngal-aq neq, jiav nail tsaol-aq bhai gaoq bivq laoq nail ngaol. Maq jiav nail tsaol-aq bhai, aqyu juq-i mail khal jiav nail juq bhai, oil dov gil nail ngaol” dai, ge bhiq-a nail ngaol.

*Aqiq doevq dov lal-a nail ganl daoqma uqhuq daoq*

<sup>26</sup> Yeiqsul niailhai gaoq ge nail: “Miqyail Milkhaoq neq, niailhai dul nail ngaol. Tsaol-aq teevq gaq daiyal bhai aqiq haiq-a nail ngaol. <sup>27</sup> Nvq kivq kivq lee haq neq, iqthaiq, bhaq lal haq neq, thul thul-ail jaol-u phao, aqiq al aqjiiv jiiv lal eeq lal thailthaiq nail ngaol. Thailhai ngaol-aq, aqiq al khalhai khi aqjiiv jiiv lal eeq lal nail bhai aivq maq heeq nia-aail. <sup>28</sup> Miltsaq bhaqda nee, gov meeq lal nail ngaol. Iqmoeq gov bhoiq gov dov dov lal khi, gov nail nail lee gaq-u phao, gov nail mal lal khi, ga govq-aail nail ngaol. <sup>29</sup> Gov mi lal-u phao, tsaol-aq al gaq gaiqaoq oil khi, gov gaiq nail ngaol. Khul khi mail dai ngal-aq, gov gaiq nail yanq tsaq lal-aq nail ngaol” dai, ge bhiq-a nail ngaol.

*Gaoqpavq aqneev nail ganl daoqma uqhuq daoq*

<sup>30</sup> Yeiqsul gaoq ge nail: “Miqyail Milkhaoq bhai khul pha q nee tsiqceiv daiq heeq meeq. Daoqma uqhuq daoq khul pha q bhai juq khi, ge daiq bhiq heeq. <sup>31</sup> Miqyail Milkhaoq neq, gaoqpavq nail aqneev khe-ai dul nail ngaol. Gaoqpavq aqneev al bhai miltsaq kovtavq bhai haiq-u phao, aqiq iqsanl nail lavqkhoel nee yu nee maqtsil nil nail

phaq, pevq nail ngaol. <sup>32</sup> Thailhai ngaol-aoq, doevq lal khi moe lal-u phao, heeqlaog gaogjal iqsanl nee maqtsil eeq nail ngaol. Lavqmeiv meiv lee khi eeq lal-u phao, nqtavq phao bhail nail keivq-avq juq aqhaiq bhai aqkheel kheel lee nail ngaol” dai, ge bhiq-a nail ngaol.

*Yeiqsul daoqma uqhuq daoq yuq-a nail ganl*

<sup>33</sup> Aqyu juq gov heeq nia nail khe-ai taivq-ail, Yeiqsul alheel nail daoqma uqhuq daoq maodai yuq yuq-ail, aqyu juq bhai Miqyail nail daoq cavq bhiq cov bhiq-a nail ngaol. <sup>34</sup> Daoqma uqhuq daoq nee maq ngel nail neq, aivq aqyu juq bhai maq cavq maq cov bhiq-al. Thailhai ngaol-aoq, aivq nail yaqlaol juq taivq-ail jaol-u phao, ganl al iqsanl mail aqyu juq bhai ge daiq bhiq-a nail ngaol.

*Yeiqsul lilmoel bhai bhiq naq lai-a nail ganl*

<sup>35</sup> Aq-u n-gaol, nqkivq kivq lee-u phao, “Ngaqkha a phao lelkhel bha ceiv ail bhel” dai, Yeiqsul aivq nail yaqlaol juq bhai ge bhiq-a nail ngaol. <sup>36</sup> Aqyu juq tsaol-aq munl munl ma nee pav-ail khi, aivq jaoldeel-nvq thaq nail laovq al laovq nee mail yaqlaol juq aivq bhai hel-aivq-a nail ngaol. Laovq yaoq juq yaoq iqsanl, aqyu juq nee mail ail-a nail ngaol. <sup>37</sup> Aq-u phao, lilmoel lil ma bhoe lal khi, ulcuvq eelkhaol thaog deede nail ngel-i mail, laovq lavqkhoel bhai ulcuvq bhee lal thailthaiq nail ngaol. <sup>38</sup> Yeiqsul neq, laovq nail daoqthaog phao oiqgoiq goiq khi iqthaiq kov-ai thaq nail ngaol. Yaqlaol juq aivq bhai lav noe q khi, ge bhiq-a nail: “Saqlaq-ol, nvjuq ga nevq heivq gil nail kev lal-aivq nail



ngaol. Naoq bhai neq, khaog maq laol-ail lai<sup>q</sup> dai, ge bhiq-a nail ngaol.

<sup>39</sup> Yeiqsul thul lal khi, lilmoel bhai “Aqtsi tsu dai jaol yaoq” dai, khaq khi, eelkhaol bhai naq lai yaoq dai, ge bhiq-u phao, lilmoel lil ma bhoel nail naq lai khi, aqtsi tsu dai pevq ail-a nail ngaol.

<sup>40</sup> A bhai nee ngal-aq, Yeiqsul yaqlaol juq bhai ge bhiq-a nail: “Khul khi mail nuljuq thoiq dai dai-ail geesil nail-aiq. Neema thaqtsaol nail neema maq aol-ail lai<sup>q</sup>” dai, aqyu juq bhai naldaiq-a nail ngaol.

<sup>41</sup> Aq-u phao, aqyu juq geesil deedee lal bhiq khi, teevq gaq nee teevq gaq ge nail: “Tsaol-aq thoil gaq khalheel nail tsaol-aq ngel-ail. Lilmoel khi eelkhaol iqsanl aivq nail daoq naldaiq-il” dai, ge nail ngaol.

## 5

*Neivq aol nail Gaqdaqalal tsaol-aq teevq gaq bhai bhi meeq lai-a nail ganl*

<sup>1</sup> A bhai nee ngal-aq, aqyu juq ngaqkha a phao lelkhel bha jiaiv nail Gaqdaqalal milkhaoq bhai ail kev-a nail ngaol. <sup>2</sup> Yeiqsul laovq nee mail dov lal-u phao, neivq aqavq aol nail tsaol-aq teevq gaq teevq pov taivq-ail luqdaol nee dov lee khi, Yeiqsul bhai thaoqphuq lee-a nail ngaol.

<sup>3</sup> Tsaol-aq al gaq luqdaol bhai taivq-ail jaol nail ngaol. Tsaol-aq teevq gaq iqsanl, aivq bhai maq pheethaiq nia-ail. Hailcav-i mail pheethaiq khi ngaol-aog, maq pheethaiq nia-ail. <sup>4</sup> Yu aivq bhai hailcav oil khi aqkhil aqlavq bhai mee nia pov pheethaiq khi ngaol-aog, aivq nail aqlavq bhai

pheethaiq-ai thaq nail hailcav he ceiv khi, aivq nail aqkhill bhai pheethaiq-ai thaq nail hailcav iqsanl ngaog keivq nail ngaol. Aivq gaq kav deede kxi, tsaol-aq teevq gaq iqsanl aivq bhai maq lav goil nia-ail. <sup>5</sup> Nqkiv n-gaol maqkhaiq, luqdaol bhai khi mail gaogjaog doi dai gul gul-ail tsaol khi, lovmav-i mail aivq nail aqmaol bhai khaog pav khaog sav nail ngaol.

<sup>6</sup> Yeiqsul eqyal bha lal thailthaiq nail bhai, tsaol-aq al gaq ya moel-u phao, Yeiqsul nail sivatvq bhai tsaol-aivq khi, uqhuq thaog-a nail ngaol. <sup>7</sup> Aivq mailma-ail gul gul-ail: "Iqsanl nail kovtavq bhai eeq jaiq heel jaiq nail Miqyail nail Yagyov Yeiqsul-ol, naol ngaq bhai khalhai tavq nail-aiq. Naol ngaq bhai thaq khoeq thaq jiovg lavq dei-eiq dai, Miqyail nail sivatvq bhai ngal naog bhai hal naol" dai, ge bhig-a nail ngaol. <sup>8</sup> Khul khi mail alhai ge nail dai ngal-aq neq, neivq aqavq al, aivq nail lavqkxoel nee dov ail yaoq dai, Yeiqsul aivq bhai ge bhig-a nail ngaol.

<sup>9</sup> "Naol khul dai mil-ai thaq nail-aiq" dai, Yeiqsul aivq bhai naldaiq-u phao, "Nvjuq mao-ail mao nail ngel-i mail, mao-ail mao nail genl dev nail munl munl ma dai, khul nail ngaol" dai, ge kovq bhig-a nail ngaol. <sup>10</sup> "Milkhaog niil khaog nail lavqkxoel nee nvjuq bhai thaq the dov lavq dei-eiq" dai, aqyu juq Yeiqsul bhai hal deede nail ngaol.

<sup>11</sup> Gaogjaog al jaog nail beivkhaiq bhai wavq mao deede nail teevq munl gavjaq thailthaiq nail ngaol. <sup>12</sup> "Wavq al juq nail lavqkxoel, nvjuq bhai bhi aol ail lavq yaoq" dai, neivq aqavq al

juq Yeiqsul bhai hal-a nail ngaol. <sup>13</sup> Aq-u phao, Yeiqsul neivq al juq bhai bhi dov ail-a nail ngaol. Neivq aqcavq al juq dov ail khi, wavq al juq nail lavqkhoel bhai aol ail-a nail ngaol. Wavq al juq beivkhaiq bhai tsao khal-aivq khi, ngaqkha bhai ga puvq heivq gil ail-a nail ngaol. Wavq al juq neq, nvq hinl maol niidai bhee nail ngaol.

<sup>14</sup> Wavq bhai lovq nail juq neq, tsaolq kol-aivq khi, meengq juq, julgu juq bhai ganl al ge gaiq bhiq lai-a nail ngaol. Alheel ngel-i mail, pevq lal-a nail ganl al bhai heldaiq duq nail dai khi, tsaol-aq maodai lal-a nail ngaol. <sup>15</sup> Aqyu juq, Yeiqsul jaol nail bha lal kev-u phao, neivq aol daiq-a nail tsaol-aq al gaq, aqgaq aqdoi doi khi jaoldeel-nvq thaq nail bhai ya moel-a nail ngaol. Aivq neema aqlil khe-ai pevq kovq lal-a nail bhai iqsanl, ya moel-a nail ngel-i mail, geesil deedeel lal bhiq-a nail ngaol. <sup>16</sup> Iqmoeq-u nee ganl al bhai khal ya moel-a nail tsaol-aq juq, neivq aol daiq-a nail tsaol-aq al gaq khalhai pevq lal-a nail ganl khi mail, wavq al juq khalhai pevq ail-a nail ganl, yu bhai ge daiq bhiq-a nail ngaol. <sup>17</sup> “Nvjuq nail milkhaoq lavqkhoel nee mail dov ail lavq yaoq” dai, aqyu juq Yeiqsul bhai hal-a nail ngaol.

<sup>18</sup> Yeiqsul laovq bhai aol ail-u phao, neivq aol daiq-a nail al gaq, “Naoq-ai nee mail bhi jaol lavq yaoq” dai, Yeiqsul bhai hal deedeel-a nail ngaol. <sup>19</sup> Thailhai ngaol-aq, Yeiqsul aivq bhai maq bhi jaol dai ge bhiq-a nail: “Naoq nail ilkhaol bha kovq ail khi, Heeqphaq Miqyail naoq bhai khadai gaoqhaq lavq-a nail ganl naoq nail jeq-e jaq-a bhai ge bhiq ail yaoq” dai, ge bhiq-a nail ngaol. <sup>20</sup> A bhai nee ngal-aq, aivq kovq

ail khi, Yeiqsul aivq bhai khadai tsojao-ai lavq-a nail ganl, Deiqgaqbhaollil milkhaoq doi dai ge bhiq-a nail ngel-i mail, tsaol-aq iqsanl mail noeq-u maq dov dai, pevq ail-a nail ngaol.

*Yaqillu nail yaqmiq khi mail Yeiqsul nail phailkhaoq bhai thoiqtsi-a nail ganl*

<sup>21</sup> Yeiqsul laovq jeeq khi nia phao lelkhel bhai gaoq ceiv lal-a nail ngaol. Aivq ngaqkha daolbhaq bhai jaol-u phao, tsaol-aq munl munl ma aivq jaol nail bha jil lal-a nail ngaol. <sup>22</sup> Aq-u phao, Yaqillu dai mil-ai thaq nail gaq Yeiqsul jaol nail bha lal-a nail ngaol. Aivq neq, uqhuq thaog nail ilkhaol bhai heldaiq nail aqivq teevq gaq ngaol. Aivq Yeiqsul bhai ya moel-u phao, aivq nail aqkhiil daoqthaog bhai peevqceevq kovdoiq doiq nail lavqkhoel nee gaolbeiv khi uqhuq thaog-a nail ngaol. <sup>23</sup> Aivq Yeiqsul bhai ge bhiq-a nail: “Ngaq nail yaqmiq sil-aiq nail ngaol. Aivq meeq lai khi ya doevq dai, naol aivq nail kovtavq bhai aqlavq bavq dav lee lavq yaoq” dai, hal deedee nail ngaol. <sup>24</sup> Alheel ngel-i mail, Yaqillu nail haoqnao Yeiqsul tsaotherl-aivq-a nail ngaol.

Yeiqsul nail haoqnao tsaotherl jaol nail tsaol-aq mao deedee nail ngel-i mail, aivq nail teevq jaoq tsaol-aq maq thaog pav tsaol dai, tsaol-ai-nvq thaq nail ngaol. <sup>25</sup> Aq-u phao, tsel-nvq kovq bhee dai, aqsivq dov dov-ail nal thailthaiq nail yaqmai-aq teevq gaq jaol nail ngaol. <sup>26</sup> Jagaq coev nail saqlaq maodai gaq-i mail bhi lav sav daiq thaq nail ngaol. Aivq khal jiaiv nail phaog iqsanl mail gaoq jaq khi lav sav khi ngaol-aog,

maq meeḡ lai bhiq-a nail nee ovqtavḡ, gaoḡ nal jaiḡ lal bhiq thaḡ nail ngaol. <sup>27</sup> Aivḡ Yeiqsul nail ganl ya gaiḡ daiḡ-a nail ngaol. Alheel ngel-i mail, tsaol-aḡ munl munl ma nail gaoltsi bhai aivḡ aol ail khi, Yeiqsul nail haoḡnaol phao nee, Yeiqsul nail phailkhaḡ phaildaoḡ bhai thoiḡtsi ail-a nail ngaol. <sup>28</sup> “Aivḡ nail phailkhaḡ phaildaoḡ bhai taivḡ-ail ngal ya thoiḡtsi khi ngaol-aḡ, ngaḡ nail nalgoel niil meeḡ lai naol” dai, yaḡmai-aḡ al gaḡ, aivḡ bhai aivḡ ge nail ngaol. <sup>29</sup> Yeiqsul nail phailkhaḡ phaildaoḡ bhai thoiḡtsi-a ngal-aḡ, teevḡ pov taivḡ-ail, aivḡ aḡsivḡ dov dov-ail nal thailthaiḡ nail nalgoel al teevḡ pov taivḡ-ail tsil lai khi, “Ngal meeḡ lai-aḡ nial” dai, aivḡ bhai aivḡ heeḡ nia-a nail ngaol.

<sup>30</sup> “Ngaḡ nail lavḡkhoel khe bhaḡaoḡ dov ail-aḡ nial” dai, Yeiqsul heeḡ nia nail ngel-i mail, aivḡ tsaol-aḡ munl munl ma bhai haoḡnaol naolkovḡ kovḡ daiḡ khi, “Ngaḡ nail phailkhaḡ bhai khaḡ sil gaḡ thoiḡtsi-a nail-aiḡ” dai, naldaiḡ bhiq-a nail ngaol.

<sup>31</sup> “Tsaol-aḡ munl munl ma juḡ, naoḡ bhai thaḡḡ gaiḡ thaḡḡ tsi thailthaiḡ khi ngaol-aḡ, ngaḡ bhai khaḡ sil gaḡ thaḡḡ tsi-a nail-aiḡ dai, naol naldaiḡ nail laiḡ” dai, aivḡ nail yaḡlaol juḡ Yeiqsul bhai ge bhiq-a nail ngaol.

<sup>32</sup> Thailhai ngaol-aḡ, aivḡ nail phailkhaḡ bhai thoiḡtsi-a nail gaḡ bhai ya moel dai, Yeiqsul neḡ, jaoḡlaol jaoḡlaol dai, heldaiḡ-a nail ngaol. <sup>33</sup> Yaḡmai-aḡ al gaḡ aivḡ nail aḡmaol khalhai pevḡ lal-a nail bhai heeḡ nia-a nail ngel-i mail, geesil khi aḡjuḡ juḡ juḡ-ail aḡyu juḡ nail lavḡkhoel nee dov lal khi, Yeiqsul nail

aqkhill daoqthaoq bhai peevqceevq kovdoi q doiq nail lavqkhoel nee gaolbeiv khi, ganl iqsanl mail daolcoev dai, ge dov bhiq gil-a nail ngaol. <sup>34</sup> “Yaqmiq-ol, naol ngaq bhai neema thaqtsaol nail ngel-i mail, meeq lai-a nail ngaol. Neesal-ovq nail lavqkhoel nee kovq ail yaoq. Naoq nail nalgoel meeq lai-aog nail ngaol” dai, Yeiqsul aivq bhai ge bhiq-a nail ngaol.

<sup>35</sup> Yeiqsul alhai ge thailthaiq-u phao, Yaqillu nail ilkhaol nee tsaol-aq teevq juq lal khi, “Naoq nail yaqmiq sil-aog nail ngaol. Saqlaq bhai thaq gaoq lav suqsaq” dai, Yaqillu bhai ge gaiq bhiq lal-a nail ngaol.

<sup>36</sup> Tsaol-aq al juq alhai ge khi ngaol-aog, Yeiqsul neq, Yaqillu bhai: “Khaog thaq laol. Ngaq bhai neema thaqtsaol yaoq” dai, ge bhiq-a nail ngaol.

<sup>37</sup> A bhai nee ngal-aq, Bheiqtuvluy, Yaqkov, Yaqkov nail jaqbheq Yaolhaq, aqyu juq maq ngel nail neq, yu teevq gaq bhai iqsanl aivq nail haoqnao maq bhi tsaohel lavq dai, bhi jaol ail ceevq-a nail ngaol. <sup>38</sup> Yeiqsul uqhuq thaog nail ilkhaol bhai heldaiq nail aqivq gaq pevq nail Yaqillu nail ilkhaol bhai ail kev-u phao, nioilkhaoq khaog khaog-aail suqsaq thailthaiq nail bhai ya moel-a nail ngaol. <sup>39</sup> Yeiqsul ilkhaol lavqkhoel bhai aol lai khi, aqyu juq bhai ge bhiq-a nail: “Nuljuq khul khi mail nioilkhaoq khaog khaog-aail suqsaq thailthaiq nail-aig. Yaq niil gaq sil-a nail maq ngel-aail. Iqthaiq kov-ai thaq nail niil” dai, ge bhiq-a nail ngaol. <sup>40</sup> Thailhai ngaol-aog, aqyu juq Yeiqsul bhai helsil nail ngaol.

Yeiqsul aqyu juq bhai the dov khi, yaq al gaq nail aqbhu aqma khi aivq-i mail hel laivq-a nail al hail gaq bhai hevq khi, yaq al gaq bavq thaq-ai thaq nail bhai aol lai-a nail ngaol. <sup>41</sup> A bhai nee ngal-aq, Yeiqsul yaqmiq al gaq nail aqlavq bhai nieivq thaiq khi, “Daqlil daq gulmil” dai, ge bhiq-a nail ngaol. Daoqceevq neq, “Yaqmiq-ol, thul yaoq” dai, ge movq nail ngaol. <sup>42</sup> Aq-u phao, yaqmiq al gaq teevq pov taivq-ail thul lal khi gailkhaol tsaol-aivq-a nail ngaol. Aivq nail aqkovq neq, tsel-nvq kovq bhee nail ngaol. Alhai pevq lal-a nail bhai ya moel-u phao, tsaol-aq al juq noeq-u maq dov dai, pevq deede ail-a nail ngaol. <sup>43</sup> “Ganl niil teevq gaq bhai iqsanl thaq ge bhiq dei-eiq” dai, Yeiqsul aqyu juq bhai daoq aqkav kav dai bivq-a nail nee ovqtavq, “Yaqmiq niil gaq bhai aq bhi jaq yaoq” dai iqsanl, aqyu juq bhai ge bhiq-a nail ngaol.

## 6

### *Naqsaqlail meenq yaq Yeiqsul bhai, maq hav-a nail ganl*

<sup>1</sup> Yeiqsul a bhai nee dov ail khi, aivq nail jaolkhaoq jaollaoq bha kovq ail-a nail ngaol. Aivq nail yaqlaol juq iqsanl, aivq nee mail lai-a nail ngaol. <sup>2</sup> Jaol n n-gaol kev lal-u phao, aivq uqhuq thaoq nail ilkhaol lavqkhoel bhai cavq bhiq cov bhiq-a nail ngaol. Ya gaiq-a nail tsaol-aq juq, noeq-u maq dov dai, pevq-ail khi ge nail: “Tsaol-aq niil gaq niil heel pha, khaq bha khe ya thaq nail meeq. Aivq-i mail ya-ai thaq nail neenoeq neekha neq, khalheel nail neenoeq

neekha meeq. Niidai dai-ail bhaqaoq eeq deedee nail pha q khalhai khi nl dol lavq nia nail meeq. <sup>3</sup> Aivq neq, Maqlil nail yaqyov aqbhaol thoiq nia nail al gaq maq ngel-ail laiq. Yaqkov, Yaolsai, Yuldav khi mail Silmoq aqyu juq mailnail nail aqivq ivqsaq gaq maq ngel-ail laiq. Aivq nail nailma juq iqsanl, ngadao juq nee mail jaol nail maq ngel-ail laiq” dai, ge ge-ail aivq bhaqda nee, neema cov nail ngaol.

<sup>4</sup> Yeiqsul aqyu juq bhai ge bhiq-a nail: “Miqyail nail haqbhoil gedan nail tsaol-aq bhai, yaoq gaq yaoq-ao nee mail thaqeeq nail ngaol. Thailhai ngaol-aq, aivq nail jaolkhaq jaollaog, aivq nail aqivq jaqbheq juq khi mail, aivq nail ilkhaol khe jaol nail juq neq, aivq bhai maq thaqeeq-ail” dai, ge bhiq-a nail ngaol. <sup>5</sup> Nal nail goel nail tsaol-aq mee nia gaq nail kovtavq bhai aqlavq bavq dav khi bhi meeq lai-a nail maq ngel nail neq, a bhai neq, bhaqaoq eeq nail pha q teevq pha q-ail maq nl nia-al. <sup>6</sup> Aqyu juq neema maq thaqtsaol nail ngel-i mail, Yeiqsul noe q-u maq dov dai, pevq-ail bhiq-a nail ngaol.

A bhai nee ngal-aq, aivq teevq gu nee teevq gu doi dai ail khi, cavq bhiq cov bhiq ail-a nail ngaol.

*Gaqkhoel tsel-nvq gaq bhai Yeiqsul khoel gai-aivq-a nail ganl*

<sup>7</sup> Aq-u phao, aivq gaqkhoel tsel-nvq gaq bhai khul khi, nvq gaq teevq phao, nvq gaq teevq phao dai, khoel gai-aivq-a nail ngaol. Neivq aqcavq bhai the dov nia nail bhaqaoq iqsanl, aqyu juq bhai bivq-a nail ngaol.



<sup>8</sup> Yeiqsul aqyu juq bhai daoq niailhai bivq-a nail ngaol: “Gailphail nail haq bhoil, joiqniovq teevq khaoq maq ngel haq neq, teevq pha q iqsanl tha q oil-aivq. Phalthaoq iqsanl, khaqmul iqsanl, tha q oil-aivq. Jiovpavq bhai phul tha q oil bhoel-aivq. <sup>9</sup> Saiqnaov tsa oq khi, phailkha oq teevq keiv taivq-ail doil-aivq dei-eiq” dai, ge bivq-a nail ngaol. <sup>10</sup> Aivq aqyu juq bhai gaoq ge bhiq-a nail: “Nuljuq ilkhaol teevq il bhai il dav dav-ail ga q ha q neq, jaol duq al dao bhai khal jaol-u kev dai, a bhai jaol yaoq. <sup>11</sup> Kha q bhai jaol nail tsaol-aq maqkhaiq, nuljuq bhai maq hav dai, nuljuq nail daoq maq naldaiq ha q neq, nuljuq a bhai nee dov ail-u phao, aqyu juq nail lai q nail tsa nail pha q bhi dov lal khi salkhil pevq dai, nuljuq nail aqkhill pavq-uvq khe khaqlail naoq khal-ail ceevq yaoq” dai, aqyu juq bhai ge bhiq-a nail ngaol.

<sup>12</sup> A bhai nee ngal-aq, aqyu juq dov ail khi, “Nuljuq yovqgavq nail oeqbal yovqgavq noeq pov yaoq” dai, daoq cavq daoq cov cov ail-a nail ngaol. <sup>13</sup> Aqyu juq neivq maodai bhai the dov khi, nal nail tsaol-aq maodai bhai, aqtseel leivq bhiq khi lav meeq bhiq-a nail ngaol.

### *Ulcuvq saol bhiq nail Yaolhaq sil-a nail ganl*

<sup>14</sup> Aq-u phao, Yeiqsul nail ganl gaiq doi-ail thailthaiq nail bhai Gaqliqlail milkha oq bhai uvthaiq nail heeqpha q Heiqlol Aqgilpav ya gaiq-a nail ngaol. Tsaol-aq teevq pav ganav juq ge nail: “Ulcuvq saol bhiq nail Yaolhaq gaoq doevq kovq lal-a oq tha q nail niil. Alheel ngel-i mail,

aivq bhaqaoq eeq deedee nail al juq nl dol lavq nia nail niil” dai, ge nail ngaol.

<sup>15</sup> Teevq pav ganav juq neq, aivq bhai, “Eillilya niil” dai, ge khi, teevq pav gaq nav juq neq: “Aivq neq, aq-u Miqyail nail haqbhoil gedan nail juq khe-ai dul nail, Miqyail nail haqbhoil gedan nail teevq gaq niil” dai, ge nail ngaol.

<sup>16</sup> Yeiqsul nail ganl al, Heiqlol ya gaiq-u phao, “Aivq neq, ulcuvq saol bhiq nail Yaolhaq al gaq nial. Aivq nail uqhuq, ngaq-i mail bhi tsilceiv khi ngaol-aog, gaoq doevq kovq lal thaq nail niil” dai, ge bhiq-a nail ngaol.

<sup>17</sup> Ganl al neq, niailhai ngaol. Jel lal-u phao, Heiqlol neq, yovqgavq nail jaqbheq Pillilpuv nail khaqma Heiqloldil bhai hevq-a nail ngaol. Yaqmai-aq al gaq bhaqda nee, Yaolhaq bhai bhi nieivq-ail khi thaonq bhai bhi laol nail dai khi, Heiqlol daoq bivq-a nail ngaol. <sup>18</sup> Khul khi mail dai ngal-aq neq, “Naol naoq nail jaqbheq nail khaqma bhai hevq nail neq, maq tsaq-ail” dai, Yaolhaq Heiqlol bhai ge bhiq-a nail ngaol. <sup>19</sup> Alheel ngel-i mail, Heiqloldil Yaolhaq bhai neejlav jlav deedee khi, heivq movq-ail bhiq nail ngaol. Thailhai ngaol-aog, maq heivq nia haq-al. <sup>20</sup> Khul khi mail dai ngal-aq neq, Yaolhaq neq, tsaq nail daol nail khi mail meeq nail haol nail tsaol-aq ngaol dai, Heiqlol heeq nia nail ngel-i mail, Yaolhaq bhai geesil nail lavqkhoel nee aqmeeq-ai heldaiq phail bhiq-a nail ngaol. Heiqlol neq, Yaolhaq cavq nail cov nail daoq bhai ya gaiq-u phao, neema maq sal khi ngaol-aog, naldaiq movq-ai bhiq nail ngaol.

21 Daoq loi loi lal-u phao, Heiqloldil Yaolhaq bhai heivq nail eivq lal bhiq-a nail ngaol. Al neq, Heiqlol doevq lee-a nail aqn bhai noeq kev khi bhaoqaiq lav sav nail aqn bhai ngaol. Aq-u n-gaol, aivq nail kov-uvq khe jaol nail eeq nail heel nail juq, genl dev yaq teevq hinl gaq bhai uvthaiq nail juq khi mail, Gaqliqlail milkhaoq lavqkhoel khe jaol nail maivphaoq nal moel jiaiv nail aqivq aqtsu juq bhai, Heiqlol aoqbhaol laol bhiq-a nail ngaol. 22 Heiqloldil nail yaqmiq aol lal khi, bhoeloe nioi daiq bhiq-a nail bhai, Heiqlol khi mail aivq nail daq-i al juq iqsanl neekhaol sil deede nail ngaol.

Alheel ngel-i mail, Heiqlol yaqmiq al gaq bhai ge bhiq-a nail: “Naol khal hal movq nail pha q hal yaoq. Ngal naoq bhai bivq naol” dai, ge bhiq-a nail ngaol. 23 Al ovqtavq, “Naol khal hal nail khe-ai, ngaq nail milkhaoq teevq pav hal khi ngaol-aoq, naoq bhai bivq naol” dai, khanq khanq-ail, ge bhiq-a nail ngaol.

24 Aq-u phao, yaqmiq al gaq dov ail khi, “Ngal khul pha q hal heeq” dai, aivq nail aqma bhai naldaiq ail-a nail ngaol.

Aqma gaq neq, “Ulcuvq saol bhiq nail Yaolhaq nail uqhuq hal yaoq” dai, ge kovq bhiq-a nail ngaol.

25 Yaqmiq al gaq Heiqlol jaol nail bha lavqtsail mail gaq tsaq kol leevq khi ge nail: “Ulcuvq saol bhiq nail Yaolhaq nail uqhuq, thailphail phail ma bhai oil bhoel khi, niil aq-il lavqtsail mail tsil lavq nail bhai, oil movq-ail nial” dai, hal-a nail ngaol.

<sup>26</sup> Heiq̄lol noeq̄haq̄ deedee khi ngaol-aog, aivq̄-i mail khanq̄-ai thaq̄ nail daoq̄ bhaq̄da nee maq̄khaiq̄, aivq̄ nee mail jaol khi jaq̄ thailthaiq̄ nail daq̄-i juq̄ bhaq̄da nee maq̄khaiq̄, yaq̄miq̄ al gaq̄ khal ge nail khe-ai maq̄ nl bhiq̄-ail, khul maq̄ khi nia-ail. <sup>27</sup> Alheel ngel-i mail, a bhai lovḡ nail genl dev nail teevq̄ gaq̄ bhai, lavq̄tsail mail khoel gai-aivq̄ khi, Yaolhaq̄ nail uq̄huq̄ bhi oil ail nail haq̄bhoil daoq̄ bivq̄-a nail ngaol. Genl dev nail al gaq̄ thaonq̄ bhai aol ail khi Yaolhaq̄ nail uq̄huq̄ dev ceiv ail-a nail ngaol. <sup>28</sup> A bhai nee ngal-aq̄, uq̄huq̄ al thailphail phail ma bhai oil bhoel khi, yaq̄miq̄ al gaq̄ bhai tsiq̄ bhiq̄-a nail ngaol. Yaq̄miq̄ al gaq̄ iq̄sanl, aivq̄ nail aq̄ma bhai tsiq̄ bhiq̄ ail-a nail ngaol. <sup>29</sup> Yaolhaq̄ nail yaqlaol juq̄ ganl al ya gaiq̄-u phao, aq̄yu juq̄ lal khi, Yaolhaq̄ nail aq̄maol bhai luq̄daol bha bavq̄ duq̄ ail-a nail ngaol.

*Yeiq̄sul tsaol-aq̄ ngaq̄ hinl gaq̄ bhai bhi jaq̄-a nail ganl*

<sup>30</sup> Yeiq̄sul-i mail khoel gai-aivq̄-a nail gaq̄khoel al juq̄ neq̄, aivq̄ jaol nail bha kovq̄ jil lal khi, aq̄yu juq̄-i mail khal nl khal hal, khal cavq̄ khal cov-a nail iq̄sanl mail, Yeiq̄sul bhai ge daiq̄ bhiq̄ gil-a nail ngaol. <sup>31</sup> “Nuljuq̄ lal yaoq̄. Tsaol-aq̄ maq̄ jaol nail bha, gaq̄naq̄ naq̄ ail bhel” dai, Yeiq̄sul aq̄yu juq̄ bhai ge bhiq̄-a nail ngaol. Khul khi mail dai ngal-aq̄ neq̄, tsaol-aq̄ maodai ail thail lal thailthaiq̄ nail ngel-i mail, aq̄yu juq̄ aog jaq̄ nail iq̄sanl, maq̄ dan-ail.

<sup>32</sup> Alheel ngel-i mail, aq̄yu juq̄ taivq̄-ail laovq̄ jeeq̄ khi, tsaol-aq̄ maq̄ jaol nail bha ail-a nail

ngaol. <sup>33</sup> Thailhai ngaol-aq, aqyu juq dov ail nail bhai tsaol-aq maodai ya moel khi, aqyu juq bhai heldaiq duq-a nail ngaol. Alheel ngel-i mail, meenq yaoq meenq yaoq bhai jaol nail tsaol-aq juq iqsanl, aqyu juq nail iqmoeq daoltavq phao nee tsaol khi, Yeiqsul khi mail gaqkhoel juq nail iqmoeq tsaol kel laivq khi jaol-a nail ngaol.

<sup>34</sup> Yeiqsul laovq nee mail dov lal-u phao, tsaol-aq munl munl ma bhai ya moel-a nail ngaol. Aqyu juq neq, heldaiq phail nail gaq maq jaol nail yaol khe-ai dul nail ngel-i mail, Yeiqsul aqyu juq bhai gaoqhaq nail lavqkhoel nee, ganl mee nia pha q cavq bhiq cov bhiq-a nail ngaol.

<sup>35</sup> Kivq hail hail lee-u phao, yaqlaol juq Yeiqsul jaol nail bha lal khi ge nail: “Niilniai neq, tsaol-aq maq jaol nail haqtsoiq haqyal niil. Nqkivq iqsanl, kivq lee-aiq nial. <sup>36</sup> Alheel ngel-i mail, tsaol-aq niil juq bhai phaiq kovq bhiq khi, aqjail bhai jiav nail julgu juq bhai, jaqjaq daoldaol bhi halpov jaq ail nail maq tsaq-ail lai q” dai, ge bhiq-a nail ngaol.

<sup>37</sup> “Nuljuq aqyu juq bhai bhi jaq yaoq” dai, Yeiqsul aqyu juq bhai ge bhiq-u phao, yaqlaol juq ge nail: “Nvjuq khaqmul nvq yal bavq nail aqphoiq ul ail khi, aqyu juq bhai ya bhi jaq nail lai q” dai, aqyu juq ge kovq bhiq-a nail ngaol.

<sup>38</sup> “Nuljuq khaqmul khadai heeq aol nail-aiq. Heldaiq ail yaoq” dai, Yeiqsul ge bhiq-a nail ngaol.

Aqyu juq heldaiq ail khi, “Khaqmul ngaq heeq khi delgil nvq maol aol-ail nial” dai, ge kovq bhiq-a nail ngaol. <sup>39</sup> Tsaol-aq al juq iqsanl bhai daikhaoq aqsal bhai teevq munl teevq munl dai,

bhi jaoldeel nail haqbhoil, Yeiqsul yaqlaol juq bhai daoq bivq-a nail ngaol.

<sup>40</sup> Aq-u phao, tsaol-aq al juq teevq yal gaq teevq munl ngaq tsel gaq teevq munl dai, alhai munl munl khi jaoldeel-a nail ngaol. <sup>41</sup> A bhai nee ngal-aq, khaqmul al ngaq heeq khi mail delgil al nvq maol bhai, Yeiqsul oil khi, nqtavq phao gaollel khi, Miqyail bhai tsiqeeq-a nail ngaol. Aivq khaqmul al ngaoqpav khi yaqlaol juq bhai bivq khi, tsaol-aq munl munl ma bhai bhi bhoil bhiq-a nail ngaol. Delgil al nvq maol iqsanl, tsaol-aq iqsanl bhai bhi bhoil bhiq-a nail ngaol.

<sup>42</sup> Aqyu juq iqsanl mail teevq bov ya jaq-a nail ngaol. <sup>43</sup> Maq jaq gil-ail jaiq lal-a nail khaqmul khi mail delgil al juq bhai yaqlaol juq gov kovq daiq-u phao, pheeqdeel nee mail tsel-nvq deel bhee nail ngaol. <sup>44</sup> Jaq-a nail tsaol-aq juq yaqyov-aq taivq-ail ngaq hinl gaq niidai bhee nail ngaol.

*Yeiqsul ulcuvq kovtavq bhai gailkhaol tsao-a nail ganl*

<sup>45</sup> Aq-u phao, Yeiqsul neq, aivq nail yaqlaol juq bhai: “Nuljuq laovq jeeq khi, ngaqkha a phao lelkhel bha jlav nail Bheiqjeildaq meenq bhai ngaq nail iqmoeq nee ceiv ail yaoq” dai, ge bhiq-a nail ngaol. A bhai nee ngal-aq, Yeiqsul neq, tsaol-aq munl munl ma juq bhai bhi kovq ail-a nail ngaol. <sup>46</sup> Aivq tsaol-aq munl munl ma nee pav ail gaq khi, gaoqjaoq bha geeqlaoq hal lai nail dai, lai-a nail ngaol.

<sup>47</sup> Nqkivq kivq lee-u phao, laovq al laovq ngaqkha nail gaoltsi bhai ail kev-a nail ngaol. Yeiqsul neq, aivq teevq gaq taivq-ail ngaqkha

daolbhaq bhai jaol-ail ceevq-a nail ngaol. <sup>48</sup> Aivq nail yaqlaol juq lilmoel bhai tsiqdaq khi, laovq ya e nail bhaqda nee gaq doil doil deedee nail bhai, aivq ya moel-a nail ngaol. Yavphoil doil thao naqli hail lavq jaiq ail-u phao, Yeiqsul ulcuvq kovtavq bhai gailkhaol tsao tsao-ail, aqyu juq jaol nail bha lee-a nail ngaol. Aqyu juq bhai, aivq ail jel nail khi mail ngaol. <sup>49</sup> Aqyu juq Yeiqsul ulcuvq kovtavq bhai tsao nail bhai ya moel-u phao, teevq pha q ganav nail aqheel khul-il dai, noeq khi, gul deedee-a nail ngaol. <sup>50</sup> Khul khi mail dai ngal-aq neq, aqyu juq yaoq gaq yaoq-ao nee mail, aivq bhai moel khi geesil deedee lal bhiq-a nail ngaol. "Neema ivqdao dai, jaol yaoq. Ngal ngaol. Nuljuq tha q geesil" dai, Yeiqsul aqyu juq bhai teevq pov taivq-ail ge bhiq-a nail ngaol. <sup>51</sup> A bhai nee ngal-aq, aivq aqyu juq jeeq-nq tha q nail laovq bhai aol ail-u phao, lilmoel maq bho e dai naq lai-a nail ngaol. Yaqlaol juq teevq peivq-ail noeq-u maq dov dai, pevq ail-a nail ngaol. <sup>52</sup> Khul khi mail dai ngal-aq neq, tsaol-aq ngaq hinl gaq bhai bhi jaq-a nail ganl al iqsanl, aqyu juq maq noeq heeq maq noeq moel nia-ail. Aqyu juq neema aqgaol ngel-i mail ngaol.

*Geiqneiqsaqlail milkhaoq bhai jaol nail tsaol-aq bhai nalgoel lav meeq bhiq-a nail ganl*

<sup>53</sup> Aqyu juq ngaqkha a phao lelkhel bhai ceiv ail khi, Geiqneiqsaqlail milkhaoq bhai ail kev-u phao, laovq pheethaiq-ail ceevq-a nail ngaol. <sup>54</sup> Aqyu juq laovq nee mail dov ail-u phao, Yeiqsul niil dai, a bhai jaol nail tsaol-aq al juq, teevq pov taivq-ail heldai q heeq nia-a nail

ngaol. <sup>55</sup> Tsaol-aq al juq milkhaoq al khaoq doi dai, tsaol-aivq khi, Yeiqsul jaol naol dai, khal ge nail dao bhai nal nail goel nail tsaol-aq juq bhai, iqjial bheebhaoq nee bal lavq-a nail ngaol. <sup>56</sup> Aivq khal ail nail julgu bhai maqkhaiq, meenq bhai maqkhaiq, yalkhaoq yallaoq bhai maqkhaiq, yu jil lal duq bhai nal nail goel nail tsaol-aq bhai bavq thaq lal-a nail ngaol. “Naoq nail phaikhaoq phaildaoq bhai taivq-ail ngaol-aog, bhi thoiqtsi lavq yaoq” dai, nal nail tsaol-aq al juq Yeiqsul bhai hal-a nail ngaol. Khal thoiqtsi-a nail tsaol-aq iqsanl mail, meeq lai-a nail ngaol.

## 7

*Milnee uqnee nee cavq khal leevq-a nail aol-saolkovq nail ganl*

<sup>1</sup> Aq-u phao, Yeiqsulsaqlaiq meenq nee lee-a nail Phaqliqsail juq khi aoldaoq kovqdaoq cavq nail cov nail teevq pav ganav juq, Yeiqsul jaol nail bha jil lee-a nail ngaol. <sup>2</sup> Aivq nail yaqlaol teevq pav ganav juq aqlavq maq haol-ail aog jaq nail bhai, aqyu juq ya moel-a nail ngaol. Aqlavq maq haol nail dai, ge nail neq, aol jlav nail khe-ai, aqlavq maq tsiq nail bhai ge nail ngaol. <sup>3</sup> Phaqliqsail juq khi Yuldav nail tsaol-aq juq iqsanl, aqphiq aqbhal juq-i mail thaog khal leevq-a nail aolsaolkovq thaog thaog-ail, aqlavq maq tsiq haq neq, aog maq jaq-ail. <sup>4</sup> Leiv jlivq-ail khi kovq lal-u phao, aqlavq maq tsiq-u phao neq, aog maq jaq-ail. Al ovqtavq, maiqgaoq kovqlaol iqlaoq haqbhaoq juq bhai tsiq nail aolsaolkovq



khi, aol yaoq juq yaoq maodai aqyu juq thaoq nail ngaol.

<sup>5</sup> Aq-u phao, Phaqliqsail juq khi aoldaoq kovq-daoq cavq nail cov nail juq, Yeiqsul bhai naldaiq-a nail: “Khul khi mail naoq nail yaqlaol juq aqphiq aqbhal juq-i mail thaoq khal leevq-a nail aolsaolkovq maq thaoq nail-aiq. Khul khi mail, aqlavq maq haol-ail aoq jaq nail-aiq” dai, naldaiq-a nail ngaol. <sup>6</sup> Yeiqsul aqyu juq bhai ge bhiq-a nail: “Goiqbhaoq bhaoq nail tsaol-aq juq-ol, Ilsaqyal-i mail nuljuq nail ganl Miqyail nail haqbhoil gedan-ai thaq nail neq, tsaq deedee-ail nial. Aivq ge nail,

‘Tsaol-aq niil jeq-e  
niil jaq-a neq,  
moeqthaoq ngaq bhai  
ev khi ngaol-aoq,  
neema neq,  
ngaq-ai nee eqyal yal  
deedee nail ngaol.

<sup>7</sup> Aqyu juq ngal bhai  
uqhuq thaoq nail neq,  
khul teevq phaqa-ail  
ganl maq tsoiq-ail.  
Khul khi mail dai  
ngal-aq neq,  
tsaol-aq-i mail  
thaoq khal  
leevq thaq nail  
aolsaolkovq bhai,  
ngaq nail daoq dai  
saol-nvq khi,  
cavq bhiq cov bhiq-a nail

ngel-i mail ngaol' dai,

Ilisaqyal ge-ai thaq nail ngaol.

<sup>8</sup> Nuljuq Miqyail-i mail bivq-ai thaq nail daoq juq bhai khaonq-ail ceevq khi, tsaol-aq yaq-i mail thaonq khal leevq-a nail aolsaolkovq bhai neq, nuljuq ivqdao dai nieivq thaiq-ai thaq nail ngaol" dai, ge bhiq-a nail ngaol.

<sup>9</sup> Yeiqsul aqyu juq bhai gaoq ge bhiq-a nail: "Miqyail-i mail bivq-ai thaq nail daoq juq bhai khaonq-ail ceevq khi, tsaol-aq yaq-i mail thaonq khal leevq-a nail aolsaolkovq bhai nuljuq alhai nieivq thaiq nia dai, nuljuq neegeel yuq nail ngaol. <sup>10</sup> Molseiq nail aoldaoq kovqdaoq lavqkhoel-ai, 'Naoq nail aqbhu aqma bhai ya ev naol' dai, gevq-ai thaq khi, 'Yovqgavq nail aqbhu aqma bhai iqkhail yavq nail tsaol-aq, heivq nail bhai ya daq naol' dai, gevq-ai thaq nail ngaol. <sup>11</sup> Thailhai ngaol-aoq, nuljuq niailhai cavq nail cov nail ngaol: "Tsaol-aq teevq gaq ganav yovqgavq nail aqbhu aqma bhai, ngaq-i khal jiav nail naoq bhai bivq heeq pha-q-ail tsaq nail juq, Miqyail bhai danq bhiq-a nail ngaol' dai, ge gaq haq neq, <sup>12</sup> yovqgavq nail aqbhu aqma bhai maq heldaiq bhiq mail khaonq kivq naol dai, nuljuq cavq bhiq cov bhiq nail ngaol. <sup>13</sup> Alhai cavq bhiq cov bhiq nail lavqkhoel nee, nuljuq neq, nuljuq nail aolsaolkovq bhai thaonq nia dai, Miqyail nail daoq bhai aqdeq bhi deq ail-a nail ngaol. Alhai dul nail maodai pha-q iqsanl, nuljuq nl nail hal nail ngaol" dai, Yeiqsul ge bhiq-a nail ngaol.

*Tsaol-aq yaq bhai maq haol dai, bhiq pevq-ail nia nail pha-q*

<sup>14</sup> A bhai nee ngal-aq, Yeiqsul tsaol-aq munl munl ma bhai gaoq khul jil khi ge bhiq-a nail: “Nuljuq iqsanl mail aqmeeq-ai naldaiq khi niilniai heeq kivq thaq-ai yaoq. <sup>15</sup> Lavqniil phaoq khe juq neq, tsaol-aq nail lavqkhoel bhai aol lal khi bhi jiiqv bhi cavq lal nia nail teevq phaqq iqsanl, maq jiav-ail. Tsaol-aq nail neema lavqkhoel nee dov lal nail juq neq, tsaol-aq bhai bhi jiiqv bhi cavq lal nail ngaol.

<sup>16</sup> [Naqkhaol khal covq nail tsaol-aq, naldaiq yaoq” dai, ge bhiq-a nail ngaol.]

<sup>17</sup> Aivq tsaol-aq munl munl ma nee pav ail khi, ilkhaol bha aol lai-u phao, aivq nail yaqlaol juq aivq bhai daoqma uqhuq daoq al daoq nail ganl, naldaiq bhiq-a nail ngaol. <sup>18</sup> Yeiqsul aqyu juq bhai ge bhiq-a nail: “Nuljuq iqsanl maq gov heeq kivq-ail laiqq. Lavqniil phao nee tsaol-aq nail lavqkhoel bha khal aol ail nail yaoq phaqq yaoq-ao nee, tsaol-aq bhai maq bhi jiiqv maq bhiq cavq lal nia-ail. <sup>19</sup> Khul khi mail dai ngal-aq neq, neema lavqkhoel bhai maq aol ail. Ovgmav lavqkhoel bhai kev ail khi, lavqniil dov ha gil nail ngaol” dai, ge bhiq-a nail ngaol. Aivq alhai ge nail neq, jaq nail phaqq iqsanl mail aqhaol ngaol dai, ge movq nail ngaol.

<sup>20</sup> Al ovqtavq, aivq ge nail: “Tsaol-aq nail neema lavqkhoel nee dov lal nail juq neq, tsaol-aq bhai bhiq jiiqv bhiq cavq lal nia nail ngaol.

<sup>21</sup> Khul khi mail dai ngal-aq neq, tsaol-aq nail neema lavqkhoel nee dov lal nail juq neq, niil juq naol: Hageiv nail phaqq saol-nvq nail, khaqmiqq sev nail, yu nail yalkav khiqq nail, tsaol-aq bhai heivq nail, <sup>22</sup> yu nail miqyaqq yovyaqq bhai bheeq

nail, neekhaol jiaiv nail, haqeiv nail phaḡ nl nail, goiqbhaoḡ bhaoḡ nail, yu nail uqhuḡ bhai jaḡ nail, yu bhai ge doil nail, neema eeḡ nail heel nail, yaḡjaoḡ jaḡ nail, niil heel juḡ ngaol. <sup>23</sup> Maḡ meeḡ maḡ jaḡ nail niil juḡ iqsanl mail, tsaol-aḡ nail lavḡkhoel nee dov lal-a nail phaḡ pevḡ khi, tsaol-aḡ bhai bhi jiiḡv bhi cavḡ lal nia nail ngaol” dai, ge bhiḡ-a nail ngaol.

*Heiqlaḡsal yaḡmai-aḡ teevḡ ḡaḡ neema thaḡt-saol nail ḡanl*

<sup>24</sup> A bhai nee ngal-aḡ, Yeiqsul a bhai nee dov ail khi, Dullu meenḡ khi Sildoḡ meenḡ phao ail-a nail ngaol. Aivḡ ilkhaol teevḡ il bhai aol ail-a nail ngaol. Aivḡ a bhai jaol nail bhai tsaol-aḡ teevḡ ḡaḡ bhai iqsanl maḡ bhiḡ heeḡ kivḡ movḡ khi ngaol-aḡ, aivḡ maḡ jaol uvḡ nia-ail. <sup>25</sup> Neivḡ aḡcavḡ aol nail yaḡmiḡ teevḡ ḡaḡ nail aḡma Yeiqsul nail ḡanl ya ḡaiḡ khi, teevḡ pov taivḡ-ail lal khi mail, Yeiqsul nail aḡkhill daoḡthaoḡ bhai peevḡceeḡv kovdoiḡ doiḡ khi uqhuḡ thaoḡ-a nail ngaol.

<sup>26-27</sup> “Nḡaḡ nail yaḡmiḡ bhai aol lai thaḡ nail neivḡ bhai the dov lee lavḡ yaḡ” dai, aivḡ Yeiqsul bhai hal nail ngaol. Aivḡ neḡ, Sulliv milkhaoḡ bhai jaol nail Heiqlaḡsal tsaol-aḡ ngel-i mail, Yeiqsul ge kovḡ bhiḡ-a nail: “Iḡmoeḡ yaḡ juḡ bhai teevḡ bov ya bhi jaḡ nail ngaol. Yaḡ nail aoḡ tsiḡ khi, kheeḡ bhai bhi jaḡ nail maḡ tsaḡ-ail” dai, ge bhiḡ-a nail ngaol.

<sup>28</sup> Yaḡmai-aḡ al ḡaḡ ge kovḡ bhiḡ-a nail: “Heeḡphaḡ-ol, naol ge nail tsaḡ nail ngaol. Thailhai ngaol-aḡ, kheeḡ neḡ, yaḡ juḡ-i mail

kovqkhail kov-uvq bhai jaq khal-ai thaq nail juq bhai mevq jaq nail ngaol” dai, ge bhiq-a nail ngaol.

<sup>29</sup> “Naol thailhai ge nail ngel-i mail, kovq ail yaoq. Naoq nail yaqmiq bhai aol nail neivq dov ail-aog nail ngaol” dai, Yeiqsul aivq bhai ge bhiq-a nail ngaol.

<sup>30</sup> Yaqmai-aq al gaq aivq nail ilkhaol bha kovq kev ail-u phao, aivq nail yaqmiq bhai aol daiq-a nail neivq al maol dov ail khi, aivq nail yaqmiq iqjial bhai iqthaiq nail bhai ya moel-a nail ngaol.

*Naqthaoq teevq gaq bhai lav meeq bhiq-a nail ganl*

<sup>31</sup> A bhai nee ngal-aq, Yeiqsul Dullu meenq aqjail nee mail dov ail-a nail ngaol. Aivq Sildoq meenq khi Deiqgaqbhaollil milkhaoq nee ail pav khi, Gaqliqlail ngaqkha bhai ail kev-a nail ngaol.

<sup>32</sup> Aq-u phao, naqthaoq thaoq khi daoq aqmeeq-ai maq ge nia nail tsaol-aq teevq gaq bhai, yu Yeiqsul jaol nail bha hel lavq-a nail ngaol. “Aivq nail kovtavq bhai aqlavq bhaq dav bhiq yaoq” dai, aqyu juq Yeiqsul bhai hal nail ngaol.

<sup>33</sup> Yeiqsul aivq bhai tsaol-aq munl munl ma nail lavqkhoel nee hevq dol-ai khi, yu maq moel nail bha hel-aivq a nail ngaol. Yeiqsul tsaol-aq al gaq nail naqkhaol bhai lavqnoil tsaog bhoel-a nail ngaol. Al ovqtavq, thaiqkhaq thaiq khi aivq nail moeqlal bhai thoiq leivq bhiq-a nail ngaol.

<sup>34</sup> A bhai nee ngal-aq, Yeiqsul nqtavq phao gaollel khi, aqhaq haq ma gaol kha nail lavqkhoel nee, “Ilphaqdaq” dai, ge nail ngaol. Daoqceevq neq, phao lal yaoq dai, ge nail ngaol. <sup>35</sup> Tsaol-aq al

gaq naqkhaol gaiq nia lal khi, daoq aqmeeq-ai ge nia lal-a nail ngaol.

<sup>36</sup> “Ganl niil teevq gaq bhai iqsanl thaq ge bhiq dei-eiq” dai, Yeiqsul aqyu juq bhai daoq bivq-a nail ngaol. Thailhai ngaol-aoq, aivq aqyu juq bhai daoq nia-al bivq haq neq, niaq-al gaoq ge bhiq-a nail ngaol. <sup>37</sup> Aqyu juq noe-q-u maq dov-ail pevq-ail khi ge nail: “Aivq khul pha-q nl khi ngaol-aoq, aqmeeq pha-q teevq-eel ngaol. Naqthaoq thaoq nail tsaol-aq bhai gaiq nia lal dai, nl bhiq khi, daoq maq ge nia nail tsaol-aq bhai daoq ge nia lal dai iqsanl, nl bhiq-a nail ngaol” dai, ge nail ngaol.

## 8

### *Tsaol-aq liq hinl gaq bhai bhi jaq-a nail ganl*

<sup>1</sup> Aqn aqyanq mao-ail maq maq lal mail, tsaol-aq munl teevq munl gaoq jil lal-a nail ngaol. Tsaol-aq al juq jaq nail teevq pha-q-ail maq jiav-ail pevq lal-u phao, Yeiqsul yaqlaol juq bhai khul khi, niailhai ge bhiq-a nail ngaol: <sup>2</sup> “Tsaol-aq niil juq bhai ngal gaoqhaq-ail nial. Aqyu juq ngaq-ai nee mail jaol-a nail hail n bhee lal khi, jaq nail teevq pha-q iqsanl maq jiav-aoq nail ngaol. <sup>3</sup> Aqyu juq bhai khul teevq pha-q iqsanl maq bhi jaq dai, bhi kovq ail haq neq, gailphail lail ma bhai kovq ail thailthaiq-u phao, gaq juq lal nail ngaol. Khul khi mail dai ngal-aq neq, teevq pav ganav juq neq, eqyal nee lal-a nail ngaol” dai, ge bhiq-a nail ngaol.

<sup>4</sup> Yaqlaol juq ge nail: “Tsaol-aq niidai mao nail bhai bhi jaq bhi daol nail haqbhoil, niilheel

nail tsaol-aq maq jaol nail haqtsoiq haqyal bhai jaqjaq daoldaol khaq sil gaq halpov dov-ail nia heeq” dai, ge kovq bhiq-a nail ngaol.

<sup>5</sup> “Nuljuq khaqmul khadai heeq aol nail-aiq” dai, Yeiqsul naldaiq-u phao, “Khaqmul sivq heeq aol nail ngaol” dai, ge kovq bhiq-a nail ngaol.

<sup>6</sup> “Miltsaq bhai jaoldeel yaoq” dai, Yeiqsul tsaol-aq munl munl ma al juq bhai daoq bivq-a nail ngaol. A bhai nee ngal-aq, khaqmul al sivq heeq oil khi, Miqyail bhai tsiqeeq gaq khi ngaoqpav-a nail ngaol. “Tsaol-aq niil juq nail sivatvq bhai tsiq thaq bhiq-ail yaoq” dai, ge khi, aivq nail yaqlaol juq bhai tsiq bhiq-a nail ngaol. Aqyu juq iqsanl tsaol-aq munl munl ma nail sivatvq bhai tsiq thaq bhiq-a nail ngaol. <sup>7</sup> Aqyu juq delgil maol yaq mee nia maol gaoq aol nail ngaol. Al nail haqbhoil Miqyail bhai Yeiqsul gaoq tsiqeeq khi, tsaol-aq munl al juq bhai, delgil al gaoq bhi bhoil bhiq-a nail ngaol. <sup>8</sup> Aqyu juq teevq bov jaq-a nail ngaol. Al ovqtavq, jaiq lal-a nail juq bhai yaqlaol juq gaoq gov kovq daiq-u phao, pheeqdeel nee mail sivq deel bhee nail ngaol. <sup>9</sup> Jaq-a nail tsaol-aq juq, liq hinl gaq niidai bhee nail ngaol. A bhai nee ngal-aq, Yeiqsul tsaol-aq al juq bhai bhi kovq ail-a nail ngaol. <sup>10</sup> Aq-u phao, aivq nail yaqlaol juq nee mail teevq pov taivq-ail laovq lavqkhoel bhai aol ail khi, Daqmaqnuлдаq milkhaoq bhai ail-a nail ngaol.

*Bhi heeq bhi moel nail pha q nl daiq lavq yaoq dai, Phaqliqsail juq hal nail ganl*

<sup>11</sup> Aq-u phao, Phaqliqsail teevq gaq ganav juq Yeiqsul nee jil pheel jil lul jaq lal-a nail

ngaol. Aivq bhai laonqdaiq movq nail ngel-i mail, “Nqtavq kovtavq khe bhiq heeq bhi moel nail pha q nl daiq lavq yaoq” dai, hal nail ngaol. <sup>12</sup> Aivq aqhaq haq ma gaol kha khi ge nail: “Yeel niil yeel khe tsaol-aq neq, khul khi mail bhi heeq bhi moel nail pha q hal daiq nail ngel-ail. Ngal nuljuq bhai maldil dai, ge lavq bhel. Yeel niil yeel khe tsaol-aq bhai, bhi heeq bhi moel nail pha q teevq pha q iqsanl maq nl daiq bhiq-ail” dai, ge bhiq-a nail ngaol. <sup>13</sup> A bhai nee ngal-aq, Yeiqsul aqyu juq nee mail pav ail khi, laovq jeeq khi mail, ngaqkha a phao lelkhel bha ceiv ail-a nail ngaol.

*Yeiqsul nail daoq bhai yaqlaol juq maq gov heeq nia nail ganl*

<sup>14</sup> Yaqlaol juq khaqmul nioilpeivq-ail ceevq-a nail ngel-i mail, laovq lavqkhoel bhai khaqmul teevq heeq taivq-ail aol nail ngaol. <sup>15</sup> Aq-u phao, Yeiqsul Yaqlaol juq bhai ge bhiq-a nail: “Phaqliq-sail juq nail deqtsiq khi mail heeqphaq Heiqlol nail deqtsiq bhai, nuljuq aqmeeq-ai heldaiq khi yaolphaol yaoq” dai, ge bhiq-a nail ngaol.

<sup>16</sup> Thailhai ngaol-aq, yaqlaol juq neq, aqyu juq nail gaiqlaq bhai khaqmul maq oil leevq tha q nail ganl taivq-ail, ge nail ngaol.

<sup>17</sup> Aqyu juq alhai ge thailthaiq nail bhai, Yeiqsul heeq nia khi, niailhai ge bhiq-a nail ngaol: “Khul khi mail, khaqmul maq oil leevq tha q nail ganl taivq-ail, nuljuq ge thailthaiq nail-aiq. Niil aq-il kev dai, nuljuq maq gov heeq dai, jaol nail lai q. Nuljuq thoi dai dai-ail neema gaol nail lai q. <sup>18</sup> Nuljuq maivneev covq nail, maq moel nia dai, naqkhaol covq nail, maq gaiq lal-ail lai q. Maq



noeq dai, nioilpeivq gil-aoq nail laiq. <sup>19</sup> Ngal khaqmul ngaq heeq ngaoqpav khi tsaol-aq ngaq hinl gaq bhai bhi jaq-u phao, nuljuq jaiq lal-a nail khadai deel gov bhee-a nail-aig” dai, naldaiq-u phao, “Tsel-nvq deel gov bhee-a nail ngaol” dai, aqyu juq Yeiqsul bhai ge kovq bhiq-a nail ngaol. <sup>20</sup> “Ngal khaqmul sivq heeq ngaoqpav khi tsaol-aq liq hinl gaq bhai bhi jaq-u phao, nuljuq jaiq lal-a nail khadai deel gov bhee-a nail-aig” dai, gaoq naldaiq-u phao, “Sivq deel gov bhee-a naol” dai, ge kovq bhiq-a nail ngaol.

<sup>21</sup> “Thailhai ngaol-aoq, niil aq-il kev dai, nuljuq maq noeq heeq haq-al laiq” dai, Yeiqsul aqyu juq bhai ge bhiq-a nail ngaol.

*Bheiqjeildaq meenq bhai jaol nail maivpeivq teevq gaq bhai lav meeq bhiq-a nail ganl*

<sup>22</sup> A bhai nee ngal-aq, Bheiqjeildaq meenq bhai aqyu juq ail kev-a nail ngaol. Tsaol-aq teevq juq Yeiqsul jaol nail bha maivpeivq teevq gaq hel lavq khi, teevq pov bhi thoiqtsi nail haqbhoil, Yeiqsul bhai hal-a nail ngaol. <sup>23</sup> Yeiqsul maivpeivq peivq nail al gaq nail aqlavq bhai nieivq thaiq khi, meenq meenq jail bhai hel-aivq-a nail ngaol. Aq-u phao, aivq nail maivneev bhai thaiqkhaq thaiqbav bhiq khi, aivq nail kovtavq bhai aqlavq bavq dav bhiq khi mail: “Naoq bhai teevq pha q ganav moel lal-a il laiq” dai, naldaiq bhiq-a nail ngaol.

<sup>24</sup> Tsaol-aq al gaq bavq lel daiq khi ge nail: “Ngal tsaol-aq bhai moel lal-aoq naol. Aqyu juq neq, aqbhaol khe-ai dul khi ngaol-aoq, gailkhaol tsao-il” dai, ge kovq bhiq-a nail ngaol.

25 Yeiqsul aivq nail maivneev bhai teevq pov gaoq thoiqtsi bhiq-a nail ngaol. Tsaol-aq al gaq aqmeeq-ai teevq pov gaoq heldaiq-u phao, maivneev moel haol nia lal khi, yaoq phaq yaoq-ao nee mail, moel haol nia lal-a nail ngaol. 26 A bhai nee ngal-aq, tsaol-aq al gaq bhai, “Meenq lavqkhoel bhai thaq aol lai dei-eiq” dai, Yeiqsul aivq bhai ge bhiq khi, ilkhaol bhai bhi kovq ail-a nail ngaol.

*“Yeiqsul neq, Khali ngaol” dai, Bheiqtuvluv ge nail ganl*

27 A bhai nee ngal-aq, Yeiqsul khi mail aivq nail yaqlaol juq Pillilpuv-i\* mail cov-a nail Gailsaqlil meenq aqjail bhai jiav nail julgu juq bhai ail-a nail ngaol. Gailphail lail ma bhai ail thailthaiq-u phao, “Yu ngaq bhai khaq sil gaq niil dai, ge thailthaiq nail-aiq” dai, Yeiqsul aqyu juq bhai naldaiq bhiq-a nail ngaol.

28 Yaqlaol juq aivq bhai ge kovq bhiq-a nail: “Tsaol-aq teevq pav ganav juq naoq bhai ulcuvq saol bhiq nail Yaolhaq niil dai, ge nail ngaol. Teevq pav ganav juq neq, Eillilya niil dai, ge khi, teevq pav ganav juq neq, Miqyail nail haqbhoil gedan nail tsaol-aq teevq gaq ganav niil dai, ge nail ngaol” dai, ge kovq bhiq-a nail ngaol.

29 “Nuljuq thoil, ngaq bhai khaq sil gaq niil dai ge heeq” dai, Yeiqsul aqyu juq bhai naldaiq-u phao, “Naol neq, Khali nial” dai, Bheiqtuvluv ge kovq bhiq-a nail ngaol.

---

\* **8:27** 8.27 Pillilpuv niil gaq neq, Heiqlol Aqgilpav nail jaqbheq ngaol.

<sup>30</sup> “Ngaq nail ganl teevq gaq bhai iqsanl thaq ge bhiq dei-eiq” dai, Yeiqsul aqyu juq bhai daoq bivq-a nail ngaol.

*Yeiqsul aivq ya sil nail ganl, ge bhiq-a nail*

<sup>31</sup> A bhai nee ngal-aq, Yeiqsul aivq nail yaqlaol juq bhai niailhai cavq bhiq cov bhiq-a nail ngaol: “Tsaol-aq nail Yaqyov neq, maodai phaqa ya daq deede nee nail ngaol. Aqivq aqtsu juq, Philma juq khi mail aoldaoq kovqdaoq cavq nail cov nail juq-i mail khaonq ha nail bhai ya daq nail ngaol. Yu-i mail bhi heivq nail bhai kev dai, ya daq nail ngaol. Thailhai ngaol-aq, hail n kev lal haq neq, gaoq doevq kovq lal naol” dai, ge bhiq-a nail ngaol. <sup>32</sup> Ganl al iqsanl mail aivq bhaqlaoq kheq dai, ge daiq bhiq-a nail ngaol. Alheel ngel-i mail, Bheiqtuvluv aivq bhai hevq dol-aivq khi, khaq bhiq-a nail ngaol.

<sup>33</sup> Thailhai ngaol-aq, Yeiqsul yaqlaol juq jaol nail phao haoqnaol naolkovq kovq daiq khi, Bheiqtuvluv bhai ge bhiq-a nail: “Neivq Saqdaq-ol, gailkhaol phaol yaoq. Khul khi mail dai ngal-aq neq, naoq nail neenoeq neq, Miqyail nail neenoeq maq ngel-ail. Tsaol-aq nail neenoeq teevq-eel ngaol” dai, khaq bhiq-a nail ngaol.

*Yeiqsul nail haoqnao khalhai ya tsaothe nail ganl*

<sup>34</sup> A bhai nee ngal-aq, Yeiqsul tsaol-aq munl munl ma juq khi mail aivq nail yaqlaol juq bhai khul jil khi ge bhiq-a nail: “Tsaol-aq teevq gaq, ngaq nail haoqnao tsaother lavq movq haq neq, yovqgavq nail neekhaol ya khaonq ha-ail ceevq khi, yovqgavq nail lavqyavq yovqgavq bavq khi,

ngaq nail haoqnao ya tsaothel lavq nail ngaol.  
<sup>35</sup> Khul khi mail dai ngal-aq neq, yovqgavq nail doevq nail pha q yovqgavq bhi jel-ail movq haq neq, yovqgavq nail doevq nail pha q sunq-ail nail ngaol. Thailhai ngaol-aq, ngaq nail haqbhoil khi mail lavqkhiq tsail nail geeqlaoq daoq nail haqbhoil, yovqgavq nail doevq nail pha q bhi sunq-ail haq neq, doevq nail pha q ya nail ngaol.  
<sup>36</sup> Tsaol-aq teevq gaq ganav miltsaq niil teevq heeq heeq lao ya gil khi ngaol-aq, aivq nail doevq nail pha q sunq-ail haq neq, aivq nail haqbhoil khul nail ganl tsoiq nail-aiq. <sup>37</sup> Tsaol-aq al gaq, aivq nail doevq nail pha q bhai khul-i mail ul kovq nia nail-aiq. <sup>38</sup> Khaqmiq sev nail pha q khi oeqbal mao deede nail yeel niil yeel nail lavqkhoel, tsaol-aq teevq gaq ganav, ngaq bhai maqkhaiq, ngaq nail daoq bhai maqkhaiq, haqsil haq neq, Tsaol-aq nail Yaqyov iqsanl, aivq nail Aqbhu nail seiqlaiq khaoqsail doi khi meeq nail haol nail nqtavq gaqkhoel juq nee mail yavq kha lee-u phao, tsaol-aq al gaq bhai haqsil naol” dai, Yeiqsul aqyu juq bhai ge bhiq-a nail ngaol.

## 9

<sup>1</sup> Al ovqtavq, Yeiqsul gaoq ge nail: “Ngal nuljuq bhai maldil dai, ge lavq bhel. Niilniai thulphaol-nvq tha q nail tsaol-aq teevq pav ganav juq, Miqyail Milkhaq nail bhaqaoq teevq bhee kev lee nail bhai maq ya moel-u kev dai, maq ya sil-ail” dai, ge bhiq-a nail ngaol.

*Yeiqsul nail aqmaol phal lal-a nail ganl*

<sup>2</sup> Kovq n jel ail-u phao, Yeiqsul neq, Bheigtuvluv, Yaqkov khi Yaolhaq bhai taivq-ail hevq khi, tsaol-aq maq jaol nail gaoqjaoq daqmoe teevq jaoq bha dav lai-a nail ngaol. Aq-u phao, Yeiqsul aqyu juq nail siltavq nee aqmaol phal lal-a nail ngaol. <sup>3</sup> Aivq nail aqgaq aqdoi phulleq dai, pevq lal khi aqbhaq bhaq deedee nail ngaol. Miltsaq kovtavq bhai aqgaq aqdoi laiqtisq nail khul gaq maqkhaiq, aq dai dai-ail maq laiqtisq haol nia-ail. <sup>4</sup> Eillilya khi Molseiq iqsanl aqyu juq nail siltavq bhai dov lee khi, Yeiqsul bhai daoq ge tsaq thailthaiq nail ngaol.

<sup>5</sup> Aq-u phao, Bheigtuvluv ge nail: “Saqlaq-ol, ngadao niai jaol nail neq, aqmeeq nial. Nvjuq yavqtsoel hail tsoel cov naol. Naoq nail haqbhoil teevq tsoel, Molseiq nail haqbhoil teevq tsoel khi, Eillilya nail haqbhoil teevq tsoel cov naol” dai, Bheigtuvluv Yeiqsul bhai ge bhiq-a nail ngaol. <sup>6</sup> Aqyu juq geesil deedee nail ngel-i mail, Bheigtuvluv maq noeq maq mav-ail ge nail ngaol.

<sup>7</sup> Aq-u phao, nqdil aqyu juq bhai uvthaiq-ai thaq nail ngaol. “Tsaol-aq niil gaq, ngal mailma-ail gaiq-a nail ngaq nail Yaqyov ngaol. Aivq nail daoq naldaiq yaoq” dai, nqdil al nail lavqkhoel nee aqthel meel dov-ai leevq-a nail ngaol.

<sup>8</sup> Aqyu juq teevq pov taivq-ail jaoq jaoq-ai heldaiq-u phao, teevq gaq bhai iqsanl maq moel-al. Yeiqsul taivq-ail aqyu juq nee mail jaol nail bhai ya moel-a nail ngaol.

<sup>9</sup> Aqyu juq gaoqjaoq al jaoq nee mail yavq kha lee thailthaiq-u phao, Yeiqsul ge nail: “Tsaol-aq nail Yaqyov maq doevq kovq lal-u phao kev dai,

nuljuq-i mail ya moel-a nail ganl niil, teevq gaq bhai iqsanl, thaq ge bhiq dei-eiq” dai, aqyu juq bhai daoq bivq-a nail ngaol. <sup>10</sup> Aqyu juq daoq al daoq bhai noeq thaq-ai thaq nail ngaol. “Gaoq doevq kovq lal nail dai, ge nail neq, khul bhai ge movq nail meeq” dai, aqyu juq nail gaiqlaq bhai ge pheeljaq nail ngaol.

<sup>11</sup> Aq-u phao, “Eillilya neq, Khali nail iqmoeq lee nail ngaol dai, khul khi mail aoldaoq kovq-daoq cavq nail cov nail juq ge nail-aiq” dai, yaqlaol juq Yeiqsul bhai naldaiq-a nail ngaol.

<sup>12</sup> Yeiqsul ge nail: “Tsaq naol. Eillilya iqmoeq lee khi, iqsanl bhai aqmeeq-ai lav sav thaq-ai lee nail ngaol. Thailhai ngaol-aog, Tsaol-aq nail Yaqyov neq, mee nia pha q bhai ya daq khi thaqtheq nail bhai ya daq nail ngaol dai, Jalliq lavqkhoel bhai, khul khi mail gevq-ai thaq nail-aiq. <sup>13</sup> Ngal nuljuq bhai ge lavq bhel. Eillilya lee khi ngaol-aog, aivq nail ganl Jalliq lavqkhoel bhai gevq-ai thaq nail khe-ai, tsaol-aq yaq juq aivq bhai khal nl movq nail khe-ai, nl bhiq-a nail ngaol” dai, ge bhiq-a nail ngaol.

*Neivq aol nail yaqyov teevq gaq bhai lav meeq bhiq-a nail ganl*

<sup>14</sup> Yeiqsul khi mail yaqlaol al hail gaq, yaqlaol juq jaol nail bha kovq kev lee-u phao, tsaol-aq munl munl ma yaqlaol al juq bhai jaoljaoq-ai thaq khi, aoldaoq kovqdaoq cavq nail cov nail juq, yaqlaol juq nee mail jil pheeljaq nail bhai, ya moel-a nail ngaol. <sup>15</sup> Tsaol-aq munl munl lao-ail Yeiqsul bhai ya moel-u phao, teevq pov taivq-ail,

noeq-u maq dov dai pevq-ail khi, tsaol-aivq khi hav-a nail ngaol.

<sup>16</sup> “Nuljuq aqyu juq nee mail khul nail ganl nee jil pheeljaq thailthaiq nail-aiq” dai, Yeiqsul naldaiq bhiq-a nail ngaol.

<sup>17</sup> Aq-u phao, tsaol-aq munl munl ma nail lavqkhoel khe teevq gaq aivq bhai ge bhiq-a nail: “Saqlaq-ol, ngaq nail yaqyov naol jaol nail bha hel lavq-a nail ngaol. Yaqjaoq bhi jaoq-ail nail neivq aivq nail lavqkhoel bhai aol nail ngaol. <sup>18</sup> Neivq al maol aivq bhai khal nieivq-u phao, miltsaq bhai nieivq thaoq nieivq tuv bhiq nail ngaol. A bhai nee ngal-aq, moeqthaoq nee khaqmevq bhulmevq dov lal khi, haoqgil keivq keivq-ail, aqmaol gaol li cevq dai, pevq-ail nail ngaol. Neivq al maol the dov lavq yaoq dai, naoq nail yaqlaol juq bhai ngal hal khi ngaol-aq, aqyu juq maq the dov nia-ail” dai, ge bhiq-a nail ngaol.

<sup>19</sup> Aq-u phao, Yeiqsul ge nail: “Niil yeel nail tsaol-aq juq-ol, nuljuq neq, neema thaqtsaol nail neema maq aol-il. Ngal nuljuq nee mail khaq mao kev dai ya jaol-ai haq nail-aiq. Ngal nuljuq bhai khaq mao kev dai, ya ol-ai haq nail-aiq. Yaqyov al gaq, ngal jaol nail bha hel lavq yaoq” dai, ge bhiq-a nail ngaol.

<sup>20</sup> Aqyu juq yaqyov al gaq bhai, Yeiqsul jaol nail bha hel lavq-a nail ngaol. Neivq al maol Yeiqsul bhai ya moel-u phao, yaqyov al gaq bhai bhi bhaoq bhi ga-a nail ngaol. Yaqyov al gaq miltsaq bhai ga tsuq-ail khi, moeqthaoq lavqkhoel nee khaqmevq bhulmevq laiv laiv dai, tev nail ngaol.

<sup>21</sup> “Naoq nail yaqyov niailhai pevq lal-a nail, khaq mao nee ngel-aq nail-aiq” dai, Yeiqsul

aqbhu gaq bhai naldaiq-u phao, “Yaqnoil-ail jiav-u phao nee niailhai pevq nail ngaol” dai, ge kovq bhiq-a nail ngaol. <sup>22</sup> “Aivq bhai bhi sil nail dai khi, miqjaq bhai maqkhaiq, ulcuvq bhai maqkhaiq, neivq aivq bhai mee nia pov doe q puvq bhiq-a nail ngaol. Naol teevq pha q ganav nl kivq haq neq, nv-nvq pha qyaq bhai ga oqha q lavq yaoq” dai, aqbhu gaq ge bhiq-a nail ngaol.

<sup>23</sup> Aq-u phao, Yeiqsul ge kovq bhiq-a nail: “Nl kivq haq neq dai, naol ge nail lai q. Neema tha qtsaol nail tsaol-aq nail haqbhoil yaoq pha q yaoq-ao nee nl kivq nail ngaol” dai, aivq bhai ge bhiq-a nail ngaol.

<sup>24</sup> Aq-u phao, aqbhu al ga q nioil nioil-ail khi ge nail: “Ngal neema tha qtsaol naol. Neema tha qtsaol nail pha q aol lal dai, tsa oja o-ai lavq yaoq” dai, ge bhiq-a nail ngaol.

<sup>25</sup> Tsaol-aq munl munl ma aqyu juq jaol nail bha tsaol lavq thailthai q nail bhai, Yeiqsul ya moel-u phao, neivq aqcavq al maol bhai kha q kha q-ail, “Ya qja oq bhi jao q-ail khi na qtha oq bhi q tha oq-ail nail neivq-ol, aivq nail lavqkhoel nee dov ail yaoq. Ya qhao teevq pov iqsanl, aivq nail lavqkhoel bhai tha q ga oq aol lal dai, ngal na oq bhai da oq bivq nail ngaol” dai, ge bhiq-a nail ngaol.

<sup>26</sup> Aq-u phao, neivq al maol aqthel mailma-ail gul gul-ail, ya qyov al ga q bhai bhi bhao bhi ga deede e khi mail, dov ail-a nail ngaol. Ya qyov al ga q sil-a oq tha q nail khe-ai dul nail ngel-i mail, “Aivq sil-a oq tha q nial” dai, tsaol-aq mee nia ga q ge nail ngaol. <sup>27</sup> Thailhai ngaol-a oq, Yeiqsul aivq



nail aqlavq bhai nieivq thaiq khi he thul bhiq-a nail ngel-i mail, aivq thul lal-a nail ngaol.

<sup>28</sup> Yeiqsul ilkhaol bha aol lai khi, aivq teevq gaq taivq-ail jaol-u phao, aivq nail yaqlaol juq neq, “Khul khi mail nvjuq neivq al maol bhai maq the dov kivq nail-aiq” dai, naldaiq bhiq-a nail ngaol.

<sup>29</sup> “Geeqlaoq hal nail phaqaq maq ngel nail neq, neivq al phaqaq bhai maq the dov kivq-ail” dai, Yeiqsul aqyu juq bhai ge bhiq-a nail ngaol.

*“Ngal ya sil naol” dai, Yeiqsul teevq pov gaoq ge nail ganl*

<sup>30</sup> Aqyu juq a bhai nee dov ail khi, Gaqliqlail milkhaoq phao ail-a nail ngaol. Aqyu juq ail thailthaiq nail ganl, Yeiqsul tsaol-aq teevq gaq bhai iqsanl maq bhi heeq kivq movq-ail. <sup>31</sup> Khul khi mail dai ngal-aq neq, aivq yaqlaol juq bhai nialhai cavq bhiq thailthaiq nail ngaol: “Tsaol-aq nail Yaqyov neq, tsaol-aq yaq nail aqlavq lavqkhoel bhai av bhiq nail bhai ya daq nail ngaol. Aqyu juq aivq bhai tavq heivq nail ngaol. Tavq heivq khi hail n kev lal haq neq, aivq gaoq doevq kovq lal nail ngaol” dai, aqyu juq bhai ge bhiq-a nail ngaol. <sup>32</sup> Aqyu juq daoq al daoq bhai maq gov heeq nia khi ngaol-aq, aivq bhai maq naldaiq tseq-ai bhiq-ail.

*Khul gaq yu nee maqtsil eeq nail ganl*

<sup>33</sup> A bhai nee ngal-aq, aqyu juq Gaqb-heiqneiqoq meenq bhai ail kev-a nail ngaol. Yeiqsul ilkhaol lavqkhoel bhai jaol-u phao, “Nuljuq gailphail bhai lee-u phao khul nail ganl nee jil pheeljaq lao nail-aiq” dai, aivq yaqlaol juq bhai naldaiq bhiq-a nail ngaol. <sup>34</sup> Thailhai

ngaol-aoq, aqyu juq aqtsi tsu dai, jaol nail ngaol. Khul khi mail dai ngal-aq neq, “Ngadao juq nail lavqkhoel bhai khul gaq eeq jaiq nail-aiq” dai, aqyu juq gailphail lail ma bhai teevq gaq nee teevq gaq jil pheeljaq-a nail ngaol.

<sup>35</sup> A bhai nee ngal-aq, Yeiqsul jaoldeel khi, yaqlaol tsel-nvq gaq bhai khul khi ge bhiq-a nail: “Yu nail iqmoeq bhai jaol movq nail tsaol-aq neq, yu nail haoqnao ya jaol khi, iqsanl nail yaqkav iqmoeq ya jiovq nail ngaol” dai, ge bhiq-a nail ngaol.

<sup>36</sup> Al ovqtavq, aqyu juq nail gaoltsi bhai aivq yaqnoil teevq gaq hevq thaq-ai thaq nail ngaol. Yaq al gaq bhai aivq tsiq khi, aqyu juq bhai niailhai ge bhiq-a nail ngaol: <sup>37</sup> “Ngaq nail aqmil kov-uvq nee, niilheel nail yaqnoil teevq gaq bhai hav-a nail tsaol-aq khul gaq maqkhaiq, ngaq bhai hav-a nail khe-ai dul nail ngaol. Ngaq bhai hav-a nail tsaol-aq neq, ngaq bhai khoel-ai leevq-a nail gaq bhai iqsanl hav-a nail khe-ai dul nail ngaol” dai, ge bhiq-a nail ngaol.

*Ngadao bhai neejiav jiav nail phao maq jaol nail tsaol-aq, ngadao phao jaol nail ngaol*

<sup>38</sup> Aq-u phao, Yaolhaq ge nail: “Saqlaq-ol, tsaol-aq teevq gaq naoq nail aqmil bhai juq juq-ail, neivq bhai the dov nail bhai, nvjuq ya moel-a nail ngaol. Aivq neq, ngadao juq nail munl lavqkhoel bhai maq aol nail ngel-i mail, nvjuq aivq bhai lav tsoiq-a nail ngaol” dai, Yeiqsul bhai ge bhiq-a nail ngaol.

<sup>39</sup> Yeiqsul ge nail: “Aivq bhai thaq lav tsoiq. Khul khi mail dai ngal-aq neq, ngaq nail aqmil

bhai juq khi bhaqaoq eeq nail pha q nl dai q bhi q nail tsaol-aq khul ga q maqkhai q, nga q bhai lavqtsail mail, ma q ge doil-ail. <sup>40</sup> Ngadao bhai neejiav jiav nail phao ma q jaol nail tsaol-aq, ngadao phao jaol nail ngaol. <sup>41</sup> Ngal nuljuq bhai maldil dai, ge lavq bhel. Nuljuq Khali nail tsaol-aq niil dai, heeq nia khi, nuljuq bhai ulcuvq teevq khaoqanq khal bhi daol lavq-a nail tsaol-aq khul ga q maqkhai q, tsaol-aq al ga q nail geeqlaoq teevq thal-iq ma q peivq-ail nia ail dai” dai, ge bhi q-a nail ngaol.

*Yu nl lai q dai, hevq bheeq nail ganl*

<sup>42</sup> Yeiqsul gaoq ge nail: “Nga q bhai neema tha qtsaol nail yaqnoil teevq ga q bhai bhi nl lai q nail khul ga q maqkhai q, aivq nail leelkhaol bhai lovmav heeq ma pheethai q khi, iqya q iqma bhai bavq puvq-ail nail neq, aivq nail haqbhoil meeq jai q nail ngaol. <sup>43</sup> Naoq nail aqlavq teevq lavq naoq bhai bhi nl lai q lavq ha q neq, dev ha pivq yaoq. Aqlavq nvq lavq nvq lavq-ail covq khi, ma q miv-ail dai miqja q tovq nail daqovq laoma eeltsul bhai ya da q nail nee ma qtsil, aqlavq teevq lavq ma q covq dai aqdoevq doevq nail neq, naoq nail haqbhoil meeq jai q nail ngaol.

<sup>44</sup> [Daqovq laoma eeltsul lavqkhoel bhai neq, aqyu juq bhai keivq nail lovthaoq teevq thal-iq ma q sil nail nee ovqtavq, miqja q iqsanl teevq thal-iq ma q miv lai-ail.]

<sup>45</sup> Naoq nail aqkhill teevq khaoq naoq bhai bhi tsao lai q lavq ha q neq, devq ceiv pivq yaoq. Aqkhill nvq khaoq nvq khaoq-ail covq khi, daqovq laoma eeltsul bhai bavq poiv lavq nail

bhai ya daq nail nee maqtsil, aqkhill teevq khaoq devq ceiv khi aqdoevq ya doevq nail neq, naoq nail haqbhoil meeq jaiq nail ngaol.

<sup>46</sup> [Daqovq laoma eeltsul lavqkhoel bhail neq, aqyu juq bhail keivq nail lovthaoq teevq thal-iq maq sil nail nee ovqtavq, miqjaq iqsanl teevq thal-iq maq miv lai-ail.]

<sup>47</sup> Naoq nail maivneev teevq neev heldaiq khi naoq bhail bhi nl laiq lavq haq neq, kevv dov ha yaoq. Maivneev nvq neev nvq neev-ail covq khi, daqovq laoma eeltsul bhail bavq bhoel lavq nail bhail ya daq nail nee maqtsil, maivneev teevq neev taivq-ail covq khi Miqyail Milkhaoq lavqkhoel bhail ya aol lai nail neq, naoq nail haqbhoil meeq jaiq nail ngaol. <sup>48</sup> Daqovq laoma eeltsul lavqkhoel bhail neq, aqyu juq bhail keivq nail lovthaoq teevq thal-iq maq sil nail nee ovqtavq, miqjaq iqsanl teevq thal-iq maq miv lai-ail. <sup>49</sup> Laol bhiq nail phaqq bhail cavqdevq hoeldav khi, bhi haol lal nail khe-ai, tsaol-aq iqsanl bhail miqjaq-i mail laonqdaiq khi, bhi haol lal nail ngaol. <sup>50</sup> Cavqdevq neq, ganl tsoiq nail ngaol. Thailhai ngaol-aqq, cavqdevq niail nail phaqq deq-ail haq neq, khalhai khi gaoq bhi niail lal nial nail-aiq. Nuljuq nail lavqkhoel bhail cavqdevq bhi aol khi, teevq gaqq nee teevq gaqq tsaqq lai jil lai khi jaol yaoqq dai, ge bhiq-a nail ngaol.

## 10

*Khaqma kovq nail ganl, Yeiqsul cavq bhiq cov bhiq-a nail*

<sup>1</sup> Aq-u phao, Yeiqsul jaol duq al dao nee mail dov ail-a nail ngaol. A bhai nee ngal-aq, Yaoldaq laoljaol a phao lelkhel ceiv ail khi, al nail lao tsao ail kha khi, Yuldav milkhaoq bhai ail kev-a nail ngaol. Tsaol-aq munl munl ma aivq jaol nail bha jil lee khi, aivq khaq mao iqsanl cavq bhiq cov bhiq nail khe-ai, aqyu juq bhai cavq bhiq cov bhiq-a nail ngaol.

<sup>2</sup> Aq-u phao, Yeiqsul bhai laonqdaiq nail dai khi, Phaqliqsail teevq pav ganav juq aivq jaol nail bha lal khi, “Yovjil neq, yovqgavq nail khaqma bhai kovq khaq naol laiq” dai, naldaiq bhiq-a nail ngaol.

<sup>3</sup> “Molseiq nuljuq bhai, daoq khalhai bivq-ai thaq nail-aiq” dai, Yeiqsul aqyu juq bhai naldaiq-a nail ngaol.

<sup>4</sup> “Kovq nail haoqgavq teevq keiv gevq bhiq gaq haq neq, kovq kivq naol dai, Molseiq daoq bivq-ai thaq nail ngaol” dai, aqyu juq aivq bhai ge kovq bhiq-a nail ngaol.

<sup>5</sup> Yeiqsul aqyu juq bhai ge bhiq-a nail: “Nuljuq neema gaol nail ngel-i mail, nuljuq nail haqbhoil daoq al daoq gevq thaq-ail ceevq-a nail ngaol.

<sup>6</sup> Thailhai ngaol-aq, Miqyail nqtavq miltsaq teivq-u phao, yaqyov-aq khi mail yaqmai-aq bhai teivq-a nail ngaol. <sup>7</sup> Alheel ngel-i mail, yaqyov-aq neq, yovqgavq nail aqbhu aqma nee gaoq ail khi, yovqgavq nail khaqma nee mail jaol ail nail ngaol. <sup>8</sup> Aqyu nvq gaq teevq gaq taivq-ail pevq lal nail ngaol dai, gevq-ai thaq nail ngaol. Aq-u phao, aqyu nvq gaq neq, nvq gaq maq ngel yaoq-aol. Teevq gaq teevq-eel ngaol. <sup>9</sup> Miqyail-i mail

oil jil-ai thaq nail bhai, tsaol-aq yaq maq ya lav pav-ail” dai, ge bhiq-a nail ngaol.

<sup>10</sup> Aqyu juq ilkhaol bhai kovq kev ail-u phao, yaqlaol juq Yeiqsul bhai, ganl al naldaiq-a nail ngaol. <sup>11</sup> Aq-u phao, Yeiqsul ge nail: “Tsaol-aq teevq gaq yovqgavq nail khaqma kovq khi yaoq gaq yaoq bhai hevq haq neq, yovqgavq nail khaqma bhai nl bheeq nail pha q nl-aoq nail ngaol. <sup>12</sup> Alhai dul dai, khaqma teevq gaq yovqgavq nail yovjil bhai kovq khi, yaoq gaq yaoq bhai maol ail haq neq, yovqgavq nail yovjil bhai nl bheeq-a nail pha q pevq nail ngaol” dai, Yeiqsul aqyu juq bhai ge bhiq-a nail ngaol.

*Yeiqsul yaqnoil juq bhai geeqlaoq bivq-a nail ganl*

<sup>13</sup> Tsaol-aq teevq pav ganav juq, Yeiqsul-i mail bhi thoiqtsi nail haqbhoil, yaqnoil juq bhai hevq khi, aivq jaol nail bha lal-a nail ngaol. Thailhai ngaol-aoq, yaqnoil hevq ha lal-a nail tsaol-aq al juq bhai, yaqlaol juq-i mail khaq bhiq-a nail ngaol. <sup>14</sup> Alhai khaq bhiq nail bhai, Yeiqsul ya moel-u phao, neema phail lal bhiq khi yaqlaol juq bhai niailhai ge bhiq-a nail ngaol: “Yaqnoil juq ngal jaol nail bha bhi lal yaoq. Aqyu juq bhai tha q lav tsoiq. Khul khi mail dai ngal-aq neq, Miqyail Milkhaoq neq, aqyu juq kheel yaqnoil juq bhai ovq nail ngaol. <sup>15</sup> Ngala nulujuq bhai maldil dai, ge lavq bhel. Yaqnoil khe-ai Miqyail Milkhaoq bhai maq hav bhoel nail tsaol-aq khul gaq maqkhaiq, a bhai maq ya aol lai-ail” dai, ge bhiq-a nail ngaol. <sup>16</sup> A bhai nee ngal-aq, yaqnoil al juq bhai aivq tsiq khi, aqyu juq nail kovtavq

bhai aqlavq bavq dav khi geeqlaoq bivq-a nail ngaol.

*Hulmeeq hulbhao juq khi mail Miqyail Milkhaoq nail ganl*

<sup>17</sup> Yeiqsul gailkhaol dov ail nail khi-u phao, tsaol-aq teevq gaq tsaol leevq khi, aivq nail siv-tavq bhai peevqceevq kovdoiq doiq khi ge nail: “Meeq nail saqlaq-ol, nqmaq maqluv halyeel doevq nail pha q ya kivq dai, ngal khul pha q ya nl nail-aiq” dai, Yeiqsul bhai naldaiq bhiq-a nail ngaol.

<sup>18</sup> Yeiqsul ge nail: “Khul khi mail naol ngaq bhai meeq nail saqlaq dai, khul nail-aiq. Miqyail maq ngel nail neq, meeq nail teevq gaq-ail maq jaol-ail. <sup>19</sup> Naol aoldaoq kovqdaoq heeq nia nail ngaol. Yu bhai tha q lav heivq. Yu nail khaqma nee tha q bheeq tha q leel. Yu nail nlmaoq tha q khoiq. Yu bhai maq tsa q nail salkhil tha q kha nq. Yu bhai goiqbhaoq bhaoq khi tha q geel ja q. Naoq nail aqbhu aqma bhai ev yaoq” dai, ge bhiq-a nail ngaol.

<sup>20</sup> “Saqlaq-ol, ngal yaqnoil-ail jiav-u phao nee, aoldaoq kovqdaoq al juq iqsanl mail, naldaiq gil-aq nail ngaol” dai, tsaol-aq al gaq Yeiqsul bhai ge kovq bhiq-a nail ngaol.

<sup>21</sup> Yeiqsul aivq bhai heldaiq khi aivq bhai gaiq-a nail ngel-i mail, ge bhiq-a nail: “Naol teevq pha q loq-ai ha q nail niil. Naol kovq ail khi naoq nail ilda q maoggaiq iqsanl mail ga oq ha khi, ha q ya q aq ya q juq bhai bhoil bhiq ya oq. Alhai nl ha q neq, nqtavq kovtavq bhai ma o-ail phoiq nail naoq nail phul heel ilda q maoggaiq jiav lal

naol. Aq-u phao, naol kovq lal khi, ngaq nail haoqnao tsaotherl lavq yaoq” dai, ge bhiq-a nail ngaol.

<sup>22</sup> Tsaol-aq al gaq daoq al daoq ya gaiq-u phao, maivphaoq niaq laq khel dai pevq ail khi, noeqhaq deedee nail lavqkhoel nee kovq ail-a nail ngaol. Khul khi mail dai ngal-aq neq, aivq neq, ildaog maoqgaiq maodai jiav nail ngaol.

<sup>23</sup> Yeiqsul aivq nail yaqlaol juq jaol nail phao tsiq phaoq khi, “Hulmeeq hulbhao juq, Miqyail Milkhaoq lavqkhoel bhai aol lai nail neq, khadai haq nail ngel-ail” dai, ge bhiq-a nail ngaol.

<sup>24</sup> Daoq al daoq bhai yaqlaol juq ya gaiq-u phao, noeq-u maq dov dai, pevq ail-a nail ngaol. Thailhai ngaol-aog, Yeiqsul gaoq ge nail: “Ngaq nail yaq juq-ol, Miqyail Milkhaoq bhai aol lai nail neq, khadai haq nail ngel-ail.

<sup>25</sup> Laolthao geevqjieivq geeq naq bhai aol lai nail neq, hulmeeq hulbhao juq Miqyail Milkhaoq lavqkhoel bhai aol lai nail nee maqtsil ngaq-aig jaiq nail ngaol” dai, ge bhiq-a nail ngaol.

<sup>26</sup> Aqyu juq daoq al daoq bhai ya gaiq-u phao, noeq-u maq dov dai, gaoq pevq deedee-ail khi, “Thailhai phal-iq neq, khaq sil gaq hevqkovq nail pha q ya nia nail-aig” dai, aqyu juq nail gaiqlaq bhai naldaiq pheeljaq-a nail ngaol. <sup>27</sup> Yeiqsul aqyu juq bhai heldaiq khi ge nail: “Niil neq, tsaol-aq yaq nl nia nail pha q maq ngel-ail. Thailhai ngaol-aog, Miqyail nl nia nail ngaol. Miqyail maq nl nia nail teevq pha q iqsanl maq jiav-ail” dai, ge bhiq-a nail ngaol.

*Yaqlaol juq ya nail pha q*



<sup>28</sup> Aq-u phao, Bheigtuvluv ge nail: “Heldaiq yaoq. Nvjuq yaoq pha q yaoq-ao nee khaonq ha-ail ceevq khi, naoq nail haoqnao tsaothe thailthaiq nail ngaol” dai, ge bhiq-a nail ngaol.

<sup>29</sup> Yeiqsul ge nail: “Ngal nuljuq bhai maldil dai, ge lavq bhel. Ngaq nail haqbhoil khi mail lavqkhiq tsail nail geeqlaoq daoq nail haqbhoil, yovqgavq nail ilkhaol, aqivq jaqbheq, aqbhu aqma, yaqmiq yaqyov khi daiyal, niil juq bhai khaonq ha-ail ceevq-a nail tsaol-aq khul gaq maqkhaiq, <sup>30</sup> yeel niil yeel nail lavqkhoel ilkhaol, aqivq jaqbheq, aqma, yaqmiq yaqyov, daiyal, niil juq teevq yal bhoil ya kovq nail ngaol. Alheel nee mail teevq gaq khe-ai, khoeq nail jiovg nail pha q iqsanl ya daq nail ngaol. Yaqhao khe yeel lavqkhoel bhai neq, nqmaq maqluv halyeel doevq nail pha q iqsanl ya nail ngaol. <sup>31</sup> Thailhai ngaol-aoq, niil aq-il yu nail iqmoeq jaol nail tsaol-aq maodai yu nail haoqnao ya jaol nail ngaol. Niil aq-il yu nail haoqnao jaol nail tsaol-aq maodai yu nail iqmoeq ya jaol nail ngaol” dai, ge bhiq-a nail ngaol.

*Yeiqsul aivq ya sil nail ganl, hail pov teevq pov ge-a nail*

<sup>32</sup> A bhai nee ngal-aq, aqyu juq Yeiqsulsaqlaiq meenq bha lai-a nail ngaol. Gailphail bhai lai thailthaiq-u phao, Yeiqsul aqyu juq nail iqmoeq lai-a nail ngaol. Yaqlaol juq noeq-u maq dov-ail pevq-ail khi, haoqnao phao tsaothe jaol nail tsaol-aq juq neq, geesil nail ngaol. Aq-u phao, Yeiqsul gaqkhoel tsel-nvq gaq bhai khul khi, aivq khalhai ya daq nail ganl iqsanl, aqyu juq bhai

ge bhiq-a nail ngaol. <sup>33</sup> “Naldaiq yaoq. Ngadao juq Yeiglulsaqlaiq meenq bha lai thailthaiq nail ngaol. Tsaol-aq nail Yaqyov neq, a bhai Philma juq khi mail aoldaoq kovqdaoq cavq nail cov nail juq nail aqlavq lavqkhoel bhai, yu-i mail av bhiq nail bhai ya daq nail ngaol. Aivq ya sil dai, aqyu juq yalkhaq dal nail ngaol. A bhai nee ngal-aq, yu nail jeq-e nail aqlavq lavqkhoel bhai av bhiq nail ngaol. <sup>34</sup> Aqyu juq aivq bhai khal nl movq-ail nl nail ngaol. Thaiqkhaq iqsanl thaiqbav khi, aivq bhai neeqtsaq-i mail jiiqv gaq haq neq, heivq nail ngaol. Thailhai ngaol-aog, hail n kev lal haq neq, aivq gaoq doevq kovq lal nail ngaol” dai, Yeiqsul aqyu juq bhai ge bhiq-a nail ngaol.

*Yaqkov khi mail Yaolhaq jaol duq aqmeeq hal nail ganl*

<sup>35</sup> Aq-u phao, Seiqbheiqdail nail yaqyov Yaqkov khi mail Yaolhaq Yeiqsul jaol nail bha lal khi, “Saqlaq-ol, nv-nvq mail-i mail hal nail khe-ai nv-nvq mail bhai, bhi nl lavq movq-ail nial” dai, aivq bhai ge bhiq-a nail ngaol.

<sup>36</sup> “Nul-nq nvq mail nail haqbhoil ngal khul bhi nl bhiq movq nail-aiq” dai, Yeiqsul aqyu nvq mail bhai, naldaiq bhiq-a nail ngaol.

<sup>37</sup> Aqyu nvq mail ge nail: “Seiqleiq khaoqsail eeq nail milkhaoq lavqkhoel, naoq nail joiqjaq doiqbev kovtavq bhai naol jaoldeel-u phao, nv-nvq mail bhai lavqmal phao teevq gaq, lavqtsel phao teevq gaq dai, bhi jaoldeel lavq yaoq” dai, hal-a nail ngaol.

<sup>38</sup> Yeiqsul ge nail: “Nul-nq nvq mail hal nail phaḡ bhai nul-nq nvq mail maḡ heeq nia-ail. Nul-nq nvq mail ngal ya daol nail khaoḡanḡ daol tsaol naol laiq. Nul-nq nvq mail ngal ya daḡ nail khoeḡ bhiḡ jioḡvḡ bhiḡ nail phaḡ, daḡ tsaol naol laiq” dai, aḡyu nvq mail bhai nalḡaiḡ bhiḡ-a nail ngaol.

<sup>39</sup> “Daḡ tsaol daol tsaol naol” dai, aḡyu nvq mail ge kovḡ bhiḡ-u phao, Yeiqsul gaḡḡ ge nail: “Nul-nq nvq mail ngal ya daol nail khaoḡanḡ ya daol naol. Al ovḡtavḡ, nul-nq nvq mail ngal ya daḡ nail khoeḡ bhiḡ jioḡvḡ bhiḡ nail phaḡ ya daḡ naol. <sup>40</sup> Thailhai ngaol-aḡḡ, ngaḡ nail lavḡmal phao lavḡtsel phao bhi jaolḡeel dai, ngal maḡ nl kivḡ-ail. Jaol duḡ al neḡ, Miḡyail-i mail tsel dov-ai thaḡ nail tsaol-aḡ nail haḡbhoil lav sav-ai thaḡ nail ngaol” dai, aḡyu nvq mail bhai ge bhiḡ-a nail ngaol.

<sup>41</sup> Aḡyu nvq gaḡ nail aḡtsaḡḡ yaḡlaol tsel gaḡ ganl al ya gaiḡ-u phao, Yaḡkov khi mail Yaolhaḡ aḡyu nvq mail bhai neema phail lal bhiḡ-a nail ngaol. <sup>42</sup> Alheel ngel-i mail, Yeiqsul aḡyu juḡ iqsanl bhai khul jil khi, niailhai ge bhiḡ-a nail ngaol: “Yu nail jeḡ-e nail heeqphaḡ heeq ma juḡ neḡ, milkhaoḡ yaḡ juḡ nail kovtavḡ bhai uvthaiḡ nail bhaḡaḡḡ jiaḡ khi, aḡivḡ aḡtsu jioḡvḡ khi uvthaiḡ nail juḡ iqsanl yovḡgavḡ khal noeḡ nail khe-ai uvthaiḡ nia nail bhaḡaḡḡ jiaḡ nail ngaol dai, nuljuḡ heeq nia nail ngaol. <sup>43</sup> Thailhai ngaol-aḡḡ, nuljuḡ alhai maḡ ya khi-ail. Nuljuḡ nail lavḡkhoel yu nee maḡtsil eeḡ movḡ heel movḡ nail khul gaḡ maḡkhaiḡ, nuljuḡ nail yaḡkav ya jioḡvḡ nail ngaol. <sup>44</sup> Nuljuḡ nail lavḡkhoel aḡivḡ

jiovq movq nail khul gaq maqkhaiq, tsaol-aq iqsanl nail yaqkav ya jiovq nail ngaol. <sup>45</sup> Khul khi mail dai ngal-aq, Tsaol-aq nail Yaqyov neq, yu aivq nail yaqkav bhi jiovq nail dai khi, lee-a nail maq ngel-ail. Aivq yu nail yaqkav jiovq lee khi, tsaol-aq maodai bhai ul kovq lee nail dai khi, sildan lee-a nail ngaol” dai, ge bhiq-a nail ngaol.

*Maivpeivq peivq nail Bhaqthilmal maivneev moel nia lal-a nail ganl*

<sup>46</sup> A bhai nee ngal-aq, Yeiqsul khi mail aivq nail yaqlaol juq Yeiqlikhol meenq bhai ail kev khi pultavq, aqyu juq tsaol-aq munl munl ma juq nee mail, Yeiqlikhol meenq nee dov ail-a nail ngaol. Aq-u phao, Thilmal nail yaqyov Bhaqthilmal dai mil-ai thaq nail maivpeivq peivq nail teevq gaq, gailkhaol gailbhaq bhai jaoldeel-nvq thaq nail ngaol. Aivq neq, hal jaq hal daol nail tsaol-aq ngaol. <sup>47</sup> A bhai ail thailthaiq nail al gaq, Naqsaqlail meenq yaq Yeiqsul ngaol dai, Bhaqthilmal ya gaiq-u phao, “Daqbhil nail Yaqyov Yeiqsul-ol, ngaq bhai gaoqhaq lavq yaoq” dai, aivq bhai aqkav kav dai, gul bhiq-a nail ngaol.

<sup>48</sup> Yu maodai aivq bhai khaq bhiq khi, “Aqtsi tsu dai jaol yaoq” dai, ge bhiq-a nail ngaol. Thail-hai ngaol-aq, aivq maq naldaiq dai, iqmoeq-u nee maqtsil gul kav lal khi, “Daqbhil nail Yaqyov-ol, ngaq bhai gaoqhaq lavq yaoq” dai, gul bhiq-a nail ngaol.

<sup>49</sup> Aq-u phao, Yeiqsul naq lai khi, “Aivq bhai khul lavq yaoq” dai, ge bhiq-a nail ngaol. Aqyu

juq maivpeivq al gaq bhai khul khi ge bhiq lai-a nail: “Gaq maq bhaq dai, thul yaoq. Aivq naoq bhai khul thailthaiq nail ngaol” dai, ge bhiq-a nail ngaol. <sup>50</sup> Tsaol-aq al gaq aivq nail phailkhaq heelma loev ha-ail ceevq khi, tsaq thul khi mail, Yeiqsul jaol nail bha lal-a nail ngaol.

<sup>51</sup> “Naoq nail haqbhoil ngal khul bhi nl bhiq movq nail-aiq” dai, Yeiqsul aivq bhai naldaiq-u phao, “Saqlaq-ol, ngaq nail maivneev moel lal dai, bhi nl lavq movq-ail nial” dai, hal bhiq-a nail ngaol.

<sup>52</sup> “Kovq ail yaoq. Naol ngaq bhai neema thaqtsaol nail ngel-i mail, mee q lai-a nail ngaol” dai, Yeiqsul aivq bhai ge bhiq-a nail ngaol. Tsaol-aq al gaq teevq pov taivq-ail maivneev moel lal khi, Yeiqsul nail haoqnao tsaohel-aivq-a nail ngaol.

## 11

*Yeiqsul moeqphaq laljieiv jeeq khi Yeiqsul-saqlaiq meenq bha aol lai-a nail ganl*

<sup>1</sup> Yeiqsul khi mail aivq nail yaqlaol juq Yeiqsul-saqlaiq meenq bha lai kev nail aqjail jail lal khi, Saqlaq gaoqjaq nail aqjail bhai jiav nail Bheilphaqjeiq julgu khi mail Bheilqtaqnil julgu bhai lai kev-u phao, Yeiqsul aivq nail yaqlaol nvq gaq bhai iqmoeq phao, khoel gai-aivq-a nail ngaol. <sup>2</sup> Aivq yaqlaol al nvq gaq bhai ge bhiq-a nail: “Nul-nq nvq gaq iqmoeq phao jiav nail julgu bhai lai yaoq. Nul-nq nvq gaq julgu bhai aol lai teevq thaiq tsaol-aq teevq gaq iqsanl maq jeeq

daiq-a nail moeqphaq laljieiv maol yaq teevq maol pheethaiq-ai thaq khi jaol nail bhai, ya moel naol. Cevpheel khi niilniai tseel leevq yaoq. <sup>3</sup> ‘Khul khi mail thailhai nl nail-aiq’ dai, tsaol-aq teevq gaq ganav naldaiq lal haq neq, ‘Heeqphaq loq nail ngaol. Lavqtsail mail gaoq bhi tseel kol leevq naol’ dai, ge bhiq yaoq” dai, Yeiqsul aqyu nvq gaq bhai ge bhiq-a nail ngaol.

<sup>4</sup> Aqyu nvq gaq lai thailthaiq-u phao, gailkhaol gailbhaq khe ilkhaol teevq il nail lolgov bhai pheethaiq-ai thaq nail moeqphaq laljieiv maol yaq teevq maol moel khi, neeqtsaq cevphael-a nail ngaol. <sup>5</sup> Aq-u phao, a bhai thulphaol nail tsaol-aq juq: “Nul-nq nvq gaq moeqphaq laljieiv maol yaq nail neeqtsaq pheel khi, khul khi nail-aiq” dai, naldaiq bhiq-a nail ngaol. <sup>6</sup> Yeiqsul aqyu nvq gaq bhai ge bhiq-ai thaq nail khe-ai, aqyu nvq gaq ge kovq bhiq-u phao, aqyu juq maq lav tsoiq dai, bhi tseel laivq-a nail ngaol. <sup>7</sup> Moeqphaq laljieiv maol yaq al maol bhai Yeiqsul jaol nail bha tseel lavq khi, aqyu juq nail aqgaq aqdoi kheq dav bhiq khi, Yeiqsul bhai bhi jeeq-a nail ngaol. <sup>8</sup> Tsaol-aq maodai yovqgavq nail aqgaq aqdoi yovqgavq gailkhaol bhai kheq-a nail ngaol. Teevq pav ganav juq neq, yaljal bhai bhuq tsil khi, gailkhaol bhai kheq-a nail ngaol. <sup>9</sup> Aivq nail iqmoeq khi haoqnao tsaothe thailthaiq nail juq nailhai gul nail ngaol:

“Hoqsaqnaq,\*  
Heeqphaq Miqyail nail

---

\* **11:9** 11.9 Hoqsaqnaq dai, ge nail neq, heeqphaq bhai tsiq eeq nail daoq ngaol.

aqmil kov-uvq nee  
 lee nail gaq  
 geeqlaoq eeq dei-eiq.  
<sup>10</sup> Kev lee thailthaiq nail  
 ngadao nail aqbhal  
 heeqphaq Daqbhil  
 nail milkhaoq  
 geeqlaoq eeq dei-eiq.  
 Hoqsaqnaq,  
 nqtavq kovtavq  
 bhai iqsanl,  
 aivq bhai  
 tsiq eeq dei-eiq" dai,  
 mailma-ail gul nail ngaol.

<sup>11</sup> A bhai nee ngal-aq, Yeiqsul Yeiqulsaqlaiq  
 meenq bha aol lai khi, uqhuq thaoq nail ilkhaol  
 il ma bhai lai-a nail ngaol. Aivq yaoq phaq yaoq-  
 ao nee mail heldaiq doi gaq-u phao, nqkivq kivq  
 lee-a nail ngel-i mail, gaqkhoel tsel-nvq gaq hevq  
 khi, Bheiqtaqnil julgu bhai lai-a nail ngaol.

*Heeqguq aqbhaol bhai Yeiqsul iqkhail yavq-a nail ganl*

<sup>12</sup> Yaoq n yaoq, aqyu juq Bheiqtaqnil julgu  
 nee mail dov ail-u phao, Yeiqsul aoq moevq  
 lal bhiq-a nail ngaol. <sup>13</sup> Aivq eqyal bhai lee  
 thailthaiq-u phao nee, aqpavq maodai covq nail  
 heeqguq aqbhaol teevq bhaol ya moel-a nail  
 ngaol. Aqbhaol al bhaol aqheeq heeq-ail lai dai,  
 heldaiq ail-a nail ngaol. Aivq aqjail bhai ail kev-u  
 phao, heeqguq aqheeq heeq nail yanq maq tsaq  
 nail ngel-i mail, aqpavq taivq-ail covq nail bhai  
 ya moel-a nail ngaol. <sup>14</sup> "Yanqgaol nee ngal-aq,

naoq nail aqheeq bhai tsaol-aq teevq gaq iqsanl thaq ya jaq dei-eiq” dai, Yeiqsul heeqguq aqbhaol al bhaol bhai ge bhiq-a nail ngaol. Aivq alhai ge nail bhai aivq nail yaqlaol juq gaiq-a nail ngaol.

*Uqhuq thaoq nail ilkhaol il ma bhai lav haol-a nail ganl*

<sup>15</sup> Aqyu juq Yeiquksaqlaiq meenq bha lai kev-u phao, Yeiqsul uqhuq thaoq nail ilkhaol il ma nail khainl lavqkhoel bhai aol lai khi, a bhai yalkav gaq yalkav ul nail tsaol-aq juq bhai the ha khi, phul dovq phal bhiq thailthaiq nail tsaol-aq juq nail kovqkhail khi mail, khaqkhoiq gaq thailthaiq nail juq nail doiqbev bhai maqkhaiq, ngaoq ha-a nail ngaol. <sup>16</sup> Yalkav teevq pha q ganav phi phi-ail, uqhuq thaoq nail ilkhaol il ma nail khainl lavqkhoel nee, maq ya ail pav ail dai, Yeiqsul aqyu juq bhai lav tsoiq-a nail ngaol.

<sup>17</sup> “Ngaq nail ilkhaol bhai,

jeq-e jaq-a

iqsanl nail haqbhoil

geeqlaoq hal nail ilkhaol dai,

ya khul naol’ dai,

geevq-ai thaq khi ngaol-aq, nuljuq ilkhaol niil il bhai khoiqbhaq tsaolpheel nail ilkhaol bhi pevq lal thaq nail niil” dai, Yeiqsul aqyu juq bhai cavq bhiq cov bhiq-a nail ngaol.

<sup>18</sup> Philma juq khi mail aoldaoq kovqdaoq cavq nail cov nail juq daoq al daoq ya gaiq-u phao, Yeiqsul bhai heivq nail haqbhoil gailkhaol halpov-a nail ngaol. Khul khi mail dai ngal-aq neq, tsaol-aq munl juq iqsanl mail, aivq cavq bhiq cov bhiq nail bhai noe-q-u maq dov dai,



pevq ail-a nail ngel-i mail, Philma juq khi mail aoldaoq kovqdaoq cavq nail cov nail juq Yeiqsul bhai geesil nail ngaol.

<sup>19</sup> Nqkivq kivq lee-u phao, Yeiqsul khi mail aivq nail yaqlaol juq meenq nee mail dov ail-a nail ngaol.

*Heeqguq aqbhaol al bhaol bhagul gul lai-a nail ganl*

<sup>20</sup> Yaoq n yaoq nqhao navqmav-ail, gailkhaol al khaol bhai aqyu juq gaoq lee-u phao, heeqguq aqbhaol al bhaol daoqtsail bhai kev dai, bhagul gul-ai thaq khi jiav nail bhai ya moel-a nail ngaol.

<sup>21</sup> Aq-u phao, Bheiqtuvluv noeq dov lal khi, "Saqlaq-ol heldaiq. Naoq-i mail iqkhail yavq-a nail aqbhaol al bhaol, bhagul gul ail-aog thaq nial" dai, Yeiqsul bhai ge bhiq-a nail ngaol.

<sup>22</sup> Yeiqsul aqyu juq bhai ge bhiq-a nail: "Miqyail bhai neema thaqtsaol yaoq. <sup>23</sup> Ngal nuljuq bhai maldil dai, ge lavq bhel. Tsaol-aq khul gaq maqkhaiq, neema pov pov lav lav dai maq pevq mail, yovqgavq-i mail khal ge-a nail khe-ai pevq lal naol dai, neema thaqtsaol nail lavqkhoel, gaoqjaoq niil jaoq bhai, 'Naoq nail jaol duq nee dov ail khi, iqyaq iqma bhai ga puvq ail yaoq' dai, ge bhiq-u phao, aivq-i mail khal ge nail khe-ai pevq lal nail ngaol.

<sup>24</sup> Alheel ngel-i mail, ngal nuljuq bhai ge lavq bhel. Nuljuq teevq pha q ganav ya dai, geeqlaoq hal-u phao, ya naol dai, neema thaqtsaol khi hal haq neq, nuljuq-i mail khal hal nail pha q ya nail ngaol. <sup>25</sup> Nuljuq thul khi geeqlaoq hal-u phao, naol tsaol-aq teevq ga q ganav nail kovtavq bhai

oeqbal thaq thailthaiq nail ngel haq neq, oeqbal al phaiq bhiq yaoq. Alhai nl haq neq, nqtavq kovtavq bhai jaol nail nuljuq nail Aqbhu iqsanl, nuljuq-i mail nl bheeq lav bheeq-a nail pha q bhai oeqbal phaiq lavq nail ngaol” dai, ge bhiq-a nail ngaol.

<sup>26</sup> [Thailhai ngaol-aoq, nuljuq yu bhai oeqbal maq phaiq bhiq haq neq, nqtavq kovtavq khe jaol nail nuljuq nail Aqbhu iqsanl nuljuq-i mail nl bheeq lav bheeq-a nail pha q bhai oeqbal maq phaiq lavq-ail.]

*Khaq sil gaq naoq bhai alyaq bivq lavq-a nail dai, Yeiqsul bhai naldaiq bhiq-a nail ganl*

<sup>27</sup> Aqyu juq Yeiglulsaqlaiq meenq bha teevq pov gaoq lai kev-a nail ngaol. Yeiqsul uqhuq tha q nail ilkhaol il ma bhai tsa o thailthaiq-u phao, Philma juq, aoldaoq kovqdaoq cavq nail cov nail juq khi mail, Yuldav tsaol-aq nail aqivq aqtsu juq aivq jaol nail bha lal khi ge nail:  
<sup>28</sup> “Naol khaq bha khe alyaq ya khi niil juq nl thailthaiq nail-aiq. Khaq sil gaq naoq bhai alyaq bivq lavq-a nail-aiq” dai, naldaiq bhiq-a nail ngaol.

<sup>29</sup> Yeiqsul aqyu juq bhai ge kovq bhiq-a nail: “Ngal nuljuq bhai teevq daoq naldaiq la dei-eiq. Nuljuq ge kovq lavq haq neq, ngal khaq bha khe alyaq ya khi niil juq nl thailthaiq nail ganl, nuljuq bhai ge bhiq naol. <sup>30</sup> Yaolhaq ulcuvq saol bhiq-a nail al, Miqyail-i mail bhi nl tha q nail lai q. Maq ngel haq neq, tsaol-aq-i mail bhi nl tha q nail lai q. Ngaq bhai ge lavq yaoq” dai, aqyu juq bhai ge bhiq-a nail ngaol.

<sup>31</sup> Aq-u phao, aqyu juq nail gaiqlaq bhai niailhai ge tsaol pheeljaq-a nail ngaol: “Miqyail-i mail bhi nl thaq nail ngaol dai, ngadao ge haq neq, ‘Thailhai phal-iq neq, nuljuq khul khi mail Yaolhaq bhai neema maq thaqtsaol nail-aig’ dai, Yeiqsul ge lal nail ngaol. <sup>32</sup> Tsaol-aq-i mail bhi nl thaq nail ngaol dai, ge heeq laiq” dai, aqyu juq nail gaiqlaq bhai maoqbhaoq nl pheeljaq-a nail ngaol. Yaolhaq neq, Miqyail nail haqbhoil gedan nail gaq ngaol dai, tsaol-aq iqsanl mail saol-nvq-ai thaq nail ngel-i mail, aqyu juq tsaol-aq munl al juq bhai geesil nail ngaol.

<sup>33</sup> Alheel ngel-i mail, “Nvjuq maq heeq kivq” dai, aqyu juq Yeiqsul bhai ge kovq bhiq-a nail ngaol. Yeiqsul ge nail: “Alhai dul dai, khaq sil gaq-i mail ngaq bhai alyaq bivq lavq khi ganl niil juq nl thailthaiq nail bhai, nuljuq bhai maq ge bhiq-ail” dai, aqyu juq bhai ge bhiq-a nail ngaol.

## 12

*Aqheeq tsilju nail gaoqkhail khi mail al nail lavqkhoel bhai ganl nl nail juq nail ganl*

<sup>1</sup> A bhai nee ngal-aq, Yeiqsul aqyu juq bhai daoqma uqhuq daoq niil daoq ge bhiq-a nail ngaol: “Aq-u phao, tsaol-aq teevq gaq jaol lao thaq nail ngaol. Teevq n neq, aivq aqheeq tsilju nail aqjiiv kha khi, gaoqkhail aqmeeq-ai nl tsoiq khi, aqheeq tsilju nail ullul naoq dov duq lav sav khi, gaoqkhail bhai lovq nail ilkhaol daqmoe teevq il cov-a nail ngaol. A bhai nee ngal-aq, gaoqkhail nl nail juq bhai ngaq bhiq-ail ceevq khi, yaoq khaoq yaoq mil yaoq bhai ail-a nail

ngaol. <sup>2</sup> Aqheeq tsilju nail aqheeq mi lal khi koevq nail yanq tsaq lal-u phao, gaoqkhail al khail khe aqheeq tsilju aqheeq aivq bhai ovq nail juq ya dai, gaoqkhail nl nail juq jaol nail bha aivq nail yaqkav teevq gaq bhi lai-a nail ngaol. <sup>3</sup> Thailhai ngaol-aoq, gaoqkhail nl nail juq yaqkav al gaq bhai, nieivq thaiq khi deeq khi aqnieivq-ail bhi kovq ail-a nail ngaol. <sup>4</sup> Yaoq pov yaoq, yaqkav yaoq gaq yaoq bhai aqyu juq jaol nail bha gaoq bhi lai-a nail ngaol. Aqyu juq yaqkav al gaq nail uqhuq deeq pav khi, khal nl movq-ail nl bhiq-a nail ngaol. <sup>5</sup> Yaoq pov yaoq, yaqkav yaoq gaq yaoq bhai aqyu juq jaol nail bha gaoq bhi lai-u phao, aqyu juq aivq bhai deeq heivq-a nail ngaol. Yaqkav yaoq juq yaoq mee nia gaq bhai gaoq bhi lai-u phao, aqyu juq teevq pav ganav juq bhai deeq khi, teevq pav ganav juq bhai, deeq heivq-a nail ngaol.

<sup>6</sup> Aq-u phao, aivq mailma-ail gaiq-a nail aivq nail yaqyov teevq gaq taivq-ail jail lal-a nail ngaol. 'Aqyu juq ngaq nail yaqyov bhai ev-ail jaol-aq' dai, ge khi, haoqnao naosaq khe pov neq, aivq nail yaqyov bhai bhi lai-a nail ngaol.

<sup>7</sup> Thailhai ngaol-aoq, gaoqkhail nl nail juq ge nail: 'Aivq neq, jaiqbhoil ovq nail gaq ngaol. Yaoq. Aivq bhai heivq bhel. Alhai nl haq neq, aivq nail jaiqbhoil ngadao juq ya nail ngaol' dai, aqyu juq nail gaiqlaq bhai ge nail ngaol. <sup>8</sup> A bhai nee ngal-aq, aqyu juq aivq bhai nieivq khi, heivq khi, gaoqkhail lavqniil phao he ha ail-a nail ngaol.

<sup>9</sup> Gaoqkhail nail ilheel gaq gaoqkhail nl nail juq bhai khalhai nl bhiq nail dai, nuljuq noeq nail-

aiq. Aivq kovq lal khi, aqyu juq bhai heivq khi, gaoqkhail al khail yaoq juq yaoq bhai, gaoq ngaq bhiq nail ngaol.

10-11 'Ilkhaol cov nail  
tsaol-aq-i mail  
bavq ha-a nail  
lov mav al heeq,  
jioivqloiv daoqthaoq bhai  
kaovq-a nail  
lov mav heeq ma  
pevq lal nail ngaol.  
Heeqphaq Miqyail-i mail  
alhai nl-ai thaq al neq,  
ngadao nail sivtavq bhai  
noeq-u maq dov nail pha  
pevq nail ngaol' dai,

Jalliq lavqkhoel bhai gevq-ai thaq nail bhai nuljuq maq ge daiq al laiq" dai, ge bhiq-a nail ngaol.

<sup>12</sup> "Daoqma uqhuq daoq niil daoq ngadao juq bhai ge movq nail niil" dai, Yuldav tsaol-aq nail aqivq aqtsu juq heeq nia nail ngel-i mail, aqyu juq Yeiqsul bhai nieivq movq-ai bhiq nail ngaol. Thailhai ngaol-aoq, aqyu juq tsaol-aq munl munl ma bhai geesil nail ngel-i mail, aivq bhai maq nieivq dai, dov ail-a nail ngaol.

*Heeqphaq Gailsaq bhai khaon dov bhiq nail ganl*

<sup>13</sup> Aq-u phao, khalhai khi mail Yeiqsul daoq ya ge bheeq dai, Yuldav tsaol-aq nail aqivq aqtsu juq Phaqliqsail teevq pav ganav juq khi mail Heiqlol nail tsaol-aq teevq pav ganav juq bhai,

Yeiqsul jaol nail bha khoel gai-aivq-a nail ngaol. <sup>14</sup> Aqyu juq lal khi ge nail: “Saqlaq-ol, naol neq, maldil tsaq nail daoq taivq-ail ge nail ngaol. Naol teevq gaq bhai iqsanl maq geesil-ail dai, nvjuq heeq kivq naol. Naol maivphaoq eeq nil maq tsel dai, Miqyail nail gailkhaol daolcoev dai, cavq bhiq cov bhiq nail ngaol. Heeqphaq Gailsaq bhai khaon dov bhiq nail tsaq naol laiq. Maq tsaq-ail laiq. Ngadao juq khaon ya dov bhiq naol laiq. Maq ya dov bhiq-ail laiq” dai, Yeiqsul bhai naldaiq bhiq-a nail ngaol. <sup>15</sup> Aqyu juq moeqthaoq teevq pha q ge khi, neema teevq pha q aol nail bhai Yeiqsul heeq nia khi ge bhiq-a nail: “Khul khi mail nuljuq ngaq bhai laonqdaiq nail-aiq. Ngal ya moel dai, phul teevq bavq oil lavq daiq yaoq” dai, aqyu juq bhai ge bhiq-a nail ngaol. <sup>16</sup> Aqyu juq iqsanl oil lavq-a nail ngaol. “Khaq sil gaq nail maolkhoel, khaq sil gaq nail aqmil aol nail ngel-aiq” dai, Yeiqsul aqyu juq bhai naldaiq-u phao, “Heeqphaq Gailsaq nail niil” dai, aqyu juq ge kovq bhiq-a nail ngaol.

<sup>17</sup> “Gailsaq bhai tavq nail pha q neq, Gailsaq bhai bivq yaoq. Miqyail bhai tavq nail pha q neq, Miqyail bhai bivq yaoq” dai, Yeiqsul aqyu juq bhai ge bhiq-u phao, aqyu juq aivq bhai noeq-u maq dov dai, pevq ail-a nail ngaol.

*Gaoq doevq kovq lal nail ganl, Yeiqsul bhai naldaiq-a nail*

<sup>18</sup> A bhai nee ngal-aq, sil tha q nail tsaol-aq ma q doevq kovq lal nia-ail dai, ge nail Saqduqgail teevq pav ganav juq, Yeiqsul jaol nail bha lal

khi, niailhai naldaiq lal-a nail ngaol: <sup>19</sup> “Saqlaq-ol, Molseiq ngadao nail haqbhoil niailhai gevq-ai thaq nail ngaol. Tsaol-aq teevq gaq nail algao, yaq maq jaol lee-u nee sil haq neq, algao gaq nail jeq-e jaq-a maq ya peivq-ail dai, jaqbheq gaq aivq nail aqtsu bhai ya hevq nail ngaol dai, gevq-ai thaq nail ngaol. <sup>20</sup> Jel lal-u phao, mailnail sivq gaq jaol-a nail ngaol. Aqivq ivqsaq gaq khaqma hevq khi, yaq maq jaol lee-u nee mail, sil-a nail ngaol. <sup>21</sup> Nvq gaq teevq gaq iqsanl yaqmai-aq al gaq bhai hevq khi, yaq maq jaol lee-u nee mail sil-a nail ngaol. Hail gaq teevq gaq iqsanl alhai sil-a nail ngaol. <sup>22</sup> Alhai dul dai, mailnail sivq gaq sivq gaq-ail yaq maq jaol lee-al. Mailnail al juq sil gil-a ngal neq, yaqmai-aq al gaq iqsanl sil-a nail ngaol. <sup>23</sup> Thailhai phal-iq neq, sil thaq nail tsaol-aq gaoq doevq kovq lal-u n-gaol, yaqmai-aq al gaq khaq sil gaq nail khaqma pevq nail-aiq. Khul khi mail dai ngal-aq neq, aqyu juq mailnail sivq gaq sivq gaq-ail yaqmai-aq al gaq bhai hevq-a nail ngaol” dai, ge bhiq-a nail ngaol.

<sup>24</sup> Yeiqsul aqyu juq bhai ge kovq bhiq-a nail: “Nuljuq neq, Jalliq bhai iqsanl, Miqyail nail bhaqaoq bhai iqsanl maq heeq nia nail ngel-i mail noeq bheeq-ai thaq nail niil. <sup>25</sup> Sil thaq nail tsaol-aq gaoq doevq kovq lal-u n-gaol, hevq pheel maol pheeljaq nail phaqaq maq bhao-ail. Nqtavq gaqkhoel khe-ai pevq lal nail ngaol. <sup>26</sup> Sil thaq nail tsaol-aq gaoq doevq kovq lal nail ganl ge lavq bhel. Miqyail Molseiq bhai ge bhiq-a nail khe-ai, Molseiq-i mail gevq-ai thaq nail haoqgavq lavqkhoel-ai nuljuq maq ge daiq al laiq. Jiavbuv nail ganl gevq-ai thaq nail al dao

bhai, niailhai ge vq-ai thaq nail ngaol: ‘Ngal neq, Aqbhaqlaqlaqaq nail Miqyail, Ilcav nail Miqyail khi mail Yaqkov nail Miqyail ngaol’ dai, Miqyail Molseiq bhai ge bhiq-a nail ngaol. <sup>27</sup> Aivq neq, sil-a nail tsaol-aq nail Miqyail maq ngel-ail. Aqdoevq doevq nail tsaol-aq nail Miqyail ngaol. Alheel ngel-i mail, nuljuq noeq bheeq deede-ai thaq nail niil. Khul khi mail dai ngal neq, sil-a nail tsaol-aq neq, gaoq doevq kovq lal nail ngaol” dai, ge bhiq-a nail ngaol.

*Aoldaoq kovqdaoq iqsanl nail lavqkhoel khe eeq jaiq nail daoq*

<sup>28</sup> Aq-u phao, aoldaoq kovqdaoq cavq nail cov nail teevq gaq, aqyu juq jil pheeljaq nail bhai ya gaiq khi, Yeiqsul aqyu juq bhai aqmeeq-ai ge kovq bhiq nail bhai ya moel-a nail ngaol. A bhai nee ngal-aq, aivq Yeiqsul jaol nail bha lal khi, “Aoldaoq Kovqdaoq iqsanl nail lavqkhoel bhai, khul daoq eeq jaiq nail-aiq” dai, aivq bhai naldaiq bhiq-a nail ngaol.

<sup>29</sup> Yeiqsul aivq bhai ge kovq bhiq-a nail: “Eeq jaiq nail daoq neq, niailhai ngaol. Ilsaqlaiqlal nail tsaol-aq juq-ol, naldaiq yaoq. Ngadao nail Heeqphaq Miqyail neq, aivq teevq gaq taivq-ail Heeqphaq ngaol. <sup>30</sup> Naoq nail neema iqsanl, naoq nail aqhaqlal iqsanl, naoq nail neenoeq needul iqsanl khi, naoq nail gaq iqsanl mail naoq nail Heeqphaq Miqyail bhai gaiq-a yaoq. <sup>31</sup> Nvq daoq teevq daoq neq, ‘Naoq nail aqmaol bhai gaiq-a nail khe-ai, naoq nail aqjail bhai jaol nail tsaol-aq bhai gaiq-a yaoq.’ Aoldaoq Kovqdaoq



nail nvq daoq nee maqtsil eeq jaiq nail daoq, maq jiaiv-ail” dai, ge bhiq-a nail ngaol.

<sup>32</sup> Aoldaoq kovqdaoq cavq nail cov nail al gaq ge nail: “Tsaq naol. Saqlaq-ol, Miqyail teevq gaq taivq-ail jaol khi, aivq maq ngel haq neq, Miqyail yaoq gaq yaoq maq jaol-ail dai, naol ge nail neq, tsaq deedee-ail nial. <sup>33</sup> Al ovqtavq, neema iqsanl, neenoeg needul iqsanl khi, gaq iqsanl aivq bhai gaiq-a khi, naoq nail aqmaol bhai gaiq-a nail khe-ai, naoq nail aqjail bhai jaol nail tsaol-aq bhai gaiq-a nail neq, miqjaq bhai bavq poiv khi laol bhiq nail iqsanl dai khi, laol bhiq nail yaoq juq yaoq nee maqtsil eeq nail ngaol” dai, Yeiqsul bhai ge bhiq-a nail ngaol.

<sup>34</sup> Aivq aqmeeq-ai saol-nvq saol-nvq-ail, ge kovq nail bhai Yeiqsul ya moel-u phao, “Naol neq, Miqyail Milkhaoq bhai mao-ail maq eq-aog thaq nial” dai, aivq bhai ge bhiq-a nail ngaol. A bhai nee ngal-aq, tsaol-aq teevq gaq-ail, Yeiqsul bhai khul teevq pha q iqsanl maq naldaiq tseq dai, pevq ail-a nail ngaol.

*Daqbhil nail Heeqphaq khi mail Daqbhil nail Yaqyov nail ganl*

<sup>35</sup> Yeiqsul uqhuq thaoq nail ilkhaol il ma nail khainl lavqkhoel bhai cavq bhiq cov bhiq-u phao, aivq ge nail: “Khali bhai Daqbhil nail Yaqyov ngaol dai, khul khi mail aoldaoq kovqdaoq cavq nail cov nail juq ge nail-aiq. <sup>36</sup> Daqbhil neq, Meeqnail Haolnail Aqhaqlal bhai juq juq-ail ge nail:

‘Heeqphaq Miqyail  
nqaq nail Heeqphaq bhai

ge bhiq-a nail:  
 Naoq bhai neejlav  
 jlav nail tsaol-aq bhai  
 naoq nail aqkhl  
 kov-uvq bhai  
 ngal bhi jaol-u  
 n-gaol kev dai,  
 ngaq nail lavqmal phao  
 jaoldeel yaoq' dai,  
 ge bhiq-a nail ngaol.

<sup>37</sup> Daqbhil Khali bhai Heeqphaq dai, khul nail ngaol. Thailhai phal-iq neq, aivq khalhai khi Daqbhil nail yaqyov pevq nia nail-aiq" dai, naldaiq bhiq-a nail ngaol.

*Aoldaoq Kovqdaoq cavq nail cov nail juq bhai yaolphaol yaoq*

Tsaol-aq munl munl ma al munl, aivq nail daoq bhai naldaiq movq-ail bhiq nail ngaol.

<sup>38</sup> Aivq cavq bhiq cov bhiq thailthaiq-u phao, Yeiqsul teevq pov gaoq ge nail: "Aoldaoq kovq-daoq cavq nail cov nail juq bhai yaolphaol yaoq. Khul khi mail dai ngal-aq neq, aqyu juq neq, phailkhaaq heelma doi doi-ail tsaol movq nail ngaol. Leiv lavqkhoel bhai tsaol-u phao, yu aqyu juq bhai bhi ev movq nail ngaol. <sup>39</sup> Aqyu juq neq, uqhuq thaoq nail ilkhaol lavqkhoel bhai sivtavq phao jlav nail khaogsail eeq nail doiqbev bhai jaoldeel movq-ai bhiq nail ngaol. Bhaogaiq lav sav-u phao, khaogsail eeq nail jaol duq bhai, jaoldeel movq-ai bhiq nail ngaol. <sup>40</sup> Aqyu juq neq, miqtsiq miqma juq nail ilkhaol khi ildaoq maogqaiq iqsanl bhai khoeq jaq kav jaq khi, yu

ya moel dai, geeqlaoq heelma ma dai hal nail ngaol. Aqyu juq neq, yu nee maqtsil yalkhaq dal nail bhai ya daq naol” dai, ge bhiq-a nail ngaol.

*Miqtsiq miqma teevq gaq phul danq-a nail ganl*

<sup>41</sup> Aq-u phao, Yeiqsul phul danq duq nail sivtavq phao jaoldeel khi, tsaol-aq maodai phul danq lal nail bhai heldaiq thailthaiq nail ngaol. Hulmeeq hulbhao maodai gaq phul maodai oil bhoel lal-a nail ngaol. <sup>42</sup> Aq-u phao, haq nail aoq nail miqtsiq miqma teevq gaq lal khi, giqheel meivbhaiq nvq bhaiq oil bhoel-a nail ngaol.

<sup>43</sup> Yeiqsul aivq nail yaqlaol juq bhai khul khi, ge bhiq-a nail: “Ngal nuljuq bhai maldil dai, ge lavq bhel. Niai khe phul danq-a nail tsaol-aq iqsanl nail lavqkhoel nee, haq nail aoq nail miqtsiq miqma niil gaq neq, yu nee maqtsil danq-a nail ngaol. <sup>44</sup> Khul khi mail dai ngal-aq neq, tsaol-aq al juq neq, maodai jiav nail lavqkhoel nee oil dov khi, danq-a nail ngaol. Thailhai ngaol-aoq, yaqmai-aq niil gaq neq, maossil haq nail lavqkhoel nee, aivq aqdoevq doevq nail haqbhoil khal jiav nail iqsanl mail oil dov khi danq-a nail ngaol” dai, ge bhiq-a nail ngaol.

## 13

*Uqhuq thaoq nail ilkhaol il ma luq-ail seil-ail nail ganl*

<sup>1</sup> Yeiqsul uqhuq thaoq nail ilkhaol il ma nee dov ail thailthaiq-u phao, aivq nail yaqlaol teevq gaq, “Saqlaq-ol, heldaiq. Lovmav niil juq khi mail ilkhaol niil juq khadai eeq nail ngel-ail” dai, Yeiqsul bhai ge bhiq-a nail ngaol.

<sup>2</sup> Yeiqsul aivq bhai ge bhiq-a nail: “Naol eeq deede nail ilkhaol niil juq bhai moel thailthaiq-ail nial. Niilniai lovmav teevq heeq nail kovtavq bhai teevq heeq maq jiav nia-u kev dai, peiv-ail leiv-ail gil naol” dai, ge bhiq-a nail ngaol.

*Daoq loi loi lai nail yanq aqjail jail lal-u phao khe ganl*

<sup>3</sup> Yeiqsul uqhuq thaoq nail ilkhaol il ma nail a phao bal-nvq phao jiav nail Saqlaq gaoqjaoq bhai jaoldeel-nvq thaq-u phao, Bheigtuvluv, Yaqkov, Yaolhaq khi mail Aqdaiqlaiq, aqyu juq taivq-ail lal khi ge nail: <sup>4</sup> “Al juq khaq mao pevq lal nail-aiq. Al juq iqsanl mail pevq lal nail aqjail jail lal-u phao, nvjuq khalhai ya heeq kivq nail-aiq. Ge lavq yaoq” dai, Yeiqsul bhai naldaiq bhiq-a nail ngaol.

<sup>5</sup> Yeiqsul aqyu juq bhai ge bhiq-a nail: “Tsaol-aq teevq gaq iqsanl nuljuq bhai maq ya hevq bheel-aivq dai, yaolphaol yaoq. <sup>6</sup> Khul khi mail dai ngal-aq, tsaol-aq maodai ngaq nail aqmil bhai juq juq-ail, ‘Ngal neq, Khali ngaol’ dai, yovqgavq bhai yovqgavq ge ge-ail, tsaol-aq maodai bhai hevq bheel-aivq nail ngaol. <sup>7</sup> Aqjail bhai genl dev thailthaiq nail aqthel bhai maqkhaiq, eqyal bha genl dev nail bhai maqkhaiq, nuljuq ya gaiq naol. Thailhai ngaol-aq, thaq geesil dei-eiq. Khul khi mail dai ngal-aq neq, al juq ya pevq lal nail ngaol. Al juq pevq lal khi ngaol-aq, daoq loi loi lai nail yanq maq kev lal haq-al. <sup>8</sup> Jeq-e teevq jeq-e khi mail teevq jeq-e, milkhaoq teevq khaoq khi mail teevq khaoq genl dev pheeljaq lal nail ngaol. Teevq dao nee teevq dao milluv luv lal

nail ngaol. Moevq nail sivq nail pha q iqsanl kev lee nail ngaol. Al juq pevq lal nail neq, haq dee aog deede nail iqmoeq khe teevq-eel ngel-ai haq nail ngaol.

<sup>9</sup> Nuljuq aqmeeq-ai yaolphaol khi aqdoevq doevq yaoq. Nuljuq bhai yu pheethaiq khi, yalkhaq dal duq bhai hel-aivq lavq naol. Uqhuq thaoq nail ilkhaol lavqkhoel bhai yu nuljuq bhai neeqtsaq-i mail jivq nail ngaol. Nuljuq ngal bhaqda nee, uvthaiq nail juq khi mail heeqphaq juq nail sivtavq bhai ya thulphaol lai khi, salkhil ya khanq lai naol. <sup>10</sup> Thailhai ngaol-aog, lavqkhiq tsail nail geeqlaoq daoq niil, jeq-e jaq-a iqsanl bhai iqmoeq ya cavq ail bhiq nail ngaol. <sup>11</sup> Yu nuljuq bhai hel-aivq lavq khi aqyu juq nail aqlavq lavqkhoel bhai av bhiq-u phao, nuljuq khalhai ya ge ya thail nail meeq dai, khaoq thaq laol. Aqyanq al lavqkhoel Miqyail nuljuq bhai bhi ge bhi thail lavq nail khe-ai, ge yaoq thail yaoq. Khul khi mail dai ngal-aq neq, daoq ge nail gaq neq, nuljuq maq ngel-ail, Meeqnail Haolnail Aqhaqlal ngaol.

<sup>12</sup> Aq-u phao, yovqgavq nail mailnail nail gaiqlaq bhai teevq gaq nee teevq gaq sil dai, yu nail aqlavq lavqkhoel bhai av bhiq nail ngaol. Aqbhu juq iqsanl yovqgavq nail yaq sil dai, av bhiq nail ngaol. Yaqmiq yaqyov juq iqsanl, yovqgavq nail aqbhu aqma bhai phee q khi bhi deeq heivq nail ngaol. <sup>13</sup> Ngaq nail aqmil bhaqda nee tsaol-aq iqsanl mail nuljuq bhai neejia v jia v lal nail ngaol. Thailhai ngaol-aog, daoq loi loi lai-u kev dai, ivq nail tsaol-aq neq, hevqkovq nail pha q ya nail ngaol" dai, ge bhiq-a nail ngaol.

*Haq dee aoq deede nail pha*

<sup>14</sup> Yeiqsul gaoq ge nail: “Miqyail nail haqbhoil gedan nail Daqyeiqal-i mail ge-ai thaq nail khe-ai, luq-ail seil-ail nail aqjiivq aqcavq pha al, maq bhi jia vkhaoq nail jaol duq bhai jia v lal thaq nail bhai nuljuq ya moel-u phao, Yuldav milkhaoq bhai jaol nail tsaol-aq juq gaoqjaq phao tsaq dal laivq yaoq. (Haoqgavq niilniai khal ge nail tsaol-aq juq neq, gov heeq nia dei-eiq.) <sup>15</sup> Khaolpoiv bhai dav nail juq yavq kha lee-u phao, tsaq yaoq. Yalkav oil ail nail dai khi, ilkhaol bhai thaq aol ail. <sup>16</sup> Yalgaol bhai jaol nail tsaol-aq juq iqsanl, tsaq yaoq. Ilkhaol bha kovq ail khi, yovqgavq nail aqgaq aqdoi thaq he ail. <sup>17</sup> Aqn aqyanq al kev lee-u phao, aqhaq aqmaol liq nail yaqmai-aq juq khi mail, aqtsil cuvq yaq jaol nail aqma juq neq, gaoqhaq khal haq-ail ya noeqhaq deede nail ngaol. <sup>18</sup> Nuljuq ya tsaq nail yanq al yanq coevjjeiv jieiv nail yanq bhai maq ya tsaq dai, geeqlaq hal yaoq.\* <sup>19</sup> Khul khi mail dai ngal-aq neq, Miqyail-i mail miltsaq teivq-u n-gaol nee yanqgaol kev dai, maq pevq lal daiq-a nail nee ovqtavq, yaqhao iqsanl maq pevq lal nail, haq dee aoq deede nail pha yanq al yanq nail lavqkhoel bhai kev lee nail ngaol. <sup>20</sup> Miqyail yanq al yanq bhai maq lav nil lavq haq neq, tsaol-aq teevq gaq iqsanl maq jel-ail nia-ail. Thailhai ngaol-aq, aivq-i mail tsel dov-ai thaq nail tsaol-aq nail haqbhoil Miqyail yanq al yanq lav nil bhi nail ngaol. <sup>21</sup> Aq-u phao, ‘Heldaiq lal yaoq. Khali niilniai jaol-ail nial. A bhai jaol-ail

---

\* **13:18** 13.18 Aq-u khe coevjjeiv jieiv yanq neq, maq-aol iqsanl aol nail ngaol.

nail ngaol' dai, tsaol-aq teevq gaq ganav nuljuq bhai ge lal khi ngaol-aq, neema thaq thaqtsaol. <sup>22</sup> Khul khi mail dai ngal-aq neq, maldil Khali maq ngel nail juq dov lal naol. Miqyail nail haqbhoil gedan naol dai, ge khi ngaol-aq, maldil maq ngel nail juq iqsanl dov lal nail ngaol. Khi kivq haq neq, tsel dov-ai thaq nail tsaol-aq bhai iqsanl hevq bhee q nail dai, aqyu juq noe q-u maq dov nail pha q khi mail bhi heeq bhi moel nail juq, nl dai q lavq nail ngaol. <sup>23</sup> Thailhai ngaol-aq, nuljuq yaolphaol yaoq. Maq pevq lal-u nee mail, yaoq pha q yaoq-ao nee ngal nuljuq bhai ge bhiq-ai tha q nail ngaol dei-eiq" dai, ge bhiq-a nail ngaol.

*Tsaol-aq nail Yaqyov yavq kha lee nail ganl*

<sup>24</sup> Yeiqsul gaoq ge nail: "Haq dee aoq deede e nail al jel ail-u phao, nlma navtsee dai pevq ail khi, bhala iqsanl aqbha q maq bha q dai, pevq ail nail ngaol. <sup>25</sup> Aqqil juq nqtavq nee ga kha lee khi, nqtavq khe bha qaoq juq iqsanl luv luv dai, dao lal nail ngaol.

<sup>26</sup> Aq-u phao, Tsaol-aq nail Yaqyov neq, seiqleiq kha oqsail khi mail bha qaoq ee q deede e nail lavqkhoel nee nqdil jee q khi yavq kha lee nail bhai aqyu juq ya moel nail ngaol. <sup>27</sup> Miqyail nqtavq ga qkhoel juq bhai mil ma liq pha oq liq khoel bhai khoel gai-aivq khi, nqjail miljail a phao nee nia phao dov dai jaol nail, aivq-i mail tsel dov-ai tha q nail tsaol-aq juq bhai bhi hevq jil lavq nail ngaol.

<sup>28</sup> Heeqguq aqbha ol bhai heldai q khi, ganl niil bhai noe q tha q yaoq. Aqbha ol al lavqmeiv meiv

lal khi, bhoenaiq naiq lal haq neq, jaolla yangq dov lee-aiq nial dai, nuljuq heeq nia nail ngaol. <sup>29</sup> Alhai dul dai, nuljuq ganl al juq iqsanl mail pevq lal thailthaiq nail bhai ya moel-u phao, Tsaol-aq nail Yaqyov kovq kha lee nail yangq aqjail jail lal-aoq thaq nial dai, heeq kivq-ai thaq yaoq. <sup>30</sup> Ngal nuljuq bhai maldil dai, ge lavq bhel. Yeel niil yeel maq gil-u nee mail, al juq iqsanl mail pevq lal nail ngaol. <sup>31</sup> Nqtavq khi miltsaq peivq-ail nail ngaol. Thailhai ngaol-aoq, ngaq nail daoq neq, maq peivq-ail dei-eiq.

<sup>32</sup> Tsaol-aq teevq gaq iqsanl aqn aqyanq al maq heeq nia-ail. Nqtavq gaqkhoel iqsanl, Tsaol-aq nail Yaqyov iqsanl maq heeq nia-ail. Aqbhu Miqyail taivq-ail heeq nia nail ngaol. <sup>33</sup> Aqyanq al yangq khaq mao kev lee nail dai, nuljuq maq heeq nia nail ngel-i mail, geeqlaoq hal nail lavqkhoel nee yaolphaol yaolphaol-ail daonq yaoq. <sup>34</sup> Aqyanq al neq, tsaol-aq teevq gaq yaoq khaq yaoq mil yaoq bhai ail-a nail khe-ai, dul nail ngaol. Aivq ail nail khi-u phao, aivq nail yaqkav teevq gaq gil-aq teevq gaq bhai ganl bhoil bhiq ail ceevq-a nail ngaol. Logov bhai lovq nail gaq bhai iqsanl, aqmeeq-ai lovq dei-eiq dai, daoq bivq-ail ceevq-a nail ngaol.

<sup>35</sup> Alheel ngel-i mail, ilheel gaq kovq lal nail neq, nqkiv maq heeq, hul-iq tsilma maq heeq, yavphoil doil lal-u phao maq heeq, nqhao phao maq heeq, khaq mao kovq kev lal nail dai, nuljuq maq heeq nia nail ngel-i mail, aqgeel geel dai, jaol yaoq. <sup>36</sup> Alhai maq ngel haq neq, aivq thaiqphuq dai kovq kev lal-u phao, nuljuq iqthaiq thailthaiq nail bhai, aivq ya moel nail



ngaol. <sup>37</sup> ‘Aqgeel geel dai jaol yaoq’ dai, ngal nuljuq bhai ge bhiq thailthaiq nail khe-ai, tsaol-aq iqsanl bhai gail ge bhiq thailthaiq nail ngaol” dai, Yeiqsul aqyu juq bhai ge bhiq-a nail ngaol.

## 14

*Yeiqsul bhai heivq nail haqbhoil khoiq ge pheeljaq-a nail ganl*

<sup>1</sup> Nvq n jel-ail haq neq, Bhaqsaqkhaq bhaoqaiq khi deqtsiq maq goe dai, khaqmul lav sav nail bhaoqaiq kev lal-a nail ngaol. Aq-u phao, Philma juq khi aoldaoq kovqdaoq cavq nail cov nail juq khalthai khi mail, goiqbhaoq bhaoq nail lavqkhoel nee Yeiqsul bhai nieivq khi ya heivq dai, naogjaoq nail ngaol. <sup>2</sup> “Tsaol-aq niidai nail maq ya suqsaq lal dai, bhaoqaiq niil lav sav-u phao, thaq nieivq haq lao-oq” dai, aqyu juq nail gaiqlaq bhai ge pheeljaq-a nail ngaol.

*Yeiqsul bhai huqbhiq nil nail aqtseel hoel dav bhiq-a nail ganl*

<sup>3</sup> Niaqbhaoq daol daiq-a nail Silmoq dai mil-ai thaq nail teevq gaq, Bheiqtaqnil julgu bhai jaol nail ngaol. Yeiqsul aivq nail ilkhaol bhai aog jaoq jaoq khi aog jaq thailthaiq-u phao, yaqmai-aq teevq gaq aol lal-a nail ngaol. Yaqmai-aq al gaq, mao-ail phoiq nail huqbhiq nil nail aqtseel deq nail phulleq deel lovmav malcavq teevq cavq tsil lavq-a nail ngaol. Aivq malcavq al cavq deeq pav khi, huqbhiq nil nail aqtseel al Yeiqsul nail uqhuq bhai hoel dav bhiq-a nail ngaol.

<sup>4</sup> Thailhai ngaol-aog, teevq pav ganav juq neema phail phail-ail khi ge nail: “Khul khi mail

ganl maq tsoiq nail bhai, huqbbhiq nil nail aqtseel thoil yuq ha nail-aiq. <sup>5</sup> Huqbbhiq nil nail aqtseel thoil gaoq haq neq, hail yal bavq jaiq dai, ya-ail nial\*. Phul al oil khi haq nail aoq nail juq bhai bhoil bhiq kivq nail ngaol” dai, aqyu juq nail gaiqlaq bhai ge pheeljaq nail ngaol. Al ovqtavq, aqyu juq yaqmai-aq al gaq bhai mailma-ail khaq bhiq-a nail ngaol.

<sup>6</sup> Thailhai ngaol-aoq, Yeiqsul ge nail: “Aivq bhai khul teevq pha q iqsanl tha q gaoq ge. Khul khi mail, nuljuq aivq bhai lav tsoiq nail-aiq. Aivq ngaq bhai aqmeeq pha q nl lavq-a nail ngaol. <sup>7</sup> Haq nail aoq nail juq neq, nuljuq nee khaq mao iqsanl jaol nail ngaol. Nuljuq bhiq movq haq neq, khul yanq bhai maqkhaiq, aqyu juq bhai aqmeeq pha q nl bhiq kivq nail ngaol. Thailhai ngaol-aoq, ngal neq, nuljuq nee mail khaq mao iqsanl jaol nail maq ngel-ail. <sup>8</sup> Yaqmai-aq niil gaq aivq khal khi kivq nail khe-ai nl lavq-a nail ngaol. Ngaq bhai duqpheeq nail haqbhoil, maq duqpheeq-u nee, aivq huqbbhiq nil nail ulcuvq hoeldav lavq-a nail ngaol. <sup>9</sup> Ngal nuljuq bhai maldil dai, ge lavq bhel. Lavqkhiq tsail nail geeqlaoq daoq niil miltsaq doi dai, cavq bhiq ail-u phao, yu aivq bhai noe q kev dai, yaqmai-aq niil gaq-i mail nl-a nail ganl niil iqsanl ya cavq bhiq nail ngaol” dai, ge bhiq-a nail ngaol.

*Yuldav-i mail Yeiqsul bhai gaoq jaq-a nail ganl*

<sup>10</sup> Aq-u phao, yaqlaol tsel-nvq gaq nail lavqkhoel bhai aol nail Yuldav Ilsa qgaqliqoq

---

\* **14:5** 14.5 Aq-u khe teevq bavq neq, niil aq-il khe teevq n yalgaq aqphoiq dai ngaol.

dai mil-ai thaq nail gaq, Yeiqsul bhai aqyu juq nail aqlavq lavqkhoel bhai av bhiq nail haqbhoil, Philma juq jaol nail bha lai-a nail ngaol. <sup>11</sup> Philma aqivq juq daoq al daoq ya gaiq-u phao, lavqkhiq tsail deedee khi, “Naoq bhai phul bivq naol” dai, ge ceiv-a nail ngaol. Alheel ngel-i mail, Yeiqsul bhai Philma juq nail aqlavq lavqkhoel bhai av bhiq nail khaq mao eivq lal-ail dai, Yuldav halpov-a nail ngaol.

*Yeiqsul yaqlaol juq nee mail Bhaqsaqkhaq bhaoqaiq jaq-a nail ganl*

<sup>12</sup> Deqtsiq maq goe dai, khaqmul lav sav nail bhaoqaiq iqmoeq-u n-gaol, Bhaqsaqkhaq yaol yaol yaq laol bhiq nail ngaol. Aq-u n-gaol, aivq nail yaqlaol juq, Yeiqsul jaol nail bha lal khi, “Bhaqsaqkhaq bhaoqaiq jaq kivq dai, naoq nail haqbhoil khul dao bhai bhi lav sav thaq-ail movq nail-aiq” dai, naldaiq bhiq-a nail ngaol.

<sup>13</sup> Aq-u phao, Yeiqsul aivq nail yaqlaol nvq gaq bhai ge bhiq-a nail: “Nul-nq nvq gaq meenq lavqkhoel bhai aol ail yaoq. A bhai meldel bavq-nvq thaq nail yaqyov-aq teevq gaq bhai ya thaoqphuq nail ngaol. Aivq nail haoqnao tsaothel-aivq yaoq. <sup>14</sup> Aivq khul il bhai aol ail khi ngaol-aoq, nul-nq nvq gaq ilheel gaq bhai niailhai ge bhiq yaoq: ‘Saqlaq ge nail: Ngal ngaq nail yaqlaol juq nee Bhaqsaqkhaq bhaoqaiq jaq kivq dai, ngaq nail haqbhoil lav sav-ai thaq nail daq-i naq duq, khaq bha jiav nail geiq’ dai, naldaiq ail dei-eiq. <sup>15</sup> Aq-u phao, pultavq teiv-nvq bhai jiav nail aqmeeq-ai lav sav-ai thaq nail daq-i naq duq teevq dao, aivq nul-nq nvq gaq

bhai hevqdaiq lavq nail ngaol. A bhai ngadao juq nail haqbhoil lav sav thaq ail yaoq” dai, aqyu nvq gaq bhai ge bhiq khi khoel gai-aivq-a nail ngaol.

<sup>16</sup> Yaqlaol al nvq gaq dov ail khi, meenq bhai aol ail-a nail ngaol. Aqyu nvq gaq Yeiqsul-i mail ge nail khe-ai ya moel khi, Bhaqsaqkhaq bhaoqaiq jaq nail haqbhoil lav sav ail-a nail ngaol.

<sup>17</sup> Nqkivq kivq lee-u phao, Yeiqsul yaqlaol tsel-nvq gaq nee mail lee-a nail ngaol. <sup>18</sup> Aqyu juq aoq kivq jaq thailthaiq-u phao, Yeiqsul ge nail: “Ngal nuljuq bhai maldil dai, ge lavq bhel. Nuljuq nail lavqkhoel khe, ngaq-ai nee teevq dao bhai taivq-ail jaq nail gaq, ngaq bhai yu nail aqlavq lavqkhoel bhai av bhiq nail ngaol” dai, ge bhiq-a nail ngaol.

<sup>19</sup> Aqyu juq noeqaq lal bhiq khi, “Ngal laiq, ngal laiq” dai, teevq gaq khai-aq teevq gaq, Yeiqsul bhai naldaiq bhiq-a nail ngaol.

<sup>20</sup> Yeiqsul ge nail: “Nuljuq tsel-nvq gaq nail lavqkhoel khe, ngaq-ai nee mail teevq gaoq bhai taivq-ail jaq nail gaq ngaol. <sup>21</sup> Tsaol-aq nail Yaqyov neq, aivq nail ganl gevq-ai thaq nail khe-ai, ya sil nail ngaol. Thailhai ngaol-aq, tsaol-aq nail Yaqyov bhai yu nail aqlavq lavqkhoel bhai av bhiq-a nail gaq neq, geeqlaoq aqdoil ya nail ngaol. Tsaol-aq al gaq maq doevq lee-a nail kheel nul neq, aivq nail haqbhoil meeq jaiq nail ngaol” dai, ge bhiq-a nail ngaol.

*Yeiqsul bhai noeq kev khi, iqmoeq ilmoeq khaqmul jaq tavq-a nail bhaoqaiq*

<sup>22</sup> Aqyu juq aoq kivq jaq thailthaiq-u phao, Yeiqsul khaqmul oil khi, Miqyail bhai tsiqeeq-a nail ngaol. A bhai nee ngal-aq, khaqmul al ngaoppav khi, “Oil jaq yaoq. Niil neq, ngaq nail aqmaol ngaol” dai, ge khi, yaqlaol juq bhai tsiq bhiq-a nail ngaol.

<sup>23</sup> Aqheeq tsilju nail ullul deq nail khaqqanq tsiq khi, Miqyail bhai gaoq tsiqeeq-a nail ngaol. A bhai nee ngal-aq, aivq aqyu juq bhai tsiq bhiq khi, aqyu juq yaoq gaq yaoq-ao nee daol-a nail ngaol.

<sup>24</sup> A bhai nee ngal-aq, aivq ge nail: “Niil neq, daoqma saljial aqsivq bhai tavq nail, ngaq nail aqsivq ngaol. Aqsivq niil, tsaol-aq maodai nail haqphoil bhi il lee nail ngaol. <sup>25</sup> Ngal nuljuq bhai maldil dai, ge lavq bhel. Miqyail Milkhaoq lavqkhoel aqheeq tsilju nail ullul aqsivq ngal maq ya daol-u n-gaol kev dai, ngal aqheeq tsilju nail ullul maq daol yaoq-aol” dai, ge bhiq-a nail ngaol.

*Yeiqsul bhai maq heeq kivq dai, Bheiqtuvluv jil nail ganl*

<sup>26</sup> A bhai nee ngal-aq, aqyu juq tsiqeeq nail daoqsel gul nail daoq gul khi, Saqloq gaoqjaq bha dav lai-a nail ngaol. <sup>27</sup> Aq-u phao, Yeiqsul aqyu juq bhai ge bhiq-a nail: “Nuljuq iqsanl mail ngaq bhai khaonq ha ail ceevq nail ngaol. Khul khi mail dai ngal-aq neq, ‘Yaol lovq nail gaq bhai ngal deeq heivq khi, yaol juq peiv-ail leiv-ail nail ngaol’ dai,

Jalliq lavqkhoel bhai gevq-ai thaq nail ngaol.

<sup>28</sup> Thailhai ngaol-aog, ngal doevq kovq lal gaq haq neq, nuljuq nail iqmoeq nee Gaqliqlail milkhaoq bhai ail naol” dai, ge bhiq-a nail ngaol.

<sup>29</sup> “Yu iqsanl neema cov khi ngaol-aog, ngal neema maq cov-ail” dai, Bheiqtuvluv ge bhiq-a nail ngaol.

<sup>30</sup> Yeiqsul ge bhiq-a nail: “Ngal naoq bhai maldil dai, ge lavq bhel. Yanq-nl kiv yavphoil nvq pov maq doil lal nail gaiqlaq bhai, naol ngaq bhai maq heeq kivq-ail dai, hail pov kev dai, jil nail ngaol” dai, Bheiqtuvluv bhai ge bhiq-a nail ngaol.

<sup>31</sup> “Ngal naoq-ai nee teevq gaq khe-ai ya sil khi ngaol-aog, ngal naoq bhai maq heeq kivq-ail dai, maq jil-ail” dai, Bheiqtuvluv Yeiqsul bhai mailma-ail ge bhiq-a nail ngaol. Aqyu juq iqsanl mail, alhai ge nail ngaol.

*Yeiqsul Geiqseiqmaqnil gaoqkhail bhai geeqlaoq hal-a nail ganl*

<sup>32</sup> A bhai nee ngal-aq, aqyu juq Geiqseiqmaqnil dai, khul nail dao bhai ail kev-a nail ngaol. “Ngal geeqlaoq hal-ail thailthaiq-u phao, nuljuq niai daonq dei-eiq” dai, Yeiqsul aivq nail yaqlaol juq bhai ge bhiq-a nail ngaol. <sup>33</sup> Aq-u phao, aivq Bheiqtuvluv, Yaqkov, Yaolhaq aqyu juq bhai taiqv-ail hel-aivq-a nail ngaol. Aivq geesil deede khi, neema lavqkhoel bhai haq aog nl deede nail ngaol. <sup>34</sup> Aqyu juq hail gaq bhai ge bhiq-a nail: “Ngal noeqlaq nail sil lee-aig nial. Niilniai aqgeel geel dai, daonq dei-eiq” dai, ge bhiq-a nail ngaol.

<sup>35</sup> A bhai nee ngal-aq, aivq sivtavq phao micil jiiv ail khi, miltsaq bhai peevqceevq kovdoiq doiq nail lavqkhoel nee gaolbeiv khi, “Aqyang niil ngaq bhai bhi jel-ail kivq haq neq, bhi jel-ail lavq yaoq” dai, geeqlaoq hal-a nail ngaol.

<sup>36</sup> Aq-u phao, aivq ge nail: “Aqbhu-ol, ngaq nail Aqbhu-ol, naol yaoq pha q yaoq-ao nee nl nia nail ngaol. Haq dee aoq deede nee nail khaoqanq niil ngaq bhai bhi jel-ail lavq yaoq. Thailhai ngaol-aoq, ngal neema tsaq nail khe-ai, tha q bhi pevq. Naol neema tsaq nail khe-ai, bhi pevq yaoq” dai, geeqlaoq hal-a nail ngaol.

<sup>37</sup> Aivq kovq lal-u phao, aqyu juq iqthaiq kov-ai tha q nail bhai ya moel khi, Bheigtuvluv bhai ge bhiq-a nail: “Silmoq-ol, naol iqthaiq kov-ai tha q nail lai q. Naqli teevq lavq taivq-ail iqsanl aqgeel geel dai, maq jaol tsaol-ail lai q. <sup>38</sup> Nuljuq jalmul mul nail haoqnao maq ya tsaohel-aivq dai, aqgeel geel dai, jaol khi geeqlaoq hal yaoq. Nuljuq nl movq nail neema aol khi ngaol-aoq, aqsivq haqjoil phao ga q bha q nail niil” dai, ge bhiq-a nail ngaol.

<sup>39</sup> Aivq gaoq ail khi, iqmoeq khe pov hal-a nail khe-ai, geeqlaoq gaoq hal ail-a nail ngaol.

<sup>40</sup> Aivq gaoq kovq lal-u phao, aqyu juq iqthaiq nul deede nee nail ngel-i mail, iqthaiq kov-ai tha q nail bhai, gaoq ya moel-a nail ngaol. Aqyu juq Yeiqsul bhai khalhai ya ge kovq bhiq heeq dai, maq heeq nia-ail.

<sup>41</sup> Hail pov teevq pov aivq kovq lal khi ge nail: “Nuljuq iqthaiq iqthaiq-ail gaqnaq naq-ai ha q nail lai q. Gaq-ao naol. Tsaol-aq nail Ya qyov bhai haqev nail tsaol-aq nail aqlavq lavqkhoel

bhai av bhiq nail aqyanq kev lal-aoq nail ngaol. <sup>42</sup> Thul yaoq. Lai bhel. Thoiq, ngaq bhai yu nail aqlavq lavqkhoel bhai av bhiq nail gaq aqjail bhai kev lee-aoq thaq nial” dai, ge bhiq-a nail ngaol.

*Yeiqsul bhai nieivq-a nail ganl*

<sup>43</sup> Alhai ge thailthaiq-u phao, gaqkhoel tsel-nvq gaq nail lavqkhoel bhai aol nail, Yuldav dai mil-ai thaq nail al gaq lee-a nail ngaol. Thaoma khi doiqthoi bavq-nvq thaq nail tsaol-aq munl munl ma juq iqsanl, aivq nail haoqnao tsaothe jaol nail ngaol. Philma juq, aoldaoq kovqdaog cavq nail cov nail juq khi, aqivq aqtsu juq-i mail, aqyu juq bhai khoel-ai leevq-a nail ngaol.

<sup>44</sup> Yeiqsul bhai yu nail aqlavq lavqkhoel bhai av bhiq-a nail al gaq, aqyu juq bhai niailhai ge bhiq-ai thaq nail ngaol: “Nuljuq aivq bhai heeq nia dai, ngal aivq bhai moeqsaol saol naol. Aq-u phao, aivq bhai nieivq khi, aqmeeq-ai tsel-aivq yaoq” dai, ge bhiq-a nail ngaol. <sup>45</sup> Aivq kev lee-u phao, teevq pov taivq-ail, Yeiqsul jaol nail bha lee khi, “Saqlaq-ol” dai, ge khi mail, moeqsaol saol bhiq-a nail ngaol. <sup>46</sup> Aq-u phao, aqyu juq Yeiqsul bhai nieivq thaiq-ai thaq nail ngaol. <sup>47</sup> Aqjail bhai thulphaol nail tsaol-aq juq nail lavqkhoel khe teevq gaq, aivq nail thaoma gaol dov khi, Philma nail yaqkav bhai tsil gai-aivq khi, naqkov teevq phao bal-nvq ceiv ail-a nail ngaol.

<sup>48</sup> Yeiqsul aqyu juq bhai ge bhiq-a nail: “Nuljuq tsaolpheel bhai nieivq nail khe-ai, thaoma khi doiqthoi bavq khi, ngaq bhai nieivq lee-a nail laiq. <sup>49</sup> Ngal yaoq n yaoq-ao nee uqhuq thaog



nail ilkhaol il ma bhai cavq bhiq cov bhiq-u phao, nuljuq jaol khi ngaol-aoq, nuljuq ngaq bhai maq nieivq-ail. Niailhai pevq lal-a nail neq, Jalliq lavqkhoel-ai gevq-ai thaq nail khe-ai bhee lal dai, pevq lal-a nail ngaol” dai, aivq ge bhiq-a nail ngaol. <sup>50</sup> Aq-u phao, yaqlaol juq iqsanl mail, aivq bhai khaonq-ail ceevq khi, tsaog gil-a nail ngaol.

*Yaqyov-aq yaqnoil teevq gaq tsaog-a nail ganl*

<sup>51</sup> Aq-u phao, yaqyov-aq yaqnoil teevq gaq, haoltaiv deel haqphal-i mail yavq-ai thaq nail bheeyaq teevq keiv lee jeeq khi, Yeiqsul nail haoqnao tsaothe jaol nail ngaol. Aqyu juq aivq bhai nieivq nail khi-u phao, <sup>52</sup> aivq bheeyaq al keiv loev ha-ail ceevq khi, maoldeq laqnel-ail, tsaog jel-a nail ngaol.

*Maoqbhaoq nl nail munl munl ma juq, Yeiqsul bhai yalkhaq dal-a nail ganl*

<sup>53</sup> Tsaol-aq al juq, Yeiqsul bhai Philma jaol nail bha hel-aivq-a nail ngaol. Philma juq, aqivq aqtsu juq khi mail Aoldaoq Kovqdaoq cavq nail cov nail juq iqsanl, a bhai jil lal-a nail ngaol. <sup>54</sup> Bheiqtuvluv neq, Philma nail ilkhaol nail khainl lavqkhoel phao kev dai, Yeiqsul nail haoqnao al jaiq-ail maq eq nail bhai, tsaothe jaol-nvq thaq nail ngaol. A bhai nee ngal-aq, Philma nail yaqkav juq nee jaoldeel lai khi, aqcoevq loil thailthaiq nail ngaol.

<sup>55</sup> Philma juq khi maoqbhaoq nl nail munl munl lao-ail, Yeiqsul bhai ya deeq heivq dai, aivq nail kovtavq bhai oeqbal halpov khi ngaol-aoq, maq halpov moel-al. <sup>56</sup> Khul khi mail dai ngal-aq neq, tsaol-aq mee nia gaq aivq nail ganl maq

tsaq nail salkhil khanq khi ngaol-aoq, aqyu juq-i mail khanq nail salkhil al maq dul lai-ail.

<sup>57</sup> Aq-u phao, tsaol-aq teevq pav ganav juq thul lal khi, Yeiqsul nail ganl maq tsaq nail pha q salkhil niailhai khanq nail ngaol: <sup>58</sup> “‘Aqlavq-i mail cov-ai tha q nail uqhuq tha oq nail ilkhaol il ma niilniai ngal peiv ha khi, aqlavq-i mail ma q cov-a nail uqhuq tha oq nail ilkhaol il ma yao q il yao q, hail n nail lavqkhoel cov phal naol’ dai, aivq ge nail bhai, nvjuq ya gaiq-a nail ngaol” dai, aqyu juq ge nail ngaol. <sup>59</sup> Aqyu juq salkhil al hai khanq khi ngaol-aoq, khanq nail salkhil al ma q dul lai-ail.

<sup>60</sup> Aq-u phao, Philma aqivq ga q aqyu juq nail sivtavq bhai thul lal khi, Yeiqsul bhai ge bhiq-a nail: “Tsaol-aq niil juq nao q nail kovtavq bhai oeqbal tha q tha q-ail, salkhil khanq nail bhai, naol khul teevq pha q iqsanl ma q ge kovq bhiq-ail lai q” dai, Yeiqsul bhai naldaiq-a nail ngaol.

<sup>61</sup> Thailhai ngaol-aoq, Yeiqsul teevq pha q iqsanl ma q ge kovq bhiq dai, aqtsi tsu dai jaol nail ngaol.

“Naol neq, geeqlao q eeq nail Miqyail nail Ya qyov Khali dai, khul nail al ga q ngaol lai q” dai, Philma aqivq ga q aivq bhai gao q naldaiq-a nail ngaol.

<sup>62</sup> Yeiqsul ge nail: “Ngal neq, al ga q ngaol. Al ovqtavq, Tsaol-aq nail Ya qyov bha qao q eeq deede e nail Miqyail nail lavqmal phao jaoldeel-nvq tha q nail bhai ma qkhaiq, nqdil jeeq khi yavq kha lee nail bhai ma qkhaiq, nuljuq ya moel nail ngaol” dai, ge kovq bhiq-a nail ngaol.

63 Aq-u phao, Philma aqivq gaq aivq nail phailkhaog aivq he pav khi ge nail: “Ngadao juq khul nail salkhil gaoq loq nail-aiq. 64 Aivq Miqyail bhai khal ge movq-ail ge nail bhai, nvjuq ya gaiq-ao nail ngaol. Nuljuq bhai khalhai noe q nail-aiq” dai, naldaiq-u phao, “Aivq sil nail tsaq nail ngaol” dai, aqyu juq iqsanl mail neema tsaq nail ngaol.

65 A bhai nee ngal-aq, tsaol-aq teevq pav ganav juq, Yeiqsul bhai thaiqkhaq thaiqbav-a nail ngaol. Aivq nail maivphaoq bhai maivphee q pheeq khi, aivq bhai deeq deeq-ail khi ge nail: “Naoq bhai khaq sil gaq deeq nail-aiq dai, Miqyail nail haqbhoil gedan nail gaq khe-ai, nvjuq bhai ge daiq lavq yaoq” dai, ge bhiq-a nail ngaol. Philma nail yaqkav jio vq nail juq iqsanl, aivq nail bhaqbha bhai teiv-a nail ngaol.

*Yeiqsul bhai maq heeq kivq-ail dai, Bheiqtuvluv jil-a nail ganl*

66 Bheiqtuvluv ilkhaol nail khainl lavqkhoel bhai jaol-u phao, Philma nail yaqkav yaqmai-aq yaqnoil teevq gaq lee-a nail ngaol. 67 Yaqmai-aq al gaq, Bheiqtuvluv aqcoevq loil thailthaiq nail bhai ya moel-u phao, Bheiqtuvluv bhai heldaiq cov-ai tha q khi, “Naol iqsanl, Naqsaqlail meenq yaq Yeiqsul nee mail jaol nail ngaol” dai, ge bhiq-a nail ngaol.

68 “Naol ge nail daoq bhai, ngal maq heeq kivq-ail. Gov iqsanl maq gov heeq kivq-il” dai, Bheiqtuvluv jil-a nail ngaol.

69 A bhai nee ngal-aq, lolgov jia v nail phao Bheiqtuvluv aol ail-a nail ngaol. Yaqkav jio vq

nail yaqmai-aq yaqnoil al gaq Bheiqtuvluv bhai gaoq moel khi, “Thoil gaq aqyu juq nail munl lavqkhoel bhai aol nail teevq gaq ngaol” dai, aqjail bhai thulphaol nail juq bhai ge bhiq-a nail ngaol. <sup>70</sup> “Maq ngel-ail” dai, aivq teevq pov gaoq jil-a nail ngaol.

Teevq yanq gaoq khi al ngal-aq neq, a bhai thulphaol nail juq ge nail: “Naol neq, maldil aqyu juq nee mail tavq nail nial. Khul khi mail dai ngal-aq neq, naoq nail aqthel neq, Gaqliqlail tsaol-aq nail aqthel niil” dai, Bheiqtuvluv bhai ge bhiq-a nail ngaol.

<sup>71</sup> Aq-u phao, Bheiqtuvluv aivq bhai aivq iqkhail yavq yavq-ail, “Nuljuq-i mail ge nail gaq bhai, ngal maq heeq kivq-ail” dai, khanq-a nail ngaol.

<sup>72</sup> Teevq pov taivq-ail yavphoil nvq pov teevq pov gaoq doil dov lal-a nail ngaol. “Yavphoil nvq pov maq doil lal-u phao, naol ngaq bhai maq heeq kivq-ail dai, hail pov kev dai, jil nail ngaol” dai, Yeiqsul-i mail aivq bhai ge bhiq-a nail daoq al daoq bhai, Bheiqtuvluv noe q dov lal bhiq khi nioil deedee-a nail ngaol.

## 15

*Yeiqsul bhai heeqphaq Phillav nail sivtavq bhai hel laivq-a nail ganl*

<sup>1</sup> Nqbbhaq bhaq lal-u phao, Philma juq, aqivq aqtsu juq, Aoldaoq Kovqdaoq cavq nail cov nail juq khi mail maoqbhaq nl nail bhai aol nail munl munl lao-ail maoqbhaq nl-a nail ngaol. A bhai nee ngal-aq, Yeiqsul bhai pheethaiq khi,

heeqphaq Phillav jaol nail bha hel-aivq khi aivq nail aqlavq lavqkhoel bhai av bhiq-a nail ngaol.

<sup>2</sup> Aq-u phao, Phillav Yeiqsul bhai “Naol Yuldav tsaol-aq nail heeqphaq ngaol laiq” dai, naldaiq-a nail ngaol. “Naol ge nail khe-ai, ngel naol” dai, Yeiqsul ge kovq bhiq-a nail ngaol.

<sup>3</sup> Philma juq neq, Yeiqsul nail kovtavq bhai oeqbal mee nia pha q tha q nail ngaol. <sup>4</sup> “Naol teevq pha q iqsanl ma q ge kovq bhiq laiq. Aqyu juq nao q nail kovtavq bhai oeqbal khadai tha q thailthai q nail ngel-ail” dai, Phillav Yeiqsul bhai ge bhiq-a nail ngaol.

<sup>5</sup> Thailhai ngaol-a o q, Yeiqsul dao q teevq dao q iqsanl ma q gao q ge kovq bhiq-a nail bha q da nee, Phillav noeq-u ma q dov dai, pevq ail-a nail ngaol.

*Yeiqsul bhai heivq yaoq dai, dal ceiv-a nail ganl*

<sup>6</sup> Bhaqsa q kha q bha o q ai q lav sav thailthai q-u phao, tha o n q bhai aol nail tsaol-aq ju q nail lavqkhoel khe, milkhao q ya q neema tsa q khi hal dov nail tsaol-aq teevq ga q bhai, Phillav ya pha i q dov bhi q nail aol jiav nail ngaol. <sup>7</sup> Yan q al yan q lavqkhoel, milkhao q bhai suqsa q lal dai nl nail nee ovqtavq, tsaol-aq bhai heivq-a nail ngel-i mail, tha o n q bhai laol-ai tha q nail tsaol-aq teevq munl jaol nail ngaol. Bhaqla q bhal dai mil-ai tha q nail teevq ga q iqsanl aqyu ju q nail munl bhai aol khi tha o n q bhai laol-ai tha q nail ngaol. <sup>8</sup> Aq-u phao, tsaol-aq munl munl ma Phillav jaol nail bha lal khi, “Yao q kovq yao q-a o nee mail, naol nl lavq nail khe-ai, nl lavq yao q” dai, hal lai-a nail ngaol.

9 “Nuljuq nail haqbohail Yuldav nail tsaol-aq nail heeqphaq bhi phaiq movq-ail laiq” dai, Phillav aqyu juq bhai naldaiq-a nail ngaol. 10 Khul khi mail dai ngal-aq neq, “Philma juq Yeiqsul bhai neekhaol maq sil-ai bhiq nail ngel-i mail, ngaq bhai av lavq thaq nail niil” dai, Phillav heeq nia nail ngaol. 11 Thailhai ngaol-aq, “Yeiqsul bhai maq phaiq-ail, Bhaqlaqbhal bhai phaiq yaoq dai, ge dei-eiq” dai, Philma juq tsaol-aq munl munl ma juq bhai gaq bivq-ai thaq nail ngaol.

12 “Thailhai phal-iq neq, Yuldav nail tsaol-aq nail heeqphaq dai nuljuq khul nail gaq bhai ngal khalhai ya khi bhiq nail-aiq” dai, Phillav aqyu juq bhai naldaiq-u phao, 13 “Aivq bhai lavqyavq kovtavq bhai tavq heivq yaoq” dai, aqyu juq mailma-ail gul nail ngaol.

14 “Khul khi mail bhi tavq heivq movq nail-aiq, aivq haqev nail pha q khul nl-a nail-aiq” dai, Phillav aqyu juq bhai naldaiq bhiq-a nail ngaol. Aq-u phao, “Aivq bhai lavqyavq kovtavq bhai tavq heivq yaoq” dai, aqyu juq iqmoeq-u nee maqtsil gul kav lal-a nail ngaol.

15 Phillav tsaol-aq munl munl ma neema tsaq dai, nl movq nail ngel-i mail, Bhaqlaqbhal bhai phaiq bhiq-a nail ngaol. A bhai nee ngal-aq, “Yeiqsul bhai neeqtsaq-i mail jii vq khi lavqyavq kovtavq bhai tavq heivq yaoq” dai, daoq bivq khi, genl dev nail juq nail aqlavq lavqkhoel bhai av bhiq-a nail ngaol.

*Genl dev nail juq Yeiqsul bhai khal nl movq-ail nl bhiq-a nail ganl*

16 Genl dev nail juq-i mail Yeiqsul bhai genl dev nail aqvq juq jaol nail ilkhaol lavqkhoel bhai hevq bhoel-aivq khi genl dev teevq munl munl lao-ail, a bhai bhi jil lal-a nail ngaol. 17 Aqyu juq Yeiqsul bhai nel nav nav nail heeqphaq nail phailkhaq heelma bhi doi-a nail ngaol. A bhai nee ngal-aq, aqgoe aqjiav oil khi, heel uqtsaoq khe-ai jievq khi, aivq bhai nieivq tsaq bhiq-a nail ngaol. 18 Aqyu juq aivq bhai ev nail khe-ai tavq khi, "Yuldav nail tsaol-aq nail heeqphaq-ol, naol geeqlaoq eeq dei-eiq" dai, meelnaq bhiq-a nail ngaol. 19 A bhai nee ngal-aq, aqyu juq lunl aqkhaq-i mail aivq nail uqhuq bhai deeq deede-a nail ngaol. Aivq bhai thaiqkhaq thaiqbav bhiq khi, peevqceevq kovdoiq doiq khi mail, aivq bhai uqhuq thaoq bhiq-a nail ngaol. 20 Aqyu juq aivq bhai khal nl movq-ail nl bhiq gaq-al nee ngal-aq neq, aivq-i mail doi-nq thaq nail nel nav nav nail phailkhaq heelma nieivq loev khi, aivq nail aqgaq aqdoi gaq bhi doi-a nail ngaol. A bhai nee ngal-aq, lavqyavq kovtavq bhai tavq heivq nail dai khi, aivq bhai hevq dol-aivq-a nail ngaol.

*Yeiqsul bhai lavqyavq kovtavq bhai tavq heivq-a nail ganl*

21 A bhai nee ngal-aq, Khulleiqniq meenq bhai jaol nail Silmoq dai mil-ai thaq nail gaq, yalgaol nee kovq lal thailthaiq nail ngaol. Aivq neq, Aqleiqsaqdul khi mail, Lulphul nail aqbhu ngaol. Genl dev nail juq aivq bhai nieivq khi, Yeiqsul nail lavqyavq bhi bavq-a nail ngaol. 22 Aqyu juq Gaollaqaoldav dai khul nail dao, Yeiqsul bhai

hel-aivq-a nail ngaol. Aqmil al mil neq, uqcov bhai khul nail ngaol. <sup>23</sup> Mullaq dai khul nail huqbhiq nil nail aqtseel kheq-ai thaq nail aqheeq tsilju nail ullul aqyu juq aivq bhai bhi daol khi ngaol-aq, aivq maq daol-al. <sup>24</sup> Aqyu juq aivq bhai lavqyavq kovtavq bhai tavq thaiq gaq khi mail, aivq nail aqgaq aqdoi khul gaq khul keiv ya nail dai, eellaq bheq khi bhoilpav khi oil-a nail ngaol.

<sup>25</sup> Aqyu juq aivq bhai lavqyavq kovtavq bhai tavq thaiq-a nail yanq neq, nqhao laoma phao naqli goiq lavq bhai ngaol. <sup>26</sup> Yuldav nail tsaol-aq nail heeqphaq ngaol dai, aivq bhai oeqbal thaq nail haoqgavq gevq khi, aivq nail kovtavq bhai tavq thaiq-ai thaq nail ngaol. <sup>27</sup> Yeiqsul nee mail teevq gaq khe-ai, khoiqbhaoq nvq gaq bhai iqsanl, lavqmal phao teevq gaq, lavqtsel phao teevq gaq dai, tavq thaiq-a nail ngaol.

<sup>28</sup> [“Hageiv nail tsaol-aq juq nee mail aivq bhai saol-nvq bhoel-ai thaq nail ngaol” dai, ge-ai thaq nail Jalliq daoq al daoq bhee lal-a nail ngaol.]

<sup>29</sup> Khal ail khal lal nail tsaol-aq juq, uqhuq jivq jivq-ail, aivq bhai meelnaq meelnaq-ail khi ge nail: “Al lal naol neq, uqhuq thaoq nail ilkhaol il ma bhai peiv ha khi hail n nail lavqkhoel bhai cov phal kivq naol dai, ge lao nail, maq ngel-ail laiq. <sup>30</sup> Naol naq nail aqmaol bhai bhi jel-ail khi lavqyavq kovtavq nee yavq kha lee yaoq thoq” dai, ge bhiq-a nail ngaol.

<sup>31</sup> Alhai dul dai, Philma juq khi mail Aoldaoq Kovqdaoq cavq nail cov nail juq iqsanl, Yeiqsul bhai meelnaq bhiq-a nail ngaol: “Aivq aqyu



juq bhai hevqkovq kivq naol geiq. Aivq nail aqmaol bhai neq, aivq maq hevq kovq nia-il laq. <sup>32</sup> Ilsaqlaiqlal jeq-e nail heeqphaq pevq nail Khali thoil gaq, niil aq-il lavqyavq kovtavq nee, yavq kha lee nail bhai ya moel ail nul neq, ngadao juq aivq bhai neema thaqtsaol naol laq” dai, aqyu juq nail gaiqlaq bhai ge nail ngaol. Yeiqsul nee mail lavqyavq kovtavq bhai tavq thaiq-ai thaq nail al nvq gaq iqsanl, aivq bhai meelnaq meelnaq-ail, ge nail ngaol.

*Yeiqsul aqhaq ceiv-a nail ganl*

<sup>33</sup> Aq-u phao, n-gaol gaolkav kav nail yanq nee mail, kivq hail lail ma phao naqli hail lavq bhai kev dai, miltsaq heeq lao lao-ail navtsee dai, pevq ail-a nail ngaol. <sup>34</sup> Kivq hail lail ma phao naqli hail lavq bhee lal-u phao, Yeiqsul aqthel aqkav kav dai, niailhai gul-a nail ngaol: “Eilohi, Eilohi, laqmaq saqbhaq taqnil” dai, gul-a nail ngaol. Daoq al daoq neq, “Ngaq nail Miqyail-ol, ngaq nail Miqyail-ol, khul khi mail naol ngaq bhai khaonq ha lavq nail-aiq” dai, ge nail ngaol.

<sup>35</sup> Aqjail bhai thulphaol nail tsaol-aq teevq pav ganav juq daoq al daoq bhai ya gaiq-u phao, “Aivq Eillilya bhai khul nail niil” dai, ge nail ngaol.

<sup>36</sup> Aq-u phao, tsaol-aq teevq gaq lavqtsail mail, iqyaq iqma khe mullul khe-ai dul nail niaqpeovq teevq khai cev-ail khi, aqtsel tsel nail aqheeq tsilju nail ullul bhai oil deev-a nail ngaol. A bhai nee ngal-aq, lunl aqkhaonq bhai soiq tsaonq khi, Yeiqsul bhai bhi siv daol-a nail ngaol. Tsaol-aq al gaq ge nail: “Thaq tsal lao. Eillilya aivq bhai

lavqyavq kovtavq nee bhi jel-ail meeq. Daonq daiq bhel” dai, ge bhiq-a nail ngaol.

<sup>37</sup> Thailhai ngaol-aoq, Yeiqsul aqthel aqkav kav dai, teevq pov gaoq gul khi, aqhaq ceiv-a nail ngaol.

<sup>38</sup> Aq-u phao, uqhuq thaoq nail ilkhaol il ma lavqkhoel khe thao pav-ai thaq nail haqphal phal ma, uqhuq nee mail daoqthaoq bhai dov dai, nvq pav pav ail-a nail ngaol. <sup>39</sup> Yeiqsul alhai aqhaq ceiv-a nail bhai aivq nail sivtavq bhai thulphaol nail genl dev teevq yal gaq nail aqivq teevq gaq ya moel-u phao, “Tsaol-aq niil gaq neq, maldil Miqyail nail Yagyov ngel lao thaq nial” dai, ge nail ngaol.

<sup>40</sup> A bhai nee al jaiq-ail maq eq nail bhai, yaqmai-aq teevq pav ganav juq iqsanl jaol khi heldaiq thailthaiq nail ngaol. Aqyu juq nail lavqkhoel Maqgaqdaqalal meenq bhai jaol nail Maqlil, Yaqkov yaqnoil gaq khi mail Yaolseiq nail aqma Maqlil khi mail, Saqloqmeiq aqyu juq jaol nail ngaol. <sup>41</sup> Aqyu juq neq, Yeiqsul Gaqliqlail milkhaoq bhai jaol-u phao, aivq nail haoqnao tsaothe tsaothe-ail, tsaojao-ai bhiq-a nail juq ngaol. Yeiqsulsaqlaiq meenq bha aivq nee mail dav lal-a nail yaqmai-aq maodai gaq iqsanl, a bhai jaol khi heldaiq thailthaiq nail ngaol.

### *Yeiqsul bhai bavq duq ail-a nail ganl*

<sup>42</sup> Aq-u n-gaol neq, jaol n n-gaol nail iqmoeq phao khe n pevq nail lainq nail aqn ngaol. Alheel ngel-i mail, kivq hail hail lee-u phao, <sup>43</sup> Aqlilmaqthaiq meenq bhai jaol nail, Yaolsai dai mil-ai thaq nail teevq gaq lal-a nail ngaol.

Aivq neq, maoqbhaoq nl nail munl lavqkhoel bhai yu ev nail teevq gaq pevq nail ngaol. Aivq iqsanl, Miqyail Milkhaoq kev lee nail bhai noeqthunq nail ngaol. Aivq maq geesil dai, Phillav jaol nail bhai Yeiqsul nail aqmaol hal lai-a nail ngaol. <sup>44</sup> Yanq a dai kev lal-a teevq-eel ngaol-aq, Yeiqsul sil-a nail ngel-i mail, Phillav noeq-u maq dov dai, pevq ail-a nail ngaol. Alheel ngel-i mail, Yeiqsul sil-u phao khe jaol nail genl dev teevq yal gaq nail aqivq al gaq bhai khul khi, “Aivq maldil sil-aq nail ngaol lai” dai, naldaiq-a nail ngaol. <sup>45</sup> “Sil-aq nail ngaol” dai, genl dev teevq yal gaq nail aqivq aivq bhai ge bhiq-u phao, “Yeiqsul nail aqmaol bhai bal-aivq kivq naol” dai, Phillav Yaolsai bhai ge bhiq-a nail ngal. <sup>46</sup> Yaolsai neq, haqphal phal phul ul-aivq khi, Yeiqsul nail aqmaol bhai bavq kha gaq-u phao, maoltoev toev khi mail, lovmav-i mail tavq-ai thaq nail luqdaol bhai bavq duq ail-a nail ngaol. A bhai nee ngal-aq, luqdaol nail moeqkhoeq bhai lovmav heeq ma teevq heeq ngaoq tsoiq-ail ceevq-a nail ngaol. <sup>47</sup> Maqgaqdaqlal meenq bhai jaol nail Maqlil khi mail Yaolsei q nail aqma Maqlil Yeiqsul bhai bavq duq-a nail dao bhai ya moel-a nail ngaol.

## 16

### *Yeiqsul gaoq doevq kovq lal-a nail ganl*

<sup>1</sup> Jaol n jel-ail khi\* Maqgaqdaqlal meenq bhai jaol nail Maqlil, Yaqkov nail aqma Maqlil khi

---

\* **16:1** 16.1 Yuldav nail tsaol-aq neq, nlma ga bhoel-ail haq neq, aqn aqsivq teevq n dai, saol-nvq nail ngaol.

mail Saqluqmeiq, aqyu juq Yeiqsul nail aqmaol bhai hoeldav bhiq nail dai khi, huqbhiq nil nail pha q ul ail-a nail ngaol. <sup>2</sup> Yaoq n yaoq, nqhao navqmav-ail nl ma dov lal-u phao, aqyu juq luqdaol bhai ail-a nail ngaol. <sup>3</sup> “Ngadao juq nail haqbhoil luqdaol moeqkhoeq bhai ngaoq tsoiq-ai tha q nail lovmav al heeq bhai, kha q sil ga q bhi ngaoq phao heeq” dai, aqyu juq nail gaiqlaq bhai ge pheelja q nail ngaol.

<sup>4</sup> Thailhai ngaol-aoq, aqyu juq heldai q gai-aivq-u phao neq, lovmav al heeq ngaoq ha-ai tha q nail bhai ya moel-a nail ngaol. Lovmav al heeq neq, ee q deedee nail ngaol. <sup>5</sup> A bhai nee ngal-aq, aqyu juq luqdaol lavqkhoel bhai aol lai-u phao, phulle q dai phailkha o q heelma doi-nq tha q nail yaqyov-a q yaqnoil teevq ga q lavqma l phao jaoldeel-nvq tha q nail bhai ya moel khi, geesil deedee lal bhiq-a nail ngaol.

<sup>6</sup> Aq-u phao, aivq aqyu juq bhai ge bhiq-a nail: “Tha q geesil. Lavqyavq kovtavq bhai tavq heivq-a nail, Naqsaqlail meenq ya q Yeiqsul bhai nuljuq heldai q lee tha q nail nial. Aivq doevq kovq lal-aoq nail ngaol. Aivq niilniai ma q jaol yaoq-aol. Aivq bhai bavq tha q-a nail aqduq bhai heldai q lee yaoq. <sup>7</sup> Nuljuq kovq lai khi, aivq nail yaqlaol khi mail Bheiqtuvlu v bhai niailhai ge bhiq lai yaoq: ‘Aivq nuljuq nail iqmoeq nee Gaqliqlail milkha o q bhai ail thailthai q nail ngaol. Aivq nuljuq bhai ge tha q-ail ceevq-a nail khe-ai, a bhai nuljuq aivq bhai ya moel naol’ dai, ge bhiq lai dei-eiq” dai, aqyu juq bhai ge bhiq-a nail ngaol.

<sup>8</sup> Aq-u phao, yaqmai-a q al juq luqdaol nee mail dov ail-a nail ngaol. Aqyu juq geesil khi aqjuq

juq deedee nail nee ovqtavq, noe-q-u maq dov dai pevq-ail khi, tsaoq kol-aivq-a nail ngaol. Aqyu juq geesil deedee nail ngel-i mail, teevq gaq bhai iqsanl maq ge bhiq-al.

*Yeiqsul aivq nail aqmaol Maqgaqdaqlal meenq bhai jaol nail Maqlil bhai bhi moel-a nail ganl*

<sup>9</sup> [Yeiqsul neq, jaol n jel-ail khi iqmoeq-u n-gaol, nqhao navqmav-ail doevq kovq lal-a nail ngaol. A bhai nee ngal-aq, aivq nail aqmaol Maqgaqdaqlal meenq bhai jaol nail Maqlil bhai iqmoeq bhi moel-a nail ngaol. Yaqmai-aq al gaq neq, jel lal-u phao, neivq sivq maol aol nail bhai, Yeiqsul-i mail the dov bhiq-a nail al gaq ngaol. <sup>10</sup> Yeiqsul nee mail teevq gaq khe-ai jaol-a nail juq, noeqhaq nail lavqkhoel nioil thailthaiq-u phao, Maqlil ganl al aqyu juq bhai ge gaiq lai bhiq-a nail ngaol. <sup>11</sup> “Yeiqsul aqdoevq doevq-ai haq nail ngaol. Ngal aivq bhai ya moel-a nail ngaol” dai, Maqlil aqyu juq bhai ge bhiq khi ngaol-aq, aqyu juq neq, “Maq pevq lal nia-ail” dai, ge kovq bhiq-a nail ngaol.

*Yeiqsul aivq nail aqmaol yaqlaol nvq gaq bhai bhi moel-a nail ganl*

<sup>12</sup> A bhai nee ngal-aq, aqyu juq nail lavqkhoel khe nvq gaq julgu bhai kovq ail thailthaiq-u phao, Yeiqsul aivq nail aqmaol micil bhi phal-ail khi aqyu nvq gaq bhai bhi moel-a nail ngaol. <sup>13</sup> Aqyu nvq gaq kovq lal khi jaol-ail ceevq-a nail juq bhai ge bhiq khi ngaol-aq, aqyu juq neema maq thaqtsaol-ail.

*Yaqlaol tsel teevq gaq bhai Yeiqsul daoq bivq-a nail ganl*

<sup>14</sup> A bhai nee ngal-aq, yaqlaol tsel teevq gaq jaoljaoq khi aoq jaq thailthaiq-u phao, Yeiqsul aivq nail aqmaol aqyu juq bhai bhi moel-a nail ngaol. Aqyu juq neema maq thaqtsaol nail nee ovqtavq, neema gaol nail ngel-i mail, Yeiqsul aqyu juq bhai khaq-a nail ngaol. Khul khi mail dai ngal-aq neq, Yeiqsul gaoq doevq kovq lal-a nail bhai ya moel-a nail tsaol-aq nail daoq bhai, aqyu juq neema maq thaqtsaol-ail.

<sup>15</sup> A bhai nee ngal-aq, Yeiqsul aqyu juq bhai ge bhiq-a nail: “Miltsaq doi dai ail khi, tsaol-aq iqsanl bhai lavqkhiq tsail nail geeqlaoq daoq cavq bhiq ail yaoq. <sup>16</sup> Neema thaqtsaol khi ulcuvq saol nail tsaol-aq hevqkovq nail pha q ya nail ngaol. Neema maq thaqtsaol nail tsaol-aq neq, yalkhaq dal nail bhai ya daq nail ngaol. <sup>17</sup> Neema thaqtsaol nail tsaol-aq juq neq, bhi heeq bhi moel nail pha q niil juq nl nail ngaol. Aqyu juq ngaq nail aqmil bhai juq juq-ail, neivq bhai the dov nail ngaol. Aqyu juq mee nia pha q nail daoq ge nail ngaol. <sup>18</sup> Aqyu juq eellel bhai nieivq nia nail ngaol. Aqyu juq jaldovq jaq khi daol khi ngaol-aq, khul maq pevq lal-ail. Nal nail goel nail tsaol-aq nail kovtavq bhai aqlavq bavq dav-u phao, tsaol-aq al juq meeq lai nail ngaol” dai, Yeiqsul aqyu juq bhai ge bhiq-a nail ngaol.

*Yeiqsul nqtavq kovtavq bhai kovq dav lai-a nail ganl*

<sup>19</sup> Heeqphaq Yeiqsul aqyu juq bhai alhai ge bhiq gaq-u phao, aivq bhai nqtavq kovtavq bha tsiqdal laivq-a nail ngaol. Aivq a bhai Miqyail nail lavqmal phao jaoldeel-nvq thaq nail ngaol.

<sup>20</sup> Yaqlaol juq iqsanl dov ail khi, yaoq dao yaoq-ao nee mail geeqlaoq daoq cavq bhiq ail-a nail ngaol. Heeqphaq Yeiqsul aqyu juq nee mail ganl tsao nl nail ngaol. Aqyu juq-i mail cavq nail geeqlaoq daoq al duq jaiq lal dai Yeiqsul bhi heeq bhi moel nail pha q nl dov bhiq-a nail ngaol.]

**Jalliq aqsivq Gaolkheel daoq**  
**Akeu: Jalliq aqsivq Gaolkheel daoq New Testament**  
copyright © 2015 Wycliffe Bible Translators, Inc.

Language: Gaolkheel (Akeu)

Contributor: Wycliffe Bible Translators, Inc.

All rights reserved.

2020-11-13

---

PDF generated using Haiola and XeLaTeX on 21 Feb 2024 from source  
files dated 29 Jan 2022  
aaaba9fd-8172-55cc-ad15-906f43ddb5a5